

**NATIONAL ASSEMBLY OF
SEYCHELLES**

Tuesday 17th June, 2025

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble, bonzour piblik an deor ki pe swiv nou. E bonzour nou bann envite ozordi ki en group zabitan Mont Buxton e mon a donn laparol Onorab Gervais Henrie ki'n envit zot pou en pti mo byenveni.

HON GERVAIS HENRIE

Mersi Mr Speaker. Bonzour tou Manm Onorab, piblik ki pe ekoute sirtou bann zabitan Mont Buxton.

E en pli gro bonzour e *welcome* dan Lasanble Nasyonal sa group 17 dimoun ki sorti dan distrik Mont Buxton, en keksoz ki nou fer tou-le-z-an nou anmenn en group. E pou dimoun dan lakour ki enterese pou fer sa zot bezwen zis pran kontak avek swa mon lofis, swa Lofis Administrasyon Distrik e nou kapab organize. Mersi Mr Speaker.

MR SPEAKER

Mersi Onorab. Nou annan detrwa *item* biznes en pe administratif pou nou dil avek, be selman mon le fer en posibilite pou Minis Joubert lib 9er 45.

Alor nou pou *postpone* sa bann *item* ki nou abitye pran premye, pou apre *PNQ* ... nou pou pran *PNQ* premye pou kapab, be selman nou a dil avek prezantasyon papye. Madanm Clerk ou a fer prezantasyon dokiman.

MADAM CLERK

Mersi Mr Speaker. Bonzour Mr Speaker. Bonzour tou bann Manm Lasanble, tou bann *staff* Lasanble e osi nou bann envite dan Galeri. Nou bann papye ki pe ganny prezante bomaten i; -

S.I. 40 of 2025
Environment Protection
(*Environment Levies*)
(*Amendment*) *Regulations*,
2025.

S.I. 41 of 2025
Environment Protection (Ozone)
(*Amendment*) *Regulations*,
2025.

Women's Parliamentary Caucus – 2024 Annual Report and the Women's Parliamentary Caucus – Zimbabwe Women Parliament Caucus Benchmark Visit 3rd to 8th of June, 2024. Mersi Mr Speaker.

MR SPEAKER

Mersi Madanm Clerk. Avek sa nou a prosede, nou a les lezot *item* pou apre e nou a prosede avek *PNQ*. Madanm *Hansard* Raporter ou ava apel Minis silvouple.

Bonzour Minis Flavien Joubert, Minis pou Lagrikiltir, Sanzman Klima e Lanvironnman. Bonzour egalman Mr Kevin Nancy Sekreter Prensipal pou Lagrikiltir e Ms Linetta Joubert *Chief Officer* dan sa departman. Mersi pou zot partisipasyon dan *Private Notice Question*. Onorab Pillay, nou a ekout ou kestyon.

HON SEBASTIEN PILLAY

Mersi Mr Speaker. Bonzour tou koleg Onorab, e bonzour Minis avek ou delegasyon e tou dimoun ki a lekout pe swiv Lasanble. Mr Speaker, mon *Private Notice Question* i lir koumsa; -

Eski nou kapab ganny en leksplikasyon lo kwa egzakteman sa konstriksyon ki pe ganny fer dan Sant Biodiversite Grand Anse Mahe e lekel ki'n aprouve pou donn sa morso later pou sa devlopman? Mersi Mr Speaker.

MR SPEAKER

Mersi Onorab. Minis, ou repons.

MINISTER**FLAVIEN****JOUBERT**

Bonzour Mr Speaker. Bonzour bann Manm Onorab e osi bann dimoun ki pe ekoute. Mersi Mr Speaker e Onorab pou ou kestyon.

Mr Speaker, kontrerman avek sa ki'n ganny dir dan kestyon, sa konstriksyon ki *Leader* Lopozisyon pe koz lo la i pa dan Sant Biodiversite ouswa pa lo en later ki form parti Sant Biodiversite.

Mon a klarifye, avan sa proze ti demare ti annan 3 *parcel* dan sa landrwa, ti annan en *parcel B-8124*, e sa i *parcel* ki kot Sant Biodiversite i ganny trouve; *B-8125* ki en *parcel* adrwat ver montanny, ki en *parcel* lagrikiltir. E *B-7224* ki en *parcel* adrwat ki vin pli anba ki vin tous avek semen e i osi i en *parcel* lagrikiltir.

Pou kapab *accommodate* sa proze, *parcel B-7224* parey mon dir sa enn adrwat anba ki vir avek semen - ti ganny sou divize an 3. En porsyon ti ganny *amalgamate* avek *parcel* Biodiversite e sa in aktyelman agrandi son kapasite e in anmas tou son bann aktivite ki i pe fer ki ti'n depas son *parcel*. E sa in aprezan vin *parcel B-8373* ki zot pou war lo *GIS* si ou gete.

En lot porsyon *B-8357* sa in ganny *lease* pou Lagrikiltir

e se lo la ki sa proze pe ganny fer. E dernyen porsyon B-8358 i ganny rezerve pou larivyer e en akse semen.

Lekel ki pe fer sa proze? Sa kare later in ganny *allocate* avek en konpanyen ki apel *Green Rooster Group Company Limited*, en konpanyen Seselwa ki ti ganny etabli an Septanm 2023. Zot pe konstrir en labatwar pou poul, pou *white meat* dan sa landrwa.

E ki kalite aprouvasyon sa proze i annan? Minister pou responsab pou Lagrikiltir ti resevwar en demann pou en proze an 4 konponan an 2023 e apre sa in fer konsiltasyon avek bann lotorite konsernen. Sa i enkli *Planning, Public Health, Lanvironnman, PUC* e Transpor lo Later.

Early entry ti ganny donnen an Me 2024 e proze ti ganny soumet an Zilyet sa lannen. E apre plizyer diskisyon e revizyon laprouvasyon final ti ganny donnen par *Planning Authority* an Septanm 2024.

E zis pou soulinyen Mr Speaker, sa i enn bann pli gro lenvestisman ki nou annan dan lagrikiltir aktyelman. E nou koman Minister, nou la pou nou ankouraz bann ferme pou ogmant zot nivo prodiksyon.

E alor pou nou, sa i en lenvestisman ki signifikan e ki nou'n donn nou tou sipor pou

fer sir ki i kapab ed nou transform prodiksyon lagrikiltir dan pei e anmenn plis prodwi lokal pou nou koup lo lenportasyon. Mersi Mr Speaker.

MR SPEAKER

Mersi Minis. Nou a pran siplemanner lezot Manm. Onorab Lemiel, *yes*, ou kapab komanse.

(Off-Mic)

MR SPEAKER

Point of order? Yes, mon a ekout ou?

HON BERNARD GEORGES

Mersi Mr Speaker. Mr Speaker, mon pe demann mon lekor, an vi ki repons Minis ki dir ki sa konstriksyon pa pe ganny fer dan Sant Biodiversite.

E kekyon se kisisa ki pe ganny fer dan Sant Biodiversite. Mon pa war okenn rezon aköz nou devret kontinyen avek sa kekyon. *It'S completely out of order.*

MR SPEAKER

Wait, wait, ok. Wi, me selman kekyon i kapab ganny baze i kapab, kekyon i kapab baze lo repons ki Minis in donnen. Mon krwar sa i kapab annord. Nou a kontinyen avek kekyon Onorab Lemiel.

HON SYLVANNE LEMIEL

Mersi Mr Speaker. Bonzour Mr Speaker, Minis avek ou delegasyon, tou mon bann koleg Manm Onorab e tou dimoun ki dan Galeri bonzour.

Minis, baze lo ou leksplikasyon ou'n nonm en *parcel B-7224* ki'n ganny divize an 3. An 2020 le 13 Zilyet presizeman 2020, sa letan la ti Minis Cosgrow ki ti Minis, e i ti vin la pou reponn en kestryon pou Onorab William ki MNA Grand Anse Mahe. E mon rapel Onorab William ti met en bon pe presyon lo Minis Cosgrow sa letan, ki pou napa - pa merite annan okenn devlopman dan sa landrwa laba.

E letan mon pe lir la, zis permet mwan Mr Speaker, Minis Cosgrow ti eksplike ki an Mars lannen pase - savedir ti an Mars 2019 zot ti resevwar en *email* pou en devloper ti pou komans en proze lo sa *plot B-7224*, kot ti'n ganny en *lease*. I dir apre serten resers i ti realize ki sa morso later i enn ki ti ganny konsidere koman propriyete Sant Biodiversite Barbarons.

So, petet mwan mon ti a kontan konnen, aköz ki la ozordi an 2025 letan ki li Onorab i ti fer en pledwari avek Gouvernman an 2020 pou napa okenn devlopman laba parey petet ki pe ganny fer la, mon ti a kontan konnen

petet aköz la an 2025 Gouvernman in vwar li enportan ki en labatwar lavyann blan i pe al ganny fer dan sa landrwa? Mersi.

MR SPEAKER

Mersi. Minis, i kapab reponn.

MINISTER FLAVIEN JOUBERT

Mersi Mr Speaker. Mersi Onorab pou ou kestryon. Mr Speaker, parey mon'n eksplike, sa bout aktivite ki Sant Biodiversite ti'n depas son *parcel* in ganny koupe e in ganny azoute avek son *parcel*.

Savedir Sant Biodiversite i pa'n perdi dan sa *subdivision*, e annefe i ti pe fer son aktivite an deor son *plot* e son bann aktivite ki tonm an deor son *plot* in ganny anmase e in ganny azoute avek son *plot*. I fer ki napa okenn kontrent lo *extent* aktivite Sant Biodiversite ozordi.

E rezon ki nou'n koup sa *parcel*, se ki i en *parcel* ki ti gannyen dapre lenformasyon ki mwan mon annan - i en *parcel* ki ti'n ganny targete pou Proze Lagrikiltir. Sa zafer devloper ti'n vin lo la ti en proze lagrikiltir be sa *parcel* i form parti plizyer *parcel* dan sa rezyon ziska Barbarons an desandan, ki form parti bann *parcel* lagrikiltir.

Alor pou nou, napa okenn kontradiksyon i en

parcel ki ti la pou ganny servi bann proze parey e nou'n koupe nou'n tir son bout ki'n merite pou biodiversite e leres in ganny *allocate* pou lagrikiltir. Mersi.

MR SPEAKER

Mersi. Wi, nou a pran kestyon baze lo repons Minis si zot anvi klarifikasyon lo ki pe arive avek later biodiversite. Onorab Aglae.

HON EGBERT AGLAE

Mersi Mr Speaker. Mersi, bonzour Minis ek ou *panel* e tou bann envite ki dan Galeri.

Minis, eski ou kapab dir sa Lasanble, kan eski zot ti fer sa bann *subdivision*? Akoz sa *parcel* biodiverse si mon memwar i *bonne* i pa ti ankor ganny *subdivide* en pe letan pase sa. *Ok*? Kan ki zot ti fer sa bann *subdivision*?

E dezyenmman Minis, baze lo sa ki ou'n dir lo sa size devlopman ki obor sa later li menm li, eski in annan ouswa eski ou Minister in resevwar konplent avek bann zabitan konsernen dan sa landrwa, angiz ki sa devlopman i riske annan serten laspe petet lanvironnman tal si pa ganny fer byen.

Eski zot Minister in apros sa bann konsern pou regarde eski i en fe? Mersi.

MR SPEAKER

Mersi. Minis.

MINISTER FLAVIEN JOUBERT

Mersi Mr Speaker. Mersi Onorab, pou ou 2 kestyon. Kan *subdivision* ti ganny fer premye. *Subdivision* ti ganny fer an 2024.

Dezyenm pwen, Mr Speaker, eski i annan konplent sorti kot rezidan dan sa rezyon? Mr Speaker, sa landrwa i enn bann landrwa ki aktyelman pli lwen avek bann rezidan dan sa rezyon. E nou pa'n ganny okenn konplent e nou pa krwar i annan okenn risk ki pou kre okenn nwizans pou rezidan akoz son zistans avek bann rezidans pli pros.

E se pour sa rezon apre plizyer letour ki nou'n fer, i enn bann landrwa ki nou'n selekte pou sa proze e nou, nou satisfè ki sa proze i pa pou kre okenn nwizans pou okenn rezidan. Mersi.

MR SPEAKER

Mersi. Onorab Larsen.

HON CELINE LARSEN

Mersi Mr Speaker. Bonzour a tous espesyalman zabitan Au Cap ki a lekout.

Eski Minis i kapab dir nou lekel *owner* sa lakonpannyen e si pa li menm li Chairman *STC* e li menm li ki pe vann poul ek *STC*? E si sa i leka, eski sa pa montre ki

sa Gouvernman pe travay lo en baz faver e ki sa i kre *conflict of interest*? Mersi Mr Speaker.

MR SPEAKER

Minis, ou kapab reponn.

MINISTER FLAVIEN JOUBERT

Mersi Mr Speaker. Mr Speaker, napa okenn faver dan sa proze. Nou, nou la pou *entertain* tou dimoun ki vin avek proze, ki vin avek nide pou zot devlop serten morso dan Sekter Lagrikiltir. Parey nou'n fer, lo La Digue, parey nou'n fer lo Praslin e nou pe ganny bloke, parey nou pe fer lo Mahe.

Si ou get *Ex Hydroponic* kot nou pe fer semen ek pon pou ankouraz bann zenn ki oule fer nouvo sistenm *hi-tech*, tou sa ki vini nou sey rod en fason - sirtou bann ki pe adres bann bezwen nasyonal aktyel, nou travay avek zot pou nou donn zot fasilite pou zot devlope.

Sa zafer *owner*, sa konpannyen Mr Speaker, mon'n verifie avek bann koleg. Lenformasyon ki mwan mon annan se ki *Standing Orders* pa permet pou nou vin dan Lasanble Nasyonal pou vin donn lenformasyon piblik.

Sa konpannyen mon'n dir ou i apel *Green Rooster Group Limited*, ou al kot

Rezistrar Konpannyen ou kapab trouv tou sa bann dimoun ki form parti sa konpannyen, mon pa pou vin nonm personn dan Lasanble e ou ava konnen lekel propriyeter, *shareholder*, *beneficial owner* par deryer sa konpannyen.

Me sa i en lenformasyon ki totalman piblik e i pa mon devwar pou mon vin dir sa dan Lasanble ozordi bomaten. Mersi.

MR SPEAKER

Mersi Minis. Mon a pran kestyon Onorab Henrie.

HON GERVAIS HENRIE

Mersi Mr Speaker. Mon premye kestyon, an vi ki annan kestyon ki'n ganny demande avan poudir ki i annan en pe letan ki in annan lapros ver Gouvernman pou devlop sa landrwa pou en biznes dan lentere nasyonal. Me desizyon in tarde ganny pran dan lepase e la in ganny pran.

Mon anvi konnen aköz ki administrasyon aktyel in sezi sa loportinite sirtou pou adres kestyon lotosifizans dan prodiksyon lavyann, e partikilyerman i kapab adres pri dizef lo marse lokal ki tou dimoun pe konplent, eski sa desizyon i pou ede adres sa size?

E dezyenmman, eski pozisyon en dimoun i anpese ki i annan loportinite garanti anba Konstitisyon parey nenport ki pou li fer biznes libreman dan pei? Sirtou biznes lagrikiltir? Mersi Mr Speaker.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Onorab, mon ava komans avek dezyenm parti ou kestyon. Pou sa dezyenm kestyon kategorikman non. In menm annan dimoun ki'n dan Gouvernman dan lepase ki dan biznes lagrikiltir e ki pa'n kre okenn problem.

Alor, mon pa vwar okenn rezon pou okenn prive ganny bloke senpleman aköz nou annan en persepsyon lo li, pou nou anpes li fer biznes. Napa naryen ki sa dimoun in fer ki mal, i senpleman en Seselwa ki annan son larzan, ki annan en proze, ki pou ed nou nasyonanman. E pou nou sa i en priyorite donn li son sans, les li travay.

Kot i konsern loportinite ki sa proze, ki sa proze pou anmennen; parey mon'n dir dan mon repons, sa proze ki sa promoter in anmenn devan nou i en proze an 4 konponan. I annan labatwar pou poul, i

annan prodiksyon pou lavyann i annan prodiksyon poul dizef e i annan en *hatchery* avek.

Sa *hatchery* i merit donn nou adisyonnal par lao 30 mil pti poul par mwan. Sa prodiksyon poul lavyann i merit donn nou plis ki 100 mil poul adisyonnal lo *market* par mwan. Sa prodiksyon dizef i merit pe azout omwen 32 mil nouvo dizef lo *market* par mwan.

So pou nou, pa par mwan par zour, 32 mil dizef par zour an plis. Alor pou nou, i bann priyorite ki nou devret pe ankouraze dan pei, pou nou fer sir ki sa bann problem ki nou pe war aktyelman ki bokou dimoun pe eksprim fristrasyon avek me selman ki'n ganny kree en bann letan pase, ki'n ariv la ozordi i ganny rezourd.

Alor pou nou, nou bezwen ankouraz bann proze parey e nou devret sorti dan sa staz kot nou fer zis tapaz aköz nou pa kontan en dimoun. Les sa dimoun travay e li i ava anmenn son rezilta son larzan prive ki in mete, se pa nou ki pran risk, les li pran son risk les li anmenn en rezilta pou pei. Mersi.

MR SPEAKER

Mersi. Onorab Loze, ou kestyon.

HON JOHAN LOZE

Mersi Mr Speaker. Mr Speaker, Lasanble ti ava apresye si Minis ti a fer nou'n ganny bann dokiman lo bann lotorizasyon e permisyon ki in dir nou sa devloper in gannnen.

Mr Speaker, mon kestyon, *issue* dizef e pri dizef in leve par Onorab Deputy Speaker. Mr Speaker, sa *issue* pri dizef i en problemn artifisyel ki'n ganny kree par Gouvernman LDS li menm letan...

MR SPEAKER

Ou pe al dan en laliny, ou pe al dan en laliny ki napa naryen pou fer avek kestyon. Si ou annan en kestyon ki retourn lo sans orizinal sa, silvouple ou kapab demande.

HON JOHAN LOZE

Mersi Mr Speaker. Mr Speaker, si ou donn mwan zis en minit pou mwan eksplike ki mon pe dir, ou pou vwar kote i azout tou keksoz ansanm. Mr Speaker, ler zot in tir *subsidy* lo manze zannimo in kas lendistri poul e dizef sa i kler. Prezan Minis,

MR SPEAKER

Onorab, mersi. Eskiz mwan nou pe al dan en lot soz, Onorab William.

HON JOHAN LOZE

Be ki ou pe kasyet?

(Off-Mic)

HON JOHAN LOZE

Kwa ki ou pe kasyet? Les Seselwa tande.

MR SPEAKER

Onorab Loze! Onorab Loze, ou kondwit pa akseptab. Mon pe donn ou en *warning* silvouple aret kriye e aret kriy ek Chair. Dernyen fwa mon dir ou. Onorab Wiliam ou kestyon.

HON WAVEN WILLIAM

Mersi Mr Speaker. Bonzour Minis avek ou delegasyon, mon swet labyenveni bann zabitan sorti Mont Buxton dan *Gallery*. Mr Speaker, mon kestyon i *comme* swivan;

Mon anvi demann avek Minis si a okenn moman in ganny okenn let sorti kot Lotorite Distrik Grand Anse Mahe ki sa proze pa devret ganny fer?

Dezyenmman Mr Speaker, mon anvi demann avek Minis, si sa 3 proze pou kre lanplwa pou Seselwa? Mersi.

MR SPEAKER

Mersi. Minis, ou repons.

MINISTER FLAVIEN JOUBERT

Mersi Mr Speaker. Mersi Onorab, pou ou kestyon. Mr

Speaker, non nou pa'n ganny okenn lobzeksyon sorti kot Distrik Grand Anse Mahe konsernan sa proze.

E dezyenm parti ou kestyon Mr Speaker, wi, sa proze i merit anmenn bokou plis aktivite dan prodiksyon e osi dan transformasyon.

An vi ki sa fasilite kontrerman avek sa ki en Onorab ti pe dir mwan pou *supply* STC, sa fasilite i sipoze prodwir son bann prodwir final ki i kapab met lo *market* li. I pa neseserman en prodwi ki i bezwen al *supply* STC pou STC apre al fer en lavant pou li, i kapab al *supply* tou dimoun ek tou sa ki i aste lavyann lo *market* lokal.

E alor pou nou, nou krwar poudir sa proze i pou ede dan prodiksyon, me i pou osi ede anmenn nouvo aktivite ekonomik dan pei ki a kapab ed Distrik Grand Anse e osi bann distrik kot bann lezot konponan sa proze pe ganny fer parey Anse Boileau ek Baie Lazare. Mersi.

MR SPEAKER

Mersi. Onorab Gill, ou kestyon.

HON CHURCHILL GILL

Mersi Mr Speaker. Bonzour tou Manm. Bonzour *panel*. Minis, eski pou sa morso later ti annan lezot dimoun ki ti annan lentere? Oubyen i en

keksoz- eski ti annan *tender*? Oubyen i en keksoz ki ou Minister in ganny kontak e desizyon in pran pou *subdivide*?

I annan bann lezot dimoun ki fer menm kalite biznes avek lanplè sa en biznes, natirelman dapre ou leksplikasyon *market* mannyer i ete, eski sa bann dimoun ki fer sa menm biznes pa pou santi zot pri pou zot kapab vann zot prodwi?

Eski ou Minister pe fer demars pou ofisyelman koup lenportasyon, pour ki sa bann prodwi, dimoun ki fer menm biznes dan lezot landrwa dan Sesel zot a kapab osi vann zot prodwi? Mersi.

MR SPEAKER

Mersi. Mon krwar ou'n al lo 3 pwen, me selman mon a permet Minis adrese si i kapab.

MINISTER

FLAVIEN

JOUBERT

Ok, mersi Mr Speaker. Mersi Onorab pou ou kestyon. Mon krwar i annan 3 morso.

Premye kestyon konsernan later Mr Speaker. Lo kote Departman Lagrikiltir parey mon'n dir, nou pran bann proze dapre son priyorite ki i adrese nasyonalman. Sa proze i an plizyer konponan e nou'n fer *subdivisions* pou nou *accommodate* en proze parey

akoz nou krwar i en proze priyorite. E *tender* ti pou senpleman fristre sa envestiser san ki nou war nou avek en proze la an 2025.

Wi, Onorab, nou pa ti pou war nou avek en proze 2025 nou dir nou ti fer letour avek *tender*. Menm si en dimoun i vin devan ou, ou pran son proze ou al met lo *tender*, ou pe senpleman fristre li. Alor, pou nou i en proze priyorite parey lezot envestiser ki vini dan lagrikiltir nou rod later nou donn zot pou zot kapab travay.

Dezyenm morso, se i annan lezot ki pe fer menm kalite aktivite lo *market*, be Mr Speaker, ozordi depi ler Gouvernman in ouver lenportasyon lavyann poul, o porsyon lavyann ki nou pe prodwir lokalman i vreman ba. I 15 poursan parfw apros an 20 poursan me solman i pa sot sa kantite.

I annan lespas pou tou dimoun lo *market*, e i annan lespas pou lezot ki pe aktyelman prodwi, e i annan lespas pou zot agrandi en bon pe. Alor, napa - nou pa krwar poudir sa proze pou annan okenn lenpak lo bann ki egziste. Annefe i pou fer ki Sesel i kapab anpli en pe plis proporsyon *cost* lavyann ki ganny konsonmen lo marse lokal.

E lot morso keston, se eski apre sa nou pou fer demars pou nou koup lenportasyon lavyann poul? I pa toultan fasil pou nou fer li akoz bann lagreman ki nou ana enternasyonal.

Me selman pou nou annan en bon rezon pou nou koup lenportasyon lavyann poul, se fodre prodiksyon lokal in mont lo en bon nivo, e si prodiksyon lokal pa mont lo sa nivo. Si nou pa fer demars pou nou fer li mont lo sa nivo, nou pou napa okenn rezonnman pou nou al devan pou nou dir nou pe koup lo lenportasyon.

Alor pou mwan sa proze pou donn nou en rezon pou nou dir poudir nou pou koupe aprean, akoz nou ganny enn de proze sa groser la prezan nou ou annan sa prodiksyon. E la prezan nou kapab vin argimante poudir Sesel pri prodwir en bon pe. En pe parey Moris ozordi pe fer, son prodiksyon in depans poursan in ariv lo trwa kar la prezan i kapab dir wi, mon annan en gro lendistri ki mon bezwen proteze e mon annan rezon pou mon koup lo lenportasyon.

E, zis en pti keksoz mon ti a kontan azoute Mr Speaker, se ki sa proze i pa zis pou sa devloper. Sa kapasite ki i annan i pe aktyelman ankouraz lezot prodikter pou prodwi poul, pou anmenn kot

sa fasilite pou *process* lo en nivo vremen o, akòz i en fasilite ki pou prodwir avek sertifikasyon *hallal* ki kapab *compete* avek bann lavyann ki nou pe enporte ozordi sorti lo bann gran *market* parey *Brazil* eksetera. Mersi Mr Speaker.

MR SPEAKER

Mersi Minis. Onorab Roucou, ou kestyon.

HON MICHEL ROUCOU

Mersi Mr Speaker. Bonzour, bonzour tou bann dimoun ki dan Galeri. Bonzour tou dimoun ki pe ekout nou dan lakour.

Minis, si ou kapab dir nou eski zot in fer serten travay pou gete si i annan bann lezot bout later o bor ki petet ti a kapab benefisye bann lezot dimoun ki ti a voudre investir dan lagrikiltir li menm li? Mersi.

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Parey mon dir i annan 3 kare later orizinalman, anler adrwat avek Sant Biodiversite i annan demann ki'n ganny fer pou Proze *Crop*, e nou'n preski fini fer alokasyon. Savedir i pou annan en laferm ki pou fer *crop* par lao.

I annan osi lezot later en pe pli lwen kot nou pou rod sa fason pou nou ankouraz dimoun pou antre ankor dan prodiksyon diferan kalite *crop*. Me sa bann nou pa ankor determinen.

Par Egzanp deryer *Indian Ocean Nursery* i annan serten landrwa ki nou pe gete. Me i annan plizyer landrwa kot i annan ankor en pe bann bout later ki nou kapab trouv solisyon pou serten dimoun.

Me selman egzakteman dan sa landrwa, nou annan en laferm ki sipoze ganny etabli par lao kot sa labatwar pe fer pou fer *crop* e sa i pou pran en bon lespas lo kote montanny avek sa devlopman. Mersi.

MR SPEAKER

Mersi Minis. Onorab Gabriel?

HON CONRAD GABRIEL

Mersi Mr Speaker. Mon a dir bonzour tou dimoun, mon a dir tou bann dan Galeri bonzour. Bonzour tou dimoun Pointe Larue.

Minis, nou konnen poudir sa dimoun, sa devloper i fer komers ek *STC*. E i osi *Chairman STC*. So sa nou anvizaze poudir sa i en konfli lentere direk. Eski ou kapab eksplik nou en pti pe?

And then, lo zafer *tender* Minis, mon tann ou, ou'n al sa *tender* si nou fer pou fristre sa dimoun. Be tou norm pe

ganny kase Minis la, savedir prosedir *tender* pa pe ganny gete. Mersi.

MR SPEAKER

Kestyon Onorab Gabriel, premye kestyon in ganny reponn deza. E dezyenm kestyon i spekilatif - i akizatwar ki i annan - mon pou pas lo prosen kestyon Onorab Esparon.

HON REGINA ESPARON

Mersi Mr Speaker. Bonzour bann zoli dimoun Mont Buxton anler dan Galeri.

Bonzour Minis ek ou delegasyon. Mr Speaker, mon kestyon i al koumsa, Minis mon felisit ou pou pran sa desizyon pou devlop sa landrwa laba anba Gouvernman US, ou pa'n reste pri anba Gouvernman LDS-me ou pa'n reste pri anba Gouvernman US avek sa desizyon 2019.

Mon kestyon se, eski ti annan konsiltasyon avek Biodiversite avan ki sa proze ti ganny konsevwar? E dezyenmman, eski i annan lespas pou *parent stock* osi dan sa landrwa pou ede koup en pe lo lenportasyon? Mersi.

MR SPEAKER

Mersi Onorab. Minis?

MINISTER

JOUBERT

FLAVIEN

Mr Speaker, eskiz mwan, eski Onorab i kapab repet dezyenm parti ou kestyon silvouple?

HON REGINA ESPARON

Eski ti annan konsiltasyon avek Biodiversite avan ki sa proze ti ganny konsevwar? E eski dan sa landrwa i osi annan lespas pou fer *parent stock* pou redwir en pe lo lenportasyon? Mersi.

MR SPEAKER

Mersi. Minis.

MINISTER

JOUBERT

FLAVIEN

Mersi Mr Speaker. Mersi Onorab. Mr Speaker, sa SPGA, nou'n konsilte avek li letan nou ti pe pran sa desizyon. Parey nou'n dir nou dir pe eksplor plizyer landrwa letan sa demann ti ganny fer, nou'n eksplor plizyer posibilite e nou'n war poudir sa landrwa i pli ideal pou diferan rezon.

E apre konsiltasyon avek bann lazans, me *National Park* in ganny konsilte e in donn nou son *go ahead* pou nou fer sa proze dan sa landrwa. E zis pou fer remarke ki sa proze i pou dan en fasilite totalman fermen li, i pa en fasilite ki pou deor ouswa i pou kre en problem otour dan son lanvironnman.

Parent Stock Farm ti annan en sit pou *parent stock* farm Mont Sinyal, aköz nou

konnen i en landrwa ki bezwen ganny fer- i en aktivite ki bezwen ganny fer dan en landrwa izole e i annan plizyer rekomandasyon ki vin avek.

Me, aktyelman napa okenn dimoun ki'n vin devan avek en Proze *Parent Stock*, me nou si i annan okenn endividi devloper ki anvi fer *parent stock* Sesel pareyman nou'n pare pou travay avek zot pou zot etabli en *parent stock* farm Sesel, ki ava ed nou depan mwens lo bann fasile aletranze ou bann keksoz parey *hatching eggs* ki ganny anmennen dan sa *tray*. Mersi.

MR SPEAKER

Mersi. Onorab Tamboo ou kestyon.

HON LOUISETTE TAMBOO

Mersi Mr Speaker. Bonzour Mr Speaker. Bonzour tou dimoun a lekout espesyalman zabitan Cascade.

Minis, mon pa pe tro ganny en konpran en keksoz i parey i annan serten konfizyon deor parmi bann biznesmenn. Akoz i annan biznesmenn ki'n apros mwan depi yer swa e zot in fer mwan konnen ki dan lespas 2021 ziske 2023 zot in apros Minister e zot in montre lentere pou ganny en bout later laba pou fer sa bann devlopman parey e zot in ganny refize.

Me mwan mon ti a kontan konnen kwa ki diferan la ozordi ki fer ki li sa enn biznesmenn li i ganny aksepte e i ganny lese pou li fer son biznes laba? Mersi Mr Speaker.

MR SPEAKER

Mersi. Minis, *yes*.

MINISTER FLAVIEN JOUBERT

Mersi Mr Speaker. Non, mon pa'n resevwar okenn demann, par lenvestiser pou fer okenn devlopman parey dan sa landrwa. Si Onorab ou annan kopi sa demann ki ti ganny fer e repons ki'n mon ti donn ouswa Minister in donn sa dimoun anmenn devan e nou ava fer li piblik. I napa sa demann ki'n ganny fer.

(APPLAUSE)

MR SPEAKER

Mersi. Onorab Mondon.

HON TERENCE MONDON

Mersi Mr Speaker. Mon ti anvi zis demann Minis, si sa ki i pe dir i tou laverite ki ler i pe reponn sa kestyon i tou laverite. Akoz mon tann en kantite mansonz. Eski i tou laverite sa ki ou pe dir? Mersi.

MR SPEAKER

Mersi. Mon pa krwar poudir Minis i bezwen reponn si tou

repons ki laverite. Mersi Onorab. Minis, mon asire ki ou bann repons i laverite, Onorab Adelaide.

HON FRANCOIS ADELAIDE

Mersi Mr Speaker. Bonzour Mr Speaker, bonzour Minis avek ou delegasyon. Bonzour tou MNA, tou dimoun a lekout e bann zabitan Mont Buxton.

Mr Speaker, *partly* mon kestyon in ganny reponn, be selman zis i annan en pti *query* ki Minis i kapab reponn si i santi i kapab. Akoz mon pe tann nonm STC avek son lakonpannyen, eski ou okouran ti annan okenn lagreman in ganny sinyen ant STC avek sa lakonpannyen la aktyelman? Akoz se sa mesaz ki mon krwar pe al... *Thank you.*

MR SPEAKER

Mersi. Minis?

MINISTER FLAVIEN JOUBERT

Mersi Mr Speaker. Mr Speaker, kot i konsern STC, nou pa pou antre dan okenn laranzman ant en fermye ki nou pe konsidere ozordi, avek konpannyen STC aköz sa i en laranzman kontra ant zot 2. Annefe nou ankouraz bann laferm pou annan bann laranzman komersyalizasyon zot prodwi, avek bann antite

parey STC ouswa lezot parey bann lotel eksetera.

Me nou, letan nou'n get sa proze nou'n get li koman en proze ki pou ogmant prodiksyon, e en proze ki kapab *supply market* enkli STC avek prodwi. Me sa lyen avek STC pou mwan i en lyen ki tou fermye i annan avek sa lorganizasyon, ki en lorganizasyon nasyonal e tou fermye i aktyelman i annan en drwa pou li apros STC e trouv en solisyon komersyalizasyon prodwi avek sa konpannyen.

E mon pa trouv okenn rezon pou nou pa aksepte en proze an ka en dimoun i kapab annan en lyen avek STC. Aköz zis pou fer remarke, ki sa endividi ki nou pe dir i fer komers avek STC, i ti fer komers avek STC avan ti annan sa bann koze proze li, ti napa zafer lavyann poul, dizef poul eksetera.

Me i ti pe deza fer komers ek STC. So napa naryen ki'n sanze dan son relasyon avek STC. Alor nou kontinyen.

MR SPEAKER

Mersi Minis. Mon krwar ou'n fini. Nou a pran kestyon Onorab Pillay pou siplemanter.

HON SEBASTIEN PILLAY

Mersi Mr Speaker. Mr Speaker, i annan en *saying* ki dir ou; - *“you can fool some*

people sometimes, but you can't fool all the people all the time!".

(APPLAUSE)

MR SPEAKER

Onorab, eski ou pe dir, eski ou pe aplik sa pou Minis? Be dan sa ka *retract*. Mon pe ekout ou Onorab. Si ou anvi demann ou kestyon silvouple swiv lord.

HON SEBASTIEN PILLAY

Mersi Mr Speaker. Mr Speaker, mon pou swiv ou lord e mon pou *retract* sa ki mon'n dir.

MR SPEAKER

Ok, prezan ou kestyon.

HON SEBASTIEN PILLAY

Mr Speaker, mersi. Mr Speaker, devlopman sa ki nou pe koz lo la i sa bann defrisman lo sa bann later ki nou pe vwar la, *ok*? Vwala Onorab Georges e vwala pou Lepep Seselwa war Mr Speaker.

E prezan nou'n ganny dir ozordi poudir enn, *tender* ti pou fristre sa dimoun ki pe al fer sa proze. *Tender* ti pou fristre sa dimoun ki ti pe al fer sa proze. Pou lenformasyon piblik sa dimoun ki pe al fer sa proze ki dan sa proze i *Chairman Board STC* Mr Imtiaz Umarji, mon napa problemm avek li pou li ganny

son poze me selman tou dimoun i bezwen fer sir nou egal dan nou pei, nou tou nou egal dan nou pei.

So dezyenmman Mr Speaker, dezyenmman Mr Speaker, mon pe zis etabli bann fe pou mwan kapab demann mon kestyon.

Minis in dir nou poudir sa i obor Sant Biodiversite en *class 1 EIA* pa'n ganny fer, konsiltasyon avek piblik pa'n ganny fer, sa msye in ganny sa later pou li fer sa proze a repri tou fermye eksetera.

Prezan kestyon pou Minis, ou ou'n dir nou koumsa poudir *tender* ti pou fristre sa proze. Be akòz dan lespri latransparans ki ou Prezidan i prese, ki ou Gouvernman ki ti ganny mete la in prese - akòz dan lespri latransparans ou pa ti fer en lekspresyon *d'offre* piblik? E vi ki sa msye ou pe dir pou son proze ti sitan pli bokou ki pou tou dimoun, i ti ava ganny li dan en fason transparans e dan en fason kler e ki ozordi nou pa ti ava annan sa bann kestyon? Sa i mon premye kestyon Mr Speaker.

Dezyenmman, sa bann later pa'n ganny *subdivide* dan letan Gouvernman US, in ganny *subdivide* dan letan Gouvernman LDS san san en *tender* pou fer en faver en dimoun ki mwan mon krwar pe *sponsor* Gouvernman LDS e

ozordi Minis pe vin dir nou devan Lasanble.

Prezan Mr Speaker, kestyon pou Minis...

MR SPEAKER

Mon- Onorab, mon pa kapab permet ou fer bann lakizasyon k pa fonde ki mon pa konpran akòz ou pe fer. Ou annan en kestyon la, si oule lenformasyon lo sa kestyon demande, mon'n not en kestyon deza si ou annan en dezyenm kestyon poz li.

HON SEBASTIEN PILLAY

Mersi Mr Speaker. Ankò en fwa mon ava swiv ou lord. Minis, in dir nou poudir laprouvasyon pou sa proze in ganny donnen lo nivo son Minister, li osi li i met 2 sapo li, i met sapo Minis lanvironnman. Sa i en labatwar ki pe ganny fer obor en Sant Biodiversite.

Dan tou lezot landrwa SPGA in anpes okenn dimoun ki vin fer devlopman obor zot, Minister Lanvironnman in anpes dimoun ki vin fer devlopman obor lezot dimoun, akòz pou sa enn devlopman bann prosedir e bann keksoz ki'n ganny etabli e met an pals pa'n ganny swiv?

E akòz zot pe *allow* sa nivo prodiksyon ki sa dimoun pe al fer ki efektivman pou kre en *monopoli*, e touy larestan ban pti ferme la deor? Sa i

mon dernyen kestyon Mr Speaker.

MR SPEAKER

I fer dezyenm kestyon. Mersi. Minis ou repons. *Yes Minister*, ou repons?

MINISTER FLAVIEN JOUBERT

Mersi Mr Speaker. Mersi Onorab. Mr Speaker, mon ti a kontan fer kler en keksoz. Onorab in koz lo *tender* avek *expression of interest* pou later lagrikiltir, dir mwan kan dernyen fwa, mon pa konnen dan sa prosen deseni ouswa plis ki *tender* in deza ganny fer pou later lagrikiltir?

Pa zis mwan, i tou sa Minis ki'n vin avan mwan, pa'n fer okenn *tender* pou okenn later lagrikiltir ziska ozordi.

(laughter)
(**APPLAUSE**)

MINISTER FLAVIEN JOUBERT

Napa. I pa'n ganny fer. Alokasyon- alokasyon- in baze lo en *waiting list*, in baze lo en lalis priyorite, e i annan en ta dimoun in ganny later san ki okenn prosedir in ganny swiv e i annan in ganny tre vit osi. Alor, ou pa kapab akiz mwan konmkwa mon pa'n fer *tender* akòz *tender* pa'n zanmen ganny fer.

Lot keksoz Mr Speaker, *sponsorship*, mwan mon la pou *entertain* dimoun ki pe *invest* dan lagrikiltir. Mon pa enterese kot i tonbe, si *sponsor*, si pa *sponsor*, si ki i fer, deryer, me selman i pe vin avek en proze priyorite donn li en sans pou li bouze.

Aprouvasyon Mr Speaker, konsiltasyon in ganny fer, sa proze i annan *Planning approval*, e *Planning* i satisfè son lekò ki tou bann lazans ki sipoze konsènen in kapab fer son analiz e donn son aprouvasyon pou sa proze.

Alor pou nou sa proze i en proze priyorite, nou les sa proze bouz devan akòz i pou ed pei dan sekirite alimanter dan le fitir. E parey mon fer remarque i pa pou touy okenn dimoun akòz i deza annan en ta lespas lo *market*. I annan en kantite lenportasyon ozordi.

E sa proze son konpetisyon ki i pe fer se ki pe fer konpetisyon avek kalite prodwi ki ganny enpòrtè dan pei e mon espèkte ki sa i avareman donn nou en kalite prodwi ki pou permet nou *compete* avek bann prodwi enpòrtè.

Mon'n deza fer remarque dan lasanble Mr Speaker, ki kalite prodwi ki nou pe sorti dan nou bann fasilite ozordi Sesel, pa tou dimoun ki pare

pou pran akòz son kalite son standar.

Alor nou pe evize ki nou annan en fasilite ki pou donn nou en prodwi lo en nivo, ki kapab *substitute* sa ki pe vini sorti aletranze. E la prezan nou a kapab *compete* e nou a kapab redwir pousantaz sa ki nou pe konsonmen sorti aletranze. Mersi.

MR SPEAKER

Mersi Minis. Mersi Minis, pou ou partisipasyon. Mersi bann zofisye ki'n akonpany Minis e mon swet zot bonn kontinyasyon e bon kouraz dan zot travay. Bon depar.

Byen, parey mon'n dir nou pou retoun en pti pe an aryer pou nou pran detruwa size kominikasyon ki nou abitye pran premye.

Pou komanse Onorab Sebastien Pillay in demann mwan en *matter privilege*. Konsènen en lenformasyon ki'n ganny donner dan Lasanble. Onorab Pillay, ou kapab state ou *matter* - silvouple reste lo size.

HON SEBASTIEN PILLAY

Mersi Mr Speaker. Ankor enn fwa bonzour pou tou dimoun. Mr Speaker, mon *matter of privilege* i relate lo fonksyonman Lasanble e rol Lasanble, e lenformasyon ki ganny donner dan Lasanble. Par lefe ki mon'n vwar ki ou'n

sirkil 2 dokiman - enn en resi labank ki lo lapar parti LDS ki montre en peyman ki'n ganny fer pou sa *Fedrick Human Foundation* ki ti sa swadizan sponsor LDS pou zot *capacity building*.

Mr Speaker, le 26 Oktob 2023, mon ti bezwen ekrir Biro Eleksyon. Annefe Mr Speaker, mon ti anvi lo komansman demann ou pou *recuse* from sa *matter of privilege* aköz i konsern ou. E osi demann Deputy Speaker, pou pa *chair*. Aköz vi ki sa *matter of privilege* i konsern zot tou le de.

Me lefe ki nou napa sa potansyel pou nou fer sa bomaten, so, mon pou met sa devan Lasanble ozordi. E ou konsiderasyon, me mon ekspekte ki ou ava ziz li dan en fason *fair* ek transparan. Mon ti anmenn en *PNQ* devan Lasanble, sa ti a relasyon avek en *PNQ* ki mon ti anmenn devan Lasanble kot mon ti demande ki Polisi Gouvernman LDS nou fer travay politik pandan letan travay.

E dan sa konteks aköz ki Gouvernman ti decide fer en *workshop* lo konpanny politik pou fer serten aktivis LDS ki ti osi enkli bann travayer Servis Piblik kot *L'Escale* le 20 Oktob 2023, pandan ler travay. A sa moman Deputy Speaker, ki ti dan *Chair* Onorab Gervais Henrie ti refize les Vis-

Prezidan reponn serten parti mon kestyon.

E i ti dir "ki sa *workshop* pa'n ganny *funded* par Gouvernman me *was rather funded by the Friedrich Naumann Foundation*. So, in ganny finanse par *Friedrich Naumann Foundation* ki en lorganizasyon ki *foreign* e pa anrezistre Sesel. Prezan Lalwa Eleksyon i dir ou en parti politik pa devret aksepte direkteman oubyen en direkteman okenn kontribisyon donasyon sorti kot okenn *foreign individual* oubyen *foreign entity*, oubyen *body corporate* Mr Speaker. Sa mon ti ekrir *Electoral Commission*.

Ou ti okouran ki mon'n ekrir *Electoral Commission* depi le 26 Oktob 2023. I ti reponn mwan pou mwan poudir sa zafer in ganny *referred to* lapolis. Le 8 Novanm 2023, mon ti re ekrir ankor e lapolis ti dir mwan ki zot pe *investigate*. Tou sa letan personn ti napa sa bann resi. *Suddenly*, sa lannen en let date le 4 Zanvyè 2024 i aparet adrese avek ou Mr Roger Mancienne, *Party Leader* Linyon Demokratik Seselwa, ki konfirm en keksoz ki mon'n toultan dir ou met 2 sapo dan sa Lasanble, koman *Leader* LDS e osi koman Speaker.

Ki dir ou,

Dear Mr Mancienne, nou acknowledge resi dan nou account 248mil Rand (ZAR) pou peyman LDS Capacity Building.

Selman, ou Deputy Speaker, in dir nou poudir se sa fondasyon ki'n *fund* sa *capacity building*. E ou menm *provide* mwan prezan ek en resi labank MCB...

MR SPEAKER

State ou privilege silvouple.

HON SEBASTIEN PILLAY

So, mon matter of privilege se lekel ant ou ek Deputy Speaker, ki pe koz mansonz avek Lasanble Nasyonal?

(APPLAUSE)

MR SPEAKER

Mersi Onorab. Tenny ou mikro silvouple. Mersi. Premyerman, pou redir - mon'n ofer sa 2 dokiman pou Lasanble aköz mon santi poudir mon pa kapab les en keksoz ki fo ganny dir devan Lasanble si mon annan laverite ki mon kapab met a latansyon Lasanble. E se pou sa ki mon'n met sa 2 dokiman pou bann Manm Lasanble.

Dezyenm si i annan en diferans ant sa ki Deputy Speaker, ek sa ki mwan mon'n dir - mon pa kapab dir ki Deputy Speaker oubyen mwan in *mislead* Lasanble. Deputy

Speaker, ti reponn kestyon a se moman e mon pa konnen kan mon pa sir kan sa ti vini dan Lasanble. So, Deputy Speaker, in reponn kestyon ki ti devan li.

Mwan mon'n met fe ki mon ti annan semenn pase o moman ki sa ti leve dan Lasanble. E mon pa war okenn kontradiksyon. Mersi. Mersi. Nou pou *move on*.

(Interruptions)

MR SPEAKER

Order! Non, mon pa pe pran okenn point of order.

(Interruptions)

MR SPEAKER

No point of order. Onorab...

(comments off-mic)

MR SPEAKER

Onorab Pillay, aret kriye, aret enteronp Lasanble.

Onorab Esparon, Esparon i annan rapor...

HON REGINA ESPARON

Mersi ...

(comments off-mic)

MR SPEAKER

Onorab Pillay, mon pe donn Onorab Esparon laparol. Mon pe donn Esparon...

HON REGINA ESPARON

Mersi Mr Speaker.

MR SPEAKER

Onorab Esparon, ou rapor.

HON REGINA ESPARON

Mr Speaker, dan mon kapasite koman *Chairperson Caucus* bann Madanm, mon ti ava anvi prezant Lasanble avek rapor anyel travay nou *Caucus*. *Caucus* bann Madanm Lasanble i konpri tou madanm dan Lasanble lo tou le de kote latab, konpare avek bann Komite ki konpri 7.

E lannen pase nou Komite in travay. nou'n fer an tou 7 miting ordiner. Nou ti annan en rankont avek Sef Ziz pou nou diskite lo *Lalwa SADC Model Law lo Gender Base Violence*, e osi lo *Domestic Violence Act*. Nou ti annan en rankont avek bann Manm Lasanble Lazenés. E bi sa rankont se pou nou regarde ki bann Mosyon ki zot, zot pe travay lo la. E regarde ki mannyer ansanm nou kapab annan sa sinerzi ant nou Lasanble ek Komite Madanm e Lasanble Lazenés.

Nou'n osi dan parkour lannen pase, nou ti annan ek aktivite kot nou ti onor nou defen Manm Onorab Rosie Bistoquet. Nou ti annan en aktivite a lokazyon *Breast Cancer Day* avek bann madanm ki deza bann viktim

kanser. E sa aktivite ti fer isi kot Lasanble an konzwent avek nou *Health Committee* kot Lasanble isi.

E nou ti osi zwenn avek *Cancer Concern* ki ti partaz en pe travay ki zot pe fer pou ed bann madanm avek kanser tete.

A lokazyon 25 Novanm, kot nou onor, kot nou komemor sa *Gender-Based Violence Day* kont bann madanm kot ti annan en mesaz ki ti ganny lir dan Lasanble.

E osi diran lannen pase nou'n vwar kot bann madanm in anmenn 4 Mosyon. Mwan menm mwan mon ti anmenn en Mosyon pou demande ki Gouvernman pou asire ki tou landrwa travay i adopte en kiltir pli toleran e eksplisit san okenn diskriminasyon.

Onorab Kelly Samynadin ti anmenn en Mosyon avek bi kontinyen ankouraz nou bann zenn pou viv en lavi ki sen. E pou promot lespri pozitivite dan pei.

Onorab Vidot, ti anmenn en mosyon pou demande ki Gouvernman i fer le nesesser pou ki bann dimoun aze i viv dan plis dinyite.

E mon ti osi anmenn en Mosyon alokasyon Lasemenn Sourd pou demande ki *sign language* i ganny adopte koman en siny nasyonal, en lalang nasyonal.

Mr Speaker, lannen pase osi nou ti vwar kot nou ti annan en group Manm Parlman Madanm sorti *Zimbabwe* ki ti ganny sans vin vizit nou Lasanble. E sa ti le 3 a 8 Zen lannen pase, kot sa group madanm ti ganny sans zwenn avek ou menm. Ti ganny sans zwenn avek *Leader* Lopozisyon e *Leader of Government Business*.

E osi lo zot parkour sa *Benchmark Visit* ti anmenn zot kot Biro Komisyon Elektoral, pou regarde ki mannyer nou isi Sesel nou entegre bann madanm dan nou Sistenm Elektoral. E osi zot ti anvi konnen ki mannyer nou, nou pe dil avek koripsyon dan Sesel. E sa group madanm ti enterese, e zot ti ganny en rankont avek Mrs May De Silva kot ACCS. Nou ti annan sa lesanz pou regarde ki mannyer i partaz en pti pe ki mannyer zot, zot fer dan *Zimbabwe*. E ki mannyer nou, nou pe fer isi Sesel.

Mr Speaker, avek sa 2 parol mon annan plezir pou prezant Lasanble avek sa rapor. E nou pou annan nou rapor anyel. E nou pou annan osi sa rapor lo kote vizit bann Madanm Zimbabwe ki pou osi en *addendum* avek sa rapor 2024, ki mon annan gran plezir pou prezant avek Lasanble. Mersi.

MR SPEAKER

Mersi Onorab. Parey labitid nou a pran ou rapor. Mersi bokou. Prezan mon pou pran pwen, mon pou pran pwen nominasyon Manm pou Komite lo Deklarasyon Byen. Eski bann *Caucus* i pare pou donn mwan zot nominasyon? Lo kote *LDS*, Onorab Esparon?

HON REGINA ESPARON

Mersi Mr Speaker. Lo kote *LDS* nou annan nou 5 Manm ki pou al lo sa Komite. Nou annan Onorab Romain, Onorab Naidu, Onorab Philip Arissol, Onorab Andre, e mwan menm mwan Onorab Esparon. Mersi.

MR SPEAKER

Mersi. Lo kote *US*, Onorab Lemiel?

HON SYLVANNE LEMIEL

Mr Speaker, nou napa Manm ki pou partisip lo sa Komite. Mersi.

MR SPEAKER

Tre byen. Dan sa ka bann Manm ki'n ganny nonmen i a form sa Komite. E zot a kapab antreprann travay ki'n ganny mete devan zot. E Clerk i ava annan responsabilite pou li *call first meeting*. Mersi. Onorab Pillay, wi?

HON SEBASTIEN PILLAY

Mersi Mr Speaker. Lo en pwen prosedir anba *Order 8*.

MR SPEAKER

Wi.

HON SEBASTIEN PILLAY

Semenn pase ou ti dir koumsa poudir ou'n prepar en *terms of reference* pou sa Komite. E dan nou *Rules of Procedure for Committees*, se sa Komite ler i zwenn pou premye fwa se li ki determin son *terms of reference*. Eski ou kapab eksplik nou lo ki baz alors ki se ou ki'n prepar sa *terms of reference*? E akòz sa fwa si la ou pa'n mansyonnen dan sa premye miting ki pe ganny fer ki zot a konsider sa *terms of reference* ki ou'n swadizan met devan?

Eski ou pe dir ek nou la Lasanble ozordi bomaten ki zot pou pran sa *terms of reference* ki ou, ou'n fer san ki zot, zot pou desid lo la? Savedir sa i montre ou ki sa i pirman politik Mr Speaker.

MR SPEAKER

Mon'n fer kler. E dan dokiman ki mon'n sirkil avek bann Manm, mon'n dir sa i en propozisyon pou fasilite komansman sa Komite. Sa Komite i annan toutafe liberte pou li desid lo *terms of reference*. Zot kapab rezet sa ki'n ganny met devan zot. Zot kapab adopte, oubyen zot

kapab amande. E mon krwar sa i annord avek Lareg Komite. Onorab Esparon?

HON REGINA ESPARON

Mersi Mr Speaker. Mr Speaker, mon ti anvi zis klarifye poudir mon'n tann dir en Komite Madanm. Pa en Komite Madanm sa, parske i annan zis mwan madanm lo sa Komite. E dezyenmman, mon ti anvi pran sa pwen poudir sa ki ou ti fer ti zis en propozisyon.

Letan Komite i ava zwenn, nou, nou ava deside lo ki *terms of reference* ki nou pou adopte. Mersi.

MR SPEAKER

Thank you. Mersi pou fer kler.

HON SEBASTIEN PILLAY

(Off-Mic)

MR SPEAKER

Onorab Pillay nou pa kapab kontinyen zis enteripsyon Lasanble. Nou pou prosede. Madanm Clerk, nou annan *First reading en Bill*.

MADAM CLERK

Mersi Mr Speaker. Bomaten nou pe fer *First Reading* pou; *Non-Bank Credit Granting Institutions Bill, 2025*.

This Act may be cited as the Non-Bank Credit Granting Institutions Act, 2025 and it

shall come into operation on such date as the Minister may, by notice published in the Gazette appoint. Mersi Mr Speaker.

MR SPEAKER

Mersi Madanm Clerk. Nou a prezan rebran pou sesyon kestyon. E Madanm *Hansard Reporter* i ava apel Minis e delegasyon. Bonzour Minis pou Later e Lozman Mr Billy Rangasamy. Bonzour Mr Jitesh Shah *CEO Seychelles Infrastructure Agency* Mr Jude Florentine. Sekreter Prensipal pou Lozman Mr Denis Barbe Sekreter Prensipal pou Later.

Byenveni zot tou pou partisip dan kestyon. Nou a komanse, Manm, Minis ek son delegasyon i a remarke nou annan en long lalis 12 kestyon ki normalman leka pou ler Minis Later e Lozman i vin dan Lasanble. Nou pou sey fer mannyer sey fini sa dan letan ki'n *allocate* pou *question time*. Mon remarke selman ki en kantite sa bann kestyon i lo proze distrik spesifik.

Alor, pou kestyon letan mon pou limit *supplementary question* lo sa bann proze spesifik. Manm ki'n demann kestyon i a ganny sans ganny son *full* repons. Mon a sey donn en pti pe plis letan bann kestyon ki pli zeneral, ki tous tou distrik. Nou a komans

avek Limero 113, dan non Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis ek *PS* e *CEO SIA*. Kestyon i lir konm swivan;

Swivan en miting ek Lotorite Distrik lo size konsernan devlopman later *ex-Sacos* leve par zabitan sa rezyon, eski Minis i kapab dir ek sa Lasanble:-

- a) Ki zot lentansyon ek sa later?
- b) Ki bann lezot opsyon ki son Minister pe konsidere? Mersi.

MR SPEAKER

Mersi Onorab. Minis, ou repons?

MINISTER BILLY RANGASAMY

Mersi Mr Speaker. Mersi Onorab pou ou kestyon. Mr Speaker, avan mon demare, mon anvi dir bonzour en gran bonzour menm tou Manm Lasanble. Tou bann zabitan mon krwar Mont Buxton ki la avek nou dan *Gallery*. E osi nou bann dimoun ki pe ekout nou deor.

Mon oule profit sa lokazyon pou vi ki demen i nou Lafet Konstitisyon, pou swet zot tou en bonne fet Konstitisyon. En bonn *fête Dieu* osi Zedi. E ki zisteman

Bondye i a donn ou lagras dan nou deliberasyon bomaten pou fer en bon travay dan lape e larmoni.

Mr Speaker, parey Onorab li osi i konnen Gouvernman ti aste sa bann kare Beolière - bann kare later Beolière. Bann kare later i konm swivan;

B157, B261, B262, B193, B194 - avek sa koz plizyer lannen pase avek bi pou fer en proze lakaz abordab lo sa teren.

Swivan vizit Prezidan Ramkalawan Lasinn an 2024, en lakor ti ganny sinyen pou asiste Gouvernman Sesel atraver en don kot 72 *Unit* lakaz 9 lo 8 *unit* pou ganny konstri lo sa teren *ex-Sacos*. E en lot *batch* 64 *unit* lakaz dan distrik Anse Royale. Sa total 136 *unit* lakaz Sesel i anba en sel proze, e en sel don avek Gouvernman Sinwan. Sa i tre enportan pou nou note silvouple.

Lekip *design* Gouvernman Sinwan in vizit Sesel pou ganny plis lenformasyon teknik boner sa lannen. E mon vreman kontan pou enform Lasanble ki *design* i bokou avanse. Avek plizyer diskisyon ki nou'n fer avek Lotorite Distrik, Minister pe reget lafason pou akse sa sit direktman - sa sit Beolière direktman an sortan lo gran semen piblik.

Atraver potansyelman 2 kare later, enn i pou en konpannyen later prive ki nou pe fer bann negosyasyon avek. E lot i en later pou Gouvernman. Nou pe get meyer fason pou nou kapab fer en akse ki feزاب, an menm tan ki kout en pri rezonnab. Anvi ki proze e diskisyon i lo en staz tre avanse, Minister pe pourswiv son plan pou realiz sa proze lo sa sit parey in planifye osi lo sa sit Anse Royale.

Mr Speaker, an se moman lekip *design* Gouvernman sinwan in fini travay parey mon'n fer resorti lo en konsep. E pe finaliz detay sa proze tre byento. E mon aprann ki atraver Minister *Foreign Affairs* ki swa lekip pou Sesel byento osi pou vin partaz ek nou lenformasyon kot zot in arive lo proze. Mersi Mr Speaker.

MR SPEAKER

Mersi Minis. Onorab, siplemanter?

HON EGBERT AGLAE

Minis, mersi. Mersi pou ou larepons kestryon ki mon'n demann ou. Minis, nou ti zwenn dan en miting avek *DA* ansanm ek mwan, kot nou ti pe diskrit en pti gin lo serten konsern ki bann zabitan dan sa rezyon ti mete anvi ki sa landrwa i annan en pe laspe

komersyal *tourism*, *ok*. I annan *guest house* e osi i annan bann devlopman *touris* ki bann rezidan ki annan propriyete pe mazin fer ki zot soumet osi.

Enn bann konsern i lanplè sa proze ki kapab koz serten *disturbance*. Eski dan zot plan, zot pe mazin osi laspe sekirite sa landrwa angiz ki magnitud nou pe koz apepre 70 *unit* la dan sa landrwa lo sa bann kare later. Sa i enn.

Dezyenman, ou'n dir pou dir ou pe konsider pou annan en *alternativ access* anvi ki sel akse pou mont dan sa landrwa, sa ki nou apel Beolière *Aqua Road*. I *very narrow* i preski pa kapab pran 2 transpor ansanm. So, kan petet zot pe mazin vin ek en plan final pou bann zabitan kapab konpran en pti gin kote semen pou pase? E osi ki bann lefe ki kapab vin avek letan pou annan konstriksyon semen?

E dernyen Minis, eski ou Minister i pare petet pou angaze pou zwenn avek bann zabitan konsernen sa rezyon, pou osi met bann fe ki la ou pa pe kapab donn tou detay - petet met bann fe, pou annan en balans kot wi, nou bezwen lakaz. Me osi nou konsernen avek pwennvi bann rezidan ki kapab reste dan sa landrwa ki kapab santi zot pe ganny afekte? Mersi.

MR SPEAKER

Mersi Onorab. Minis, ler ou pare.

MINISTER

BILLY

RANGASAMY

Mersi Mr Speaker. Mersi Onorab, pou ou kestyon siplemanner. Onorab, parey ou menm ou'n fer resorti, i annan ankor en pe travay teknik ki nou ankor pe fer, sirtou pou sa semen li menm, vi ki nou'n sanz nou stratezik pas dan sa pti semen etrwat parey ou ti pe fer resorti. Nou pou sorti lo grannrout li menm.

Sa travay i ankor pe demare, *survey* pe fer serten travay pou nou kapab ganny *best topo, best alignment*. Nou pe negosye avek sa konpanyen, sa propriyeter prive osi pou nou vwar ki meyer solisyon nou kapab gannyen. Nou sipoze ganny bann detay final avek *at least concept* sa enn tre byento avek lekip Sinwan.

So, nou ava dan en pozisyon tre byento. Mon espere dan bann prosenn mwan pou nou kapab pli byen pare pou nou fer sa rankont avek bann zabitan si i neser. Mon napa problem pou fer sa, mon ava eksplik zot lanplè problem, bann mezir ki nou pe pran, bann stratezi ki nou pou pran osi lo size alokasyon, lo size sekirite, lo size akse. Tousala nou ava met dan son

totalite, dan son konteks zeneral. E nou a kapab fer sa konversasyon. Mersi Mr Speaker.

MR SPEAKER

Mersi Minis. Mon pou pran en siplemanter, Onorab Pillay in lev lanmen premye. Ou kapab demande.

HON SEBASTIEN PILLAY

Mersi Mr Speaker. Mr Speaker, siplemanter i *straight forward*. Dan dokiman Bidze i mansyonn konstriksyon 69 *unit* Beolière So, i en *revision to* 64 la? Si ou kapab klarifye. Ou'n mansyonn 69 *unit* pou en sonm R117 milyon. E prezan son *budgeting* ti sipoze en *foreign grant* an 2025.

Premye porsyon i 104.8 milyon. E dezyenm porsyon i vin an 2027 - R12.1 milyon. *Now*, eski nou kapab ganny en konpran egzakteman ki pe arive ek sours finansman? Si nou ankor lo sa 117 milyon or eski nou'n sanze? E eski sa finansman pou materyaliz sa lannen la? Akoz sa ki ou'n dir mwan i bezwen al *go through Procurement Process* Lasinn *before it comes back, which means* i pa pe materyalize *within* sa lannen.

So, *that means* ki sa *forecast* 2026 kot napa okenn larzan i bezwen sanze. So, eski ou kapab klarifye ek nou, zis pou nou konnen ki mannier

sa i riske kapab afekte lezot proze dan lezot distrik *as well*? Mersi Mr Speaker.

MR SPEAKER

Mersi Onorab. Minis, ou annan klarifikasyon?

MINISTER

BILLY

RANGASAMY

Mersi Mr Speaker. Mr Speaker, mon sizere avek ou permisyon ki CEO Jitesh i ava donn ou sa bann detay an relasyon ek sa kestyon Onorab.

MR SPEAKER

CEO?

CEO JITESH SHAH

Mersi Mr Speaker. Mersi Onorab, pou ou kestyon. Onorab, an se moman nou ankor pe travay avek menm Bidze ki nou annan. Sa Bidze ti ganny met devan *basically from* bann *designer* sinwan, ler zot ti komans travay lo *design*. E sanmenm sa sif ki ti ganny mete dan Bidze. Sa ki mon kapab dir zot pou le moman, *in fact* nou dan staz preparasyon Bidze pou sa 3an ki vini la. I annan serten lazisteman ki pe ganny fer.

Solman i enportan osi pou mwan eksplike poudir i en keksoz ki mon osi mon'n aprann ase resaman. Aparaman ler i annan bann proze Sinwan i annan *Grant*

sorti pou bann proze Sinwan sorti Lasin, fason ki bann *disbursement* i ganny fer i 90poursan sa larzan i ganny transfer dan komansman proze.

So, sa i bezwen dan *Budget Book* ganny *captured* koman sa larzan pou antre enn fwa. An se moman 90 percent of it i la an 2025. E dapre program ki nou, nou pe travay avek baze lo *timelines* ki sa group teknik sorti Lasinn in donn nou, nou pe ekspekte *award* sa kontra sa lannen avek en kontrakter Sinwan.

Well zot, zot pe ekspekte *award* sa lannen avek en kontrakter Sinwan, ki savedir poudir sa larzan pou ganny transfer Sesel sa lannen menm. Sanmenm sa i pe ganny *captured* dan *Budget Book* parey i ete. I pa vedir depans pou ganny fer tou sa lannen. So lanmenm la kot nou pe travay avek Minister Finans pou nou aziste dan lannen prosenn lo kote *expenditure*.

Selman larzan i vin en sel 90 poursan ler proze pe komanse. Sa i sa ki nou'n ganny eksplike par Minister Finans. Lo tou le de proze.

MR SPEAKER

Mersi CEO. Prosen kestyon 114. Onorab Egbert Aglae.

HON EGBERT AGLAE

Mersi Mr Speaker. Kestyon i lir konm swivan;

Eski Minis i kapab dir ek sa Lasanble ki zistans diskisyon avek Departman Lapolis pou pran posesyon sa 3 lakaz lapolis ki a permet en redevlopman lo sa sit enportan sa nou pe koz Port Glaud. Mersi.

MR SPEAKER

Mersi. Minis, ler ou pare.

MINISTER BILLY RANGASAMY

Mersi Mr Speaker. E mersi Onorab pou ou kestyon. Parey ou konnen Onorab sa sit in ganny idantifye koman en sit stratezik dan nou *draft Land Use Plan*. Minister, sa ti zis sa kote kordgard Port Glaud. Minister ti komans fer en travay konzwent avek lapolis e Lotorite Distrik pou enn ; -konn tou bann lokater lakaz. E dezyenm tonm dakor lo en plan re lokasyon.

Swivan travay ki Minister ti'n antreprann, tou le 3 sa bann *unit* e lasanm ti'n ganny okipe par bann sivilyen. Pou plizyer lannen se bann sivilyen ki la. Re lokasyon ti pou mars an *parallel* avek plan redevlopman Foret Noire, Vilaz Lanmitye. Malerezman Mr Speaker, sa plan pa'n mars parey nou ti'n planifye

prensipalman akòz enn de kontrent.

Alor Mr Speaker, i pou nesese ki nou re demar sa konversasyon avek lapolis e Lotorite Distrik pou ansanm aliny nou stratejik pou re devlop sa sit parey nou pe fer bann size redevlopman dan diferan distrik. Mersi Mr Speaker.

MR SPEAKER

Mersi Minis. Siplemanter Onorab Aglae.

HON EGBERT AGLAE

Minis mersi pou larepons. Minis premyerman, vi ki sa size osi in en pe letan ki nou'n diskite lo sa size, eski petet dan pwen final, lapolis li menm li in kapab pronons son lekor anvi ki serten laspe *maintenance* avek sa landrwa ki ankor pe okipe se *MLH* ki'n bezwen antre. E in annan moman letan kot *Local Government* in bezwen antre pou sey ed serten sityasyon anvi ki sa landrwa i en landrwa ki *prone* pou *flooding* letan i annan linondasyon ek bann problem *sewage*.

E dezyenmman, dapre *Land Use Plan* ki ti ganny osi revize, ki sa later li menm li i en *mother parcel* ki enkli sa ki Ladministrasyon Distrik i lo la an se moman. Eski zot pe konsider pou annan serten *subdivision* ki si demen anba

petet bann proze kot sektè prive ansanm avek Gouvènmman i kapab zwenn konzwent.

Letan moman i apropiye ki sa sit i ganny evakye i ganny tire sa bann rezidans kapab antre an serten lagreman ekonomik ki ava benefisye distrik. E nide ek zabitan ki mon'n koz avek se kre parey en sant, en *building* ki ava annan bann diferan servis ki nou napa dan distrik.

So eski zot pe mazin konsider dan sa laliny osi ki sa later i ava annan en *subdivision* a lavenir, pou permet sa proze kapab arive ? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Yes. Mersi Mr Speaker. Mersi Onorab pou ou kestyon Siplemanter. Mr Speaker, *PS* Barbe i akote mwan, *PS* pou later i a ed nou ganny en pe leklersisman anliny avek sa kestyon siplemanter.

MR SPEAKER

Thank you. PS Barbe?

PS DENIS BARBE

Mersi Mr Speaker. Mersi Onorab, pou ou kestyon. Travay ki nou ti pe fer ek lapolis se ki ti pou finalman ler

nou fini fer sa bann amenazman nou demoli sa *building*. E nou fer lespas pou nou kapab fer redevlopman parey ou'n dir dan ou kestyon Onorab. Wi, pou annan nesesite baze lo *upper* devlopman ki pou fer dan sa landrwa pou fer li an konformite avek laspirasyon distrik osi pou annan en se pou *subdivide*.

E pou la senp rezon ki *Planning* ti'n met li koman sa stratezi aköz i annan potansyel pou kapab enkli en *building*, en *center* pou nou kapab met tou bann aktivite ki distrik i annan laspirasyon pou anmenn serten servis pre avek lakominote. So, sa i en keksoz ki nou pe get ladan an menm tan avek Lotorite *Planning one* ki nou fini *sort out* sa bann *sitting tenants*. *Thank you.*

MR SPEAKER

Mersi PS. Nou ava avans lo prosen kestyon 115, Onorab Sylvanne Lemiel.

HON SYLVANNE LEMIEL

Mersi Mr Speaker. Bonzour Minis avek ou delegasyon, e tou dimoun a lekout. Mon kestyon i konm swivan ;

Eski Minis i kapab dir ek sa Lasanble konbyen dimoun ki pe ganny asiste avek *part rental*. E konbyen fwa ki Komite i zwenn pou pran

desizyon lo sa bann aplikan? Mersi.

MR SPEAKER

Thank you.

MINISTER

BILLY

RANGASAMY

Mersi Mr Speaker. Mersi Onorab pou ou kestyon. Nou ti a kontan enform sa Lasanble ki ziska mwan Avril 2025, nou annan anviron 243 aplikan ki nou pe ede anba nou Program *part rental* tou le mwan. Sa Komite *Part Rental* i zwenn tou le 2 semenn, e an prensip nou pran desizyon lo anviron 30 a 35 ka par sesyon travay. Mersi Mr Speaker.

MR SPEAKER

Siplemanter Onorab.

HON SYLVANNE LEMIEL

Mersi *Minister*, pou ou larepons. *Short and brief*. And mon ti a kontan konnen Minister petet letan nou pe koz lo *part rental*, konbyen letan ki en dimoun i kapab reste lo *part rental*? Parey la dan ou 200ekek aplikan ki ou annan, ki pli long letan ki sa bann aplikan i annan lo *part rental*?

E apepre osi mon ti a kontan konnen konbyen larzan Minister pe depanse lo sa 223 dimoun ki ou'n nonm mwan poudir 243 dimoun ki pe ganny asiste pou le moman? E ki pli o lasistans, e

ki pli ba lasistans ki sa bann dimoun pe gannye? Mersi.

MR SPEAKER

Mersi Onorab.

MINISTER **BILLY RANGASAMY**

Mersi Mr Speaker. Mr Speaker, avek ou permisyon mon a demann PS Lakaz, PS Jude pou donn sa bann klarifikasyon lo kekyon Onorab. Mersi.

MR SPEAKER

PS, ou annan laparol.

PS JUDE FLORENTINE

Mersi Mr Speaker. Mersi Onorab, pou kekyon. Onorab, mon vin lo sa dernye parti ou kekyon ki konsern lakantite larzan ki nou pe depanse lo sa 243 dimoun pou mwan Avril. I ariv en total R1.4 milyon, pou an term lasistans pou sa mwan en. Mon pa pou dir son *amount* i varye pandan diferan mwan. Selman pou Avril 243, in ariv nou 1.4 milyon.

An sa ki konsern kantite letan pou ki en dimoun i vin lo *part rental* - normalman nou komans avek en alokasyon 6 mwan. Sa i ganny *renewed*, i ganny *renewed* si nou war sa dimoun pa ankor ganny asiste. E la foudre fer kler ki i annan serten kriter ki en dimoun i bezwen *meet* avan ler i kapab *apply part rental*. Par

egzanp i bezwen dan lanplwa. I bezwen pe kontribye HSS, omwen 3 mwan.

I bezwen annan lagreman *rental* avek sa dimoun ki i pe lwe lakaz avek, ensidswit. I annan sa bann kriter ki nou bezwen *meet*. E nou war parey nou i bezwen eksplik ou balans lo lakantite sonm ki nou depanse i varye. 243, i en pti pe pli o pou sa lannen. E i tou depan ki kantite letan sa dimoun i ganny asiste avek en prodwir *housing* ki i reste lo *part rental*, en ?

Akoz pa toultan ki dan lespas 6 mwan nou kapab rod en solisyon pou sa dimoun, *ok* ? So, i pou varye i annan ki onnetman i annan en pe plis ki 1 an i *renew*. E la mon ti oule lans lapel ek bann dimoun ki ler zot ganny zot lasistans pou premye 6 mwan, dan sa let nou *remind* zot pou zot vin fer *renewal* avan i *expire*. Me nou war poudir i annan bokou dimoun pa fer sa.

E apre zot ganny konplikasyon pou kapab repase. E petet *Board* pa ankor zwenn dan sa lespas 2 semenn, e i kre en pti pe lenkonvenyans pou zot avek zot lokater prensipal.

MR SPEAKER

Thank you. Yes, i annan pwen ki pa'n klarifye Onorab?

HON SYLVANNE LEMIEL

Wi. Mr Speaker, mon ti a kontan i klarifye. Savedir ou pe dir mwan pli long letan ki ou annan la dan sa 243, i 1an?

PS JUDE FLORENTINE

Non.

HON SYLVANNE LEMIEL

Sa ki mon ti pe demande. Ki pli kourt letan, ki pli long letan. Ou'n dir mwan 6 mwan *renewable*. Me ki pli long letan la lo ou lalis i annan en dimoun ki lo *part rental*? Mersi.

PS JUDE FLORENTINE

Mersi Onorab. Mersi Mr Speaker. Mr Speaker, pou sa lakantite pli long letan, mon napa sa lenformasyon toudswit la. Me selman mon kapab dir ou i annan menm dimoun ki pa gannyen 6 mwan - I ganny 3 mwan, akòz parfwa i annan serten *investigation* ki zot bezwen fer pou gete si sa bann lenformasyon zot pe donn nou i vreman korek.

Akòz nou war poudir i annan bokou aplikan ki vini, e zot kasyet lenformasyon avek nou. E parfwa nou vwar zot bezwen lasistans, me selman nou pa oule donn zot en laranzman 6 mwan. Akòz nou oule fer *investigation* pou veye si vre sa lenformasyon i korek. Par egzanp zot kasyet serten

lenformasyon ki zot partner i annan eksetera.

So, 6 mwan i *the minimum*. Me selman i annan ki par lao 1an. Me selman mon a rod sa lenformasyon egzakt pou fer ou konpran. Konnen lekel sa dimoun ki annan pli o bokou letan lo lasistans. Mersi.

MR SPEAKER

Thank you, PS. Onorab Vidot?

HON AUDREY VIDOT

Mersi Mr Speaker. Bonzour Minis, ek ou delegasyon. Bann viziter dan *Gallery*, tou dimoun ki a lekout. En bonzour spesyal pou zabitan Roche Caiman. Mon kestyon pou Minis. Eski ou kapab dir nou petet ki kantite, eski zot annan laplikasyon ki'n ganny refize? Kantite ki zot in refize resaman. Ki rezondet ki zot in refiz sa bann laplikasyon?

E mon dezyenm kestyon, letan ou'n dir poudir zot bezwen dan en lanplwa. I annan de ka kot sa dimoun i dan en lanplwa, i ti deza pe lwe en lakaz. Me pou rezon finansyel, i pe ganny difikilte. Kekfwa son laplikasyon i resan. Eski zot fer serten leksepsyon pou analiz ka sa dimoun ki si i pe demann en lasistans *part rental* zot kapab aprouve, oubyen si zot annan en kriter spesifik ki i annan en dele letan ki i bezwen pe

kontribye anver son *Home Savings Scheme* avan ler i kalifye si ou kapab eklersi sa? Mersi.

MR SPEAKER

Mesi Onorab. Minis?

MINISTER **BILLY RANGASAMY**

Mersi Mr Speaker. Mr Speaker, *PS* Jude i byen plase pou klarifye sa bann pwen ki'n ganny fer resorti. Mersi bokou.

MR SPEAKER

PS?

PS JUDE FLORENTINE

Mersi Mr Speaker. Mersi Onorab pou kestyon. Onorab, enn bann parey mon'n eksplik ou i enportan ki bann dimoun i dan lanplwa pou kapab kontribye pou zot kapab fer zot laplikasyon. E nou *still* demann zot ki zot annan omwen 3 mwan kontribisyon *HSS*. Akoz bokou dimoun parfwa i vin kot nou, kekfwa zot napa en *account*. So, nou tant ankouraz zot pou zot ouver en *HSS Account*, e komans fer en kontribisyon 3 mwan pou kapab asiste.

Me selman byensir Komite i an fleksibilite, me an ka ki i annan bann ka parey ou pe dir en dimoun in sanz lanplwa ouswa in perdi lanplwa, i annan bann konsiderasyon ki ganny pran

pou ki nou kapab asiste sa bann dimoun tanporerman. Me selman la i en ka ki petet nou pa pou donn li pou 6 mwan, Komite i ava donn li en peryod 3 mwan pou li kapab regilariz son lanplwa e apre kapab ganny sa lasistans. Mon pa konnen si mon'n reponn tou ou kestyon.

MR SPEAKER

Klarifye Onorab.

HON AUDREY VIDOT

Yes, i annan en klarifikasyon, apre i annan enn pa ankor reponn. Mon klarifikasyon se ki sa dimoun li i deza dan en lanplwa li. Me selman i napa sa 3 mwan. E i pe ganny demande pou li sorti, e i bezwen en sipor pou li kapab ganny *part rental* pou li rod en lot landrwa. Sa i enn. Apre kantite ka refize laplikasyon. Mersi.

MR SPEAKER

PS?

PS JUDE FLORENTINE

Mersi Mr Speaker. Mersi Onorab. Onorab, dan bann ka koumsa parfwa Komite i pran en pti leksepsyon. Zot war poudir sa *case* i *genuine* zot *allow* sa dimoun pou kapab komans ganny lasistans parfwa menm si i pa ankor komans kontribisyon. Me selman an zeneral, nou

ankouraze ki en dimoun i fer omwen 3 mwan kontribisyon.

Me selman dan en ka kot en dimoun in perdi son lanplwa, Komite i kapab pran en konsiderasyon pou asiste en ? An sa ki konsern ou 2enm parti ou kestyon ?

HON AUDREY VIDOT

Ki kantite ka ki'n refiz laplikasyon?

PS JUDE FLORENTINE

Wi, *ok*. Ka refize i ase - mon krwar i ase minim an zeneral. Akoz nou *process* anviron apepre en 30enn laplikasyon tou le 2 semenn ler Komite i *process*. E bokou fwa i annan bann ka kot bann dimoun i ganny refize, akoz petet zot pa pe *meet* kriter. E par egzanp dan Polisi i dir poudir ler en dimoun i fini fer tou son bann depans mazer ki i bezwen, i pa kapab reste li plis ki R2000 dan son lanmen, *ok* ?

So, i annan ka ki nou war ler nou fer sa matematik lo bann reveni ki sa dimoun i annan, e son bann depans, ou war poudir i annan plis ki sa R2000 *threshold* ki nou dir. E dan sa ka, sa laplikasyon pa ganny aprouve.

Osi byen i annan bann ka kot ti annan lenformasyon ki bann dimoun i donn nou i pa konplet. Ouswa bann manm i aprann poudir sa bann dimoun i annan lezot

mwayen *income* ki zot pa deklare. E la parfwa nou donn sa 3 mwan pou nou *investigate*.

E parfwa i sitan kler ki Komite i decide ki zot pa pou asiste aköz sa dimoun pa pe *meet* sa bann kriter. Ouswa i annan ka kot sa bann dimoun i fer laplikasyon me selman i napa en lagreman avek sa dimoun ki i pe lwe lakaz avek. Aköz sa dimoun pa anvi pran par dan sa *scheme*.

E la byensir son laplikasyon pa pou kapab ganny *process further*.

MR SPEAKER

Mersi *PS*. Onorab William. Eskiz mwan, Minis i oule azout keksoz. Minis?

MINISTER

BILLY

RANGASAMY

Wi Mr Speaker. Mon ti a zis petet pran sa lokazyon pou azoute ki sa solisyon *part rental* - sa *scheme*, i en keksoz tranzitwar. I tou sa bann aplikan tou sa bann ki nou pe ede zot lo lalis lakaz ki lentansyon se evantyelman zot antre dan zot program lakaz. Zot ganny zot *unit* evantyelman.

Alors, tou lentansyon i ede me nou konpran zot pe ganny serten difikilte. E nou'n menm kouver en pti pe plis, dan lepase ti pe kouver 15 mil. Nou'n ogmant sa nou'n fer li

vin 19mil *household income*. Nou'n ogmant kapasite sorti 45 pousan pou fer li vin 55 pousan pou reflekte en pti pe sipor ki nou anvi donnen.

E an prensip par egzanp mon a donn zot en pti pe bann sif. 2023, nou ti pey 198 aplikan ka ki nou'n ede ki ti kout apepre 8.2 milyon. 2024. Ler nou'n ouver sa posibilite pou ede en pe plis ki nou santi zot pa ti ankor vremen annan en solisyon lakaz pare pou zot, nou'n donn led en pe plis dimoun.

E sa in kout Gouvernman, in kout Bidze environ, in kout environ R13milyon - 13.7. E 2025, parey PS Jude ti pe fer resorti, ziska la Avril nou annan 243 ka. E nou'n depans environ R5 milyon. Tousala i bann solisyon pou nou sey ed nou bann dimoun, aköz nou dezir prensipal se o pli vit posib met zot dan zot *unit*; amelyor zot kondisyon lavi. E donn zot, zot dinyite.

Alors, sa *part rental* i en solisyon enterim. E nou dezir se akseler nou program lakaz touzour pou nou kapab ed sa bann dimoun. Sa mon ti anvi fer resorti Mr Speaker. Epi en pwen ki PS Jude petet pa'n touse, se en pti pe sa problem ki nou gannyen ek bann kliyan. Aköz ki mannyer sa program i marse, larzan i ganny peye direktman pa

avek sa aplikan lakaz, avek *landlord*.

E fodre i annan en kontra an plas, pou keksoz ganny fer annord pou nou kapab kontrol sa byen. Parski i kapab annan labi si non. Me pa toultan ki sa *landlord* antre zot pare pou annan en kontra. So, sa par ler i donn Komite en pe konplikasyon. E parfwa se sa ki annan bann *refusals*. An prensip sa Komite i annan 7 Manm. Son *Chairman*, i pa en... son *Vice Chair* i sorti Minister. Son *Chairman* i en lot Minister.

So, en Komite ki endependan, e mwan koman Minis par egzanp mon pa enterfer ditou dan zot bann desizyon. E zeneralman, mon santi ki i enportan ki nou konpran poudir sa zafer i en keksoz ki en sipor entermedyer. I pa en solisyon final, mon ti anvi fer resorti sa Mr Speaker.

MR SPEAKER

Mersi. Mersi Minis. Onorab William, ou kestyon.

HON WAVEN WILLIAM

Mersi Mr Speaker. Mon swet labyenveni Minis avek ou delegasyon. Minis, mon anvi ou dir ek Lasanble, eski zot in war en logmantasyon dan laplikasyon tou le-z-an?

E dezyenmman, par lefe baze lo bann leksperyans nou

pe gannye dan distrik sirtou vizavi bann *scheme* ki dan lefase in ganny kre, epi ou vwar poudir i vin serten *some sort of* en fardo.

Mon anvi konnen avek zot si zot pe osi mazin annan en pli bon lantretyen avek bann *housing owners* vizavi lwe lakaz ? Akoz ki arive se ki si zot napa en lagreman pri akomodasyon avek demann i monte. Ki mannyer zot kontrol sa pou fer sir ki enn, zot asiste maksimonm dimoun posib? Mersi.

MR SPEAKER

Mersi Onorab. Minis?

MINISTER **BILLY RANGASAMY**

Mr Speaker, vi ki PS Barbe i enn bann zofisye teknik ki'n travay lo sa depi byen boner, alors, i pou dan en pli bon pozisyon pou donn en pe plis leksplikasyon lo sa size. Mersi.

PS DENIS BARBE

Mersi Mr Speaker. Mersi Onorab, pou ou kestyon. Lo komansman Onorab letan nou ti pe rekaliere en pti pe sa *scheme* pou fer sir ki nou reponn en pe lo bezwen bann dimoun ki pou bezwen sa lasistans, nou ti pe fer li avek en stratezi pou nou stabiliz en pti pe, e fer sa program en pti pe li soutenab pou nou kapab fer sir poudir osi larzan ki nou

pe donn dimoun pe al direk avek *landlord*. E sa i premye bout stratezik.

Dezyenm bout stratezi ti pou nou prezan komans en konversasyon avek sa bann *landlord*, pou nou kapab gete kalite akomodasyon ki i pe *rent*. E an menm tan annan endirekteman enfliyans en pti pe *market*, akoz nou ti pe war poudir en legzanp en 2 *bedroom* a en serten pwen dimoun ti pe *rent* li en pti pe par lao R15mil ekek.

Even en 1 *bedroom* ti en pti pe anler. So, nou ti anvi fer sa bann pri desann, re antre pou get sa kalite akomodasyon ki bann dimoun pe *rent*. Fer sir osi poudir i en pti pe *value for money*. So, ki nou'n war lo premye faz, nou'n war poudir lakantite dimoun parey Minis in dir in sorti 198 in *shoot up to 253* baze lo bann entervansyon Polisi ki nou'n fer.

E lo kote akomodasyon nou pa ti ankor antre pou fer sa dyalog avek bann *landlord*, pirman akoz sa premye entervansyon ki nou ti'n fer pou stabiliz en pti pe, apre nou ti pou vwar *poudir then* i annan en pti lespas bidzeter ki nou kapab akomod en pti pe plis kliyan. Nou'n aziste Polisi.

So, mon panse Departman Lakaz pe komans antre pou komans fer sa dyalog avek *landlord*. E osi i

annan en konponan *SRC* osi ki nou ti pe met dan *equation* pou fer sir osi poudir bann dimoun osi zot *tax compliant* ki pe rent sa bann akomodasyon.

Me nou bezwen vey *timing* osi pou fer sir poudir napa en lefe advers lo nou bann dimoun. So, sa i ti program travay ki ti an plas pou sa stratezi. *Thank you.*

MR SPEAKER

Mersi *PS*. Nou a termin la pou sa keston. Nou a pran poz, e nou a rebran 11er.

(BREAK)

MR SPEAKER

Bon nou a rebran nou ariv lo keston 116, Onorab Conrad Gabriel.

HON CONRAD GABRIEL

Mersi Mr Speaker. Mon a dir bonzour Minis ek ou panel. E bonzour bann dimoun Pointe Larue. Mon demann zot pou ekout atantivman keston. Mersi. Eski Minis i kapab dir nou ki zistans zot in arive avek sa proze lakaz Anse Francois?

- a) Kan sa proze i eksepte terminen?
- b) Eski i annan bann lezot proze lakaz ki pou ganny fer dan distrik Pointe Larue? Mersi.

MR SPEAKER

Mersi. Minis?

MINISTER

BILLY

RANGASAMY

Mersi Mr Speaker. Mersi Onorab, pou ou keston. E mon ti a voudre nou ekout byen larepons. Mr Speaker, baze lo serten defi teknik ki nou fer fas avek ler bann fondasyon ti pe ganny konstrir lo sa sit, nou'n ganny en pti pe retar lo en blok ki konpri 8 *unit*. Sa proze lo son totalite i annan 16 *unit* 2 blok 8 *unit*.

Nou'n pran desizyon pou akseler travay lo enn sa bann blok, ki i annan mwens konplikasyon e ki'n byen avanse. E nou ekspekte konplet sa premye blok tre byento e fer alokasyon an Zilyet 2025. Sa dezyenm blok in ganny en pe retar, me nou'n pran aksyon avek kontrakter pou nou enstal en *tower crane* ki'n fini ganny enstale lo sa site pou akseler sa travay. Nou anvizaze konplet sa dezyenm blok avan lafen 2025.

Mr Speaker, lo size lezot proze lakaz dan distrik Pointe Larue nou osi annan en blok 6 *unit* lakaz abordab. Sa i pou anba en lagreman ki nou ti fer avek *GICC*, pou fer koman en komansman faz 2 *Anonyme Views Housing Estates*. Lazans Lenfrastruktir *SIA* pe travay lo detay sa proze, pou nou kapab komanse o pli vit posibil.

Anvi ki sa premye blok ki mon'n fer resorti, sa premye

blok 6 *unit* pou form par en premye letap en pli gran proze, i enportan ki sa proze i ganny *design* dan son totalite pou evite ki nou konpromi lezot devlopman dan le fitir. Mr Speaker, nou pe osi get dan posibilite fer en pti *proze mid-range condo* pa tro lwen avek sa sit proze lakaz Anse Francois.

An plis Onorab parey ou okouran nou osi annan sa proze re devlopman *Nageon Estate*, faz 2 pou 7 lakaz. An *parallel*, bokou travay pe ganny fer osi par *PMC* pou nou akseler nou bann program renovasyon mazer lo bann blok flat ; par egzanp kot *Ex-Albert, Mirabelle Estate* adres bann problem *sewage* par egzanp. So, sa i bann depans kapital ki nou pe fer dan distrik Point Larue, pou reponn kestyon Onorab. Mersi Mr Speaker.

MR SPEAKER

Mersi Minis. Siplemanter Onorab Gabriel.

HON CONRAD GABRIEL

Mersi Minis pou ou larepons. Minis, sa 6 *unit GICC* la ki ou'n koz lo la, eski sanmenm sa tranzaksyon ki ti ant *IDC* ek Gouvernman Sesel pou konstrir sa 6 *unit* pou *compensate* sa lakaz *emergency* ki ti sitye kot *Agro Industry* Pointe Larue ? E si ou

kapab donn nou en pe depans konbyen in arive so far sa 8 *unit* 3 lasanm ki pe al donnen an Zilyet?

E zis an pasan, Minis vi ki i annan sa kontrent, eski sa bann lakaz pou donn zis ek bann dimoun Point Larue pou le moman? Akoz parey ou konnen nou lalis lakaz in telman long vi ki napa proze ki'n bouze dan nou distrik pandan sa 5an. Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mersi Mr Speaker. Mr Speaker, mon a zis fer eklersi Onorab, pou sa 8 *unit* ki nou pe anvizaze konplete e fer alokasyon an Zilyet. Sa i tre avanse, e nou konfidan ki sa i pou kapab ganny fer. Me an *parallel* nou pou komans sa pa dir nou pe komanse, nou pe al fer sa legzersis alokasyon.

Parey ou konnen alokasyon i ganny fer ar en Komite, i pa Minis ki deside. Komite pou analiz tou bann ka ansanm, e nou a pran desizyon. Nou annan bann ka lo *national quota* osi fodre pa nou bliye. Me selman nou a balans keksoz pou nou vwar en pti pe baze lo merit pou alokasyon pou sa premye 8 *unit*.

Lot parti ou kestyon ti sa *exchange* avek IDC, mon a les PS Barbe *share* avek nou en pti pe modalite sa *exchange*. Mersi Mr Speaker.

MR SPEAKER

PS Barbe?

PS DENIS BARBE

Mersi Mr Speaker. Mersi Onorab pou ou kestyon. Onorab, modalite *exchange* avek IDC i *straight forward*. Setadir Gouvernman ti pou donn zot sa morso teren. E zot, zot ti pou finans en proze lakaz dan Pointe Larue pou distrik, pou en sonm larzan en pti pe plis ki R6 milyon.

E an menm tan, Minister li i ti pou idantifye sit e an menm tan met sa konponan lenfrastruktir pou sa proze. *Thank you*.

MR SPEAKER

Minis, i annan son trwazyenm pwen. Si sa pou *allocate* pou zabitan Pointe Larue? Vi ki in ganny demande, si ou annan en repons.

MINISTER **BILLY RANGASAMY**

Mr Speaker, mon demann ou leskiz. Nou pa'n byen konpran sa dernyen.

MR SPEAKER

In zis demande si sa pou ganny *allocate* pou zabitan

Pointe Larue, aköz i annan en long lalis kot zot.

MINISTER **BILLY RANGASAMY**

Mr Speaker, mon ti'n konmsi eksplike ki i pou annan en Komite Alokasyon ki pou adres sa bann demann ki devan nou. E desizyon i a ganny pran baze lo merit. Osi nou konsyan ki i annan demann ase agresiv dan distrik Pointe Larue. Me selman Komite ki pou pran sa desizyon, letan zot ava diskite. E ou menm Onorab ou pou prezan, e DA tou pou nou fer sa dyalog.

MR SPEAKER

Mersi. Onorab, ou'n demann 3 kestyon deza, gard ou klarifikasyon direk.

HON CONRAD GABRIEL

Wi, Mr Speaker. Zis petet Minis eklersi nou. Sa 8 *unit* ki ou pou al donner la Zilyet, eski i zis bann 3 lasanm? E petet konbyen in koute so far? E eski Bidze i la pou konplimant konplet sa proze *by* Desanm? Mersi.

MR SPEAKER

Mersi. Minis?

MINISTER **BILLY RANGASAMY**

Mr Speaker, avek ou permisyon mon a demann

CEO Jitesh donn nou leklersisman lo la.

MR SPEAKER

CEO?

CEO JITESH SHAH

Mersi Mr Speaker. Mersi Onorab. Onorab, mon kapab donn ou kou sa proze an global, olye... aköz avek mwan mon napa *breakdown* per *block*. Selman i en pti pe mwens ki R 22 milyon, 21.9 milyon pou sa 16 *unit*. E wi, sa blok ki pe fini la i 8 *unit* 3 lasanm ki pe fini an se moman.

Selman zis pou mwan kapab eklersi, aköz mon pa konnen si kekfw sa ti rezon keştyon, alokasyon selman ler i ganny fer avek pri ki ganny finalize pou bann *unit*, i pa lo en baz proze par proze. Nou get li baze lo en *portfolio* proze ki nou pe *allocate* sa lannen. E nou get en *average price* ler *across* bann diferan proze pou sa kou *unit*.

Sa i prensipalman aköz nou konnen serten distrik la ater, i pli senp pou konstri ki lezot distrik. E lo en baz *fairness* i pa pou fer sans pou en dimoun ki dan en distrik ki pli difisil pou konstrir li i bezwen pey plis. So, nou get en *average price across* lannen, pou fer sir poudir tou lakaz 3 lasanm ek 2 lasanm ki ganny *allocate* dan en lannen bann

dimoun zot pri lakaz i parey *across* tou bann diferan proze ki nou fer.

MR SPEAKER

Mersi CEO. Nou ava al lo keştyon 117, dan non Onorab Wavel Woodcock. Me se Onorab Doyace Porice ki pou koz son keştyon.

HON DOYACE PORICE

Mersi Mr Speaker. Mr Speaker, Minis ek ou delegasyon, e tou mon bann koleğ MNAs, bonzour. Keştyon 117 sorti kot Manm Elekte pou Grand Anse Praslin Onorab Woodcock i lir koumsa ;

Eski Minis i kapab dir ek sa Lasanble, ki difikilte ki zot in rankontre pou fer proze *Coastal Management* Amitié/Roche Corbigeau: vi ki ti annan en alokasyon R29 milyon dan Bidze 2024 pou sa proze e si i annan okenn sanzman dan plan orizinal sa proze? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mersi Mr Speaker. Mersi Onorab, pou keştyon. Mr Speaker, plan orizinal proze sete pou fer en *rock armour* e konble en longer anviron 1 kilomet lakot ant Roche Corbigeau e Amitié pou adres

sa problemm lerozyon relye avek sanzman klima osi protez nou lenfrastriktir semen dan sa rezyon.

Minister ti ganny laprouvasyon *POU* pou diskit sa proze avek 2 kontrakter spesyalize dan sa domenn. Atraver nou diskisyon teknik e kontrakter ki ti montre lentere pou fer sa travay, nou ti vitman realize ki sa proze pa pou vyab pou sa 2 rezon prensipal ; I annan en mankman materyo lo Praslin, ros e materyo konblaz. E osi en limitasyon prodiksyon lo Mahe pou siport en proze lo sa lanplè.

Kou i pou tre eleve pou fer transportasyon sorti Mahe si nou ti'n pran sa solisyon. E transportasyon enn fwa ki materyo i ariv Praslin Baie Ste Anne. Pa bliye ki nou annan bann diferan pon ki sa bann materyo ti pou bezwen pas lo la dan bann konminyon, dizon 10 tonn an montan. Son bann lenfrastriktir osi pa ti soutenab pou fer sa bann tranzaksyon transportasyon materyo.

Se pou sa rezon ki nou teknisyen *SIA*, *CAMS* i sa kontrakter li menm in met latet ansanm e rod en solisyon pli efikas. Alor, Mr Speaker, nou ti bezwen refer sa *design* kot aprezan pou napa gran konblaz pou fer. Me plito pou fer sa ki nou apel bann

breakwater oubyen bann striktir ki kapab an ros pou kapab kas lafors laroul e pli byen kapab protez sa lakot.

Nou pou osi enstal bann *groyne* pou ankouraz akimilasyon disab dan sa seksyon lakot. Sa nouvo design in ganny diskite avek Departman Sanzman Klima, e nou pe fer travay avek kontrakter pou nou ganny en *costing* pou enplimantasyon sa proze. Nou pe pouse pou nou kapab komans sa proze an Zilyet 2025.

I bon note ki larzan ki ti'n ganny bidzete i ankor la a nou dispozisyon pou sa proze tre enportan pou sa seksyon Amitié/Anse Corbigeau Grand Anse Praslin.

Prezidan Larepublik e Onorab Woodcock li menm osi pe met bokou lanfaz pou komans sa proze o pli vit posib. E mon Minister pe donn tou sort koudmen, tou zot sipor atraver *SIA* pou nou kapab demar parey mon'n dir ek lagras an Zilyet 2025. Mersi Mr Speaker.

MR SPEAKER

Mersi Minis. Onorab Porice, i annan siplemanter lo sa kestyon?

HON DOYACE PORICE

Mersi Mr Speaker. Minis, mersi pou ou larepons. Eski bann kontrakter *Praslinoise* in

ganny konsidere pou sa bann proze? E eski i annan lezot landrwa lo Praslin ki'n ganny afekte pe ganny konsidere dan sa proze? Mersi.

MR SPEAKER

Mersi.

MINISTER **BILLY**
RANGASAMY

Mr Speaker, mon pou les CEO Jitesh reponn sa akòz i pe get avek bokou lentansite bann diferan landrwa ki ganny bokou afekte. E li i konn plis detay teknik. So, avek ou permisyon Mr Speaker, mon a pas avek CEO Jitesh.

MR SPEAKER

CEO?

CEO SIA JITESH SHAH

Mersi Mr Speaker. Mersi Onorab, pou ou kestyon. Onorab, pou sa proze li menm Amitié, parey Minis in dir i en longer semen ki pros 1 kilomet ki pe ganny afekte. Lanpler sa proze pa ti pou les nou kapab servi bann kontrakter *Praslinoise* lo kote lanpler proze. E pou sa rezon parey Minis in fer resorti, nou ti atraver *procurement* nou ti fer en *request* pou zis sa 2 kontrakter lokal ki baze lo Mahe prensipalman ki annan kapasite pou fer en proze lo sa lanpler.

Selman parey ou pe dir i annan lezot landrwa ki'n fini ganny idantifye. I annan lezot proze, mon kapab dir zot poudir Cap Samy i annan en proze pou met 2 *groyne* Cap Samy pou nou kapab protez sa lans, sa lakot ek sa lans. E sa nou pe anvizaze kas li an 2 proze pou ki nou kapab servi bann kontrakter lokal Praslin.

Byensir, si pri ki zot donn nou i rezonnab, sa i toultan en keksoz ki nou bezwen veye lo nou kote. I annan lezot landrwa ki nou pe travay konzwentman avek CAMS avek SLTA tou le de. Par egzanp Anse Boudin, kot semen nou konnen nou gannyen kantite disab ki mont lo semen dan serten parti lannen.

Nou annan nou en lalis efektivman 40 sit Mahe, Praslin, La Digue ki'n ganny idantifye koman bann landrwa ki *coastal erosion* i en problem ki bezwen ganny adrese.

Byensir i pa posib pou nou kapab adres tousala en sel kou. Selman nou pe travay avek sa lalis pou nou gete lekel bann landrwa priyoriter, pou nou kapab komans *tackle* sa bann problem.

So, byensir kot i permet nou pou fer nou mye pou nou servi bann kontrakter lokal dan bann rezyon, sey partaz

sa louveraz amwen ki nou kapab.

Selman, an menm tan nou bezwen osi konsyan ki poudir i annan serten louveraz son lanpler, son kalite masin ou bezwen travay par lanmer, pa neserman par later i pou limite avek dimoun ki annan leksperyans, kapasite e lekipman pou zot kapab fer sa bann louveraz. Mersi.

MR SPEAKER

Mersi *CEO*. Mon bezwen avans lo prosen kestyon 118, Onorab Richard Labrosse.

HON RICHARD LABROSSE

Mersi Mr Speaker. Mon ti a kontan dir Minis bonzour ek ou delegasyon, bonzour tou koleg Manm. E tou dimoun ki a lekout, espesyalman bann dimoun entelizan sorti Plaisance.

Mr Speaker, kestyon 118 i al konm swivan,

Eski Minis i kapab enform Lasanble konbyen proze redevlopman nasyonal ki'n konplete pandan sa dernyen 4an? Mersi.

MR SPEAKER

Mersi Onorab. Minis?

MINISTER
RANGASAMY

Mersi Mr Speaker. Mersi Onorab, pou sa kestyon. Mr Speaker, i stratezi

Gouvernman pou nou agresivman redevelop sa bann vye *Housing Estate* sirtou dan rezyon lavil Victoria.

Mr Speaker, pou nou demontre sa langazman mon pou partaz avek sa Lasanble bann proze lakaz ki'n ganny fer lo bann sit redevlopman depi 2021 anba ladministrasyon *LDS*, e anba mon vizyon.

Nou'n konstri

- 8 *unit lower* Les Mamelles.
- 6 *unit transit lower* Les Mamelles.
- 25 *Unit* Foret Noire Port Glaud.
- 16 *Unit* Corgate Estate faz 4.
- 16 *unit* Kan Gard Plaisance faz 2.
- 24 *unit* dan Vilaz Zanblon Cascade *Ex PSSW* faz 1.
- Osi i ankor annan 24-unit faz 2 ki pe konplete sa mwan.
- 16 *unit* Kan Gard Mont Fleuri kot nou apel Flamboyant Estate.
- 16 *unit* Vilaz Prosperite Bel Ombre.
- E 6 *unit* St Louis o bot lekol Belonie.
- E 16 *unit* Vilaz Basen Union Vale.

Mr Speaker, sa bann proze i reprezant an total 149 *unit*, ki'n fini ganny fer lo plizyer si

redevelopman. E ankòr 24 *unit* ki pe fini sa mwan Dan Zanblon parey mon'n dir faz 2, dan sa dernyen detrwà lannen.

Mr Speaker, permet mwan pou osi azoute ki an se moman nou ankòr annan 32 *unit* ki pe konstri Corgate Estate. E 8 *Unit lower* Les Mamelles ki'n fini al lo *tender*.

Nou'n osi reisi devlop proze Lari Angar, Mont Buxton apre plizyer lannen. Nou anvizaze konstri 16 *unit* dan sa distrik, e lev labote sa landrwa o bor larivyer. E donn sa kominote en nouvo lelan. Nou serye, e nou *full* determinen pou fer sa bann netwayaz pou fer sa *clean up* dan sa bann sit ki dan bann move kondisyon lozman o pli vit posib.

E amelyor lavi nou bann frer ek ser Seselwa, e donn zot, zot dinyite ki zot byen merite. Sa pti moman letan nou'n kapab atak tou sa bann proze ki mon'n partaz avek zot. E mon remersi Gouvernman pou zot langazman. E tou teknisyen e kontrakter ki'n fer sa bann travay tou pou tou pou nou dil avek sa program serye ki Gouvernman i annan.

I osi dan nou plan pou komans konstriksyon Les Mamelles dan tol, sa ki nou apel dan tol vizavi *Mohan*. E *société du Logement Belveder* osi dan ou distrik Onorab. E

Beau Vallon, Pascal Village. E osi *Ex Morel* St Louis.

Bann program redevelopman parey zot konnen i annan son defi ki vin avek, son bann *challenges* akòz ou bezwen annan landrwa pou *relocate* sa bann dimoun ki la pou ou kraze refer.

Avek tou senserite, nou program ki nou annan devan nou menm pou sa prosen 5an, i tre entansif. Parske stratezi ki nou pou partaz avek zot en moman pli tar, letan nou'n fini kordin nou bann en prezantasyon ki mon pe fer ek Lasanble. E se pou avan 2030, nou'n vreman eklersi tou sa bann vye *housing estate* enkli *lower* Les Mamelles, avek tou zefor ki nou kapab pou nou kapab met nou pti lavil Victoria dan en nouvo kondisyon. Sirtou sa bann *housing estate* ki'n ganny Corgate Estate eksetera ki dan bann kondisyon ase trakasan. So, nou plan i serye.

E Mr Speaker, avek ou permisyon mon anvi zis met lanfaz ki sa lannen ler nou pou vin devan Lasanble avek nouvo Bidze, nou plan Bidze pou annan sa bann konponan ki nou pou partaz avek Lasanble. An menm tan sey nou mye dan tou distrik osi pou nou adres sa bann program redevelopman. Mersi Mr Speaker.

MR SPEAKER

Mersi Minis. Onorab, ou annan siplemanter?

HON RICHARD LABROSSE

Mersi Mr Speaker. Mersi Minis, pou ou lenformasyon. Minis, dan ou lenformasyon ou'n nonm *Société du Logement* Belvédère. Minis, sa bann lakaz en pe letan parey nou'n koz bokou lannen depi 4an nou pe koz lo sa. E kondisyon sa bann lakaz i vreman dan en letan vreman deplorab, bann dimoun pe *struggle* bokou ek sa bann lakaz.

La vi ki ou'n fer en mansyon lo la, mon ti ava kontan si ou ti a kapab donn Lasanble ki bann travay ki pe fer vi ki ou'n nonmen la ki... oubyen ki zour oubyen ki bann letan ki reste la pou nou vwar en komansman lo sa devlopman Belvédère?

Mon dezyenm kestyon Mr Speaker, i konsern ankor en lot redevlopman sa i Kan Gard Plaisance, kot laba bann zabitan pe plenmy bokou avek *fungus* lo sa bann vye lakaz, e teren mon vwar li preski pare pou fer konstriksyon.

E ler zot pe vwar lot kote semen ki pe ganny konstrir. E la lot kestyon ki zot pe demande, kan ki nou pou vwar en komansman sa proze pou li fini? Mersi Mr Speaker.

MR SPEAKER

Mersi. Minis, nou a sey bref lo bann repons silvouple, pou nou kapab bouze. Ler ou pare.

MINISTER**BILLY****RANGASAMY**

Mersi Mr Speaker. Mersi Onorab, pou ou kestyon. Onorab mon kontan enform ou ki kan gard Plaisance i agresivman lo nou plan pou sa lannen, lo trwazyenm kar sa lannen i pou demare. E li i relye avek proze *Société du Logement*. Ler nou'n kapab fer sa bann unit anba Kan Gard i pou kapab deblok premye re lokasyon anler *Société du Logement*. En fason ki nou a kapab atak sa problemn *Société du Logement*, sa proze *Société du Logement* Belvédère.

E an plis ki sa, nou osi pe anvizaze ganny en pe *unit* letan bann dimoun ki pe reste dan bann dan sa 16 *unit* ki ti fini an Desanm 2023. E pou le moman pe abrit bann zabitan Cascade ki ti'n ganny afekte ek sa dezas. Ler sa bann *unit* osi pou vin lib bann dimoun ki'n fini fer zot lakaz, e bann ki pe retourn dan proze Cascade i a kapab demare. I ava kapab vin en realite, sa bann osi pou ed nou atak sa vilaz *Société du Logement* pou vwar ki mannyer nou kapab maksimiz. Zour nou antre nou

vini nou fer bon mannyer travay.

Nou annan sistenm drenaz, sistenm *sewage* pou nou dil avek tou. E *next year* CEO Jitesh in *remind* mwan ki nou pe met li dan nou plan Bidze pou nou enn fwa pou tou regle sa problem *sewage Société du Logement*. Nou pou pas en laliny dan semen Belvédère, e konekte anba kot Corgate Estate. So, plan i la e finansman pe ganny fer provizyon pou finansman.

E mwan mon'n ale dan *Société du Logement*, mon'n ale avek ou menm Onorab nou'n vizite sa bann *unit*. Vre i trakasan, e nou anvi sa bann dimoun ganny zot dinyite o pli vit posibil. Alors, tou dezir nou leker pou nou travay for pou fer sa proze vin en realite. Parey mon'n fer resorti en pe bann lezot distrik osi. Mersi bokou Mr Speaker.

MR SPEAKER

Mersi bokou. Onorab Vidot, ou kestyon.

HON AUDREY VIDOT

Mersi Mr Speaker. Minis, mon kestyon i *straight forward*. Dan sa bann proze redevlopman, eski i annan bann ki zot in *acquire* serten later eski bann peyman in fini fer ek bann dimoun si zot in *acquire*? E dezyenm, si ou kapab dir nou si dan sa bann

proze redevlopman in annan sipor finansman sa bann pei zanmi e kantite ladan ki'n fer li posibil pou fer nou Lasanble ganny detay? Mersi.

MR SPEAKER

Mersi. *Minister*, ler ou pare.

MINISTER BILLY RANGASAMY

Wi. Mersi Mr Speaker. Mersi Onorab, pou ou kestyon. Onorab, dan mon bann program proze ki mon'n partaz avek Lasanble, napa enn sa bann proze ki'n ganny *foreign grant* dan mon letan koman Minis. E petet lavenir si louvertir i la nou ava osi kontinyen tap laport, pou nou vwar bann posibilite pou nou akseler sa program.

Parey mon'n dir stratezi se avan 2030, avan nou selebre nou 55enm 2031, nou 55enm Laniverser Lendependans enn mon bann vizyon koman Minis responsab, se pou *clean up* tou sa bann *slums* an deor nou lavil, sa bann lakaz ki dan bann move leta, sa bann proze ki ou konnen in ganny fer dan letan kolonyal.

So, nou annan en nouvo stratezi, pa dir nouvo stratezi ki nou pe met lanfaz lo la, pou nou *achieve* sa. So, letan ou ava pe antre lo avyon ou a pe aproz ou pa ava war okenn *slums* dan okenn landrwa

parey ki nou war letan nou pe apoz par egzanp *Cape Town* oubyen *Lendonezi*. Bann landrwa ki'n en pe dan afekte. Konmsi in ganny laz konpran mwan. So, sa nou stratezi.

E parey mon pe dir si ou ganny finansman etranze pou bann *Grants* pou nou akseler sa program, nou pou fer li si i soutenab.

Wi, *CEO Jitesh* i annan en pti keksoz pou azoute osi. Epi *PS Barbe* i annan en pti bout pou azoute konsern bann later *acquisition* bann later kot bann dimoun in aste zot propriyete deza. Mersi Mr Speaker.

MR SPEAKER

Nou a ganny sa vitman silvouple bref.

CEO JITESH SHAH

Mersi Mr Speaker. Mersi Onorab. Onorab, zis lo sa pwen finansman eksteryer pou bann proze redevlopman. Baze lo mon leksperyans i vin en pti pe pli konplike pou bann sit redevlopman. Normalman ler nou annan bann pei zanmi ki anvi vin envestir dan bann proze lakaz pou ed nou. Souvandfwa zot *requirement* i zot anvi bann site ki kler. Tou sa ki nou apel bann *green field site*.

I pa vedir i en posibil, selman i vin en konplikasyon enn ler. So, lo nou kote nou

sey nou mye pou nou ler nou annan bann nouvo loportinite ki nou pe gannnen. Parey nou pe gannnen avek Gouvernman Sinwan, sa *Saudi Grant*, nou sey nou mye pou nou konsantre lo bann sit ki *available*. E *accordingly then* nou servi nou finansman lokal pou nou met dan bann proze redevlopman. Akoz sa konplikasyon *at least* pa vin lo sa bann proze *foreign financing*.

I en keksoz pou nou kontrole enternman, ki fer li en pti pe pli fasil. So, sa i zis en pti pe stratezi lo nou kote, wi.

MR SPEAKER

Mersi. *PS Barbe*, ti pou azoute?

PS DENIS BARBE

Mersi Mr Speaker. Mersi Onorab, pou ou kestasyon. Onorab pou tou sa bann proze ki Minis in liste, bann proze ki'n fini konplete. I ti napa okenn konponan kot nou ti bezwen pas *acquire* later. Akoz laplipar ti bann sit ki ti deza pou Gouvernman, i ti annan lakaz lo la. Me par kont i annan bann proze ki Minis in liste apre ki dir nou pe enplimante sirtou *Mont Buxton*.

I annan serten negosyasyon ki nou'n fer pou nou kapab aste later pou nou

ganny akse pou nou ariv lo sa *site*. Avek tou lobzektif pou nou kapab *at least* ganny semen pou al lo *site*, an menm tan fer proze vyab. E i annan serten negosyasyon ki nou pe fer pou *Société du Logement Belvédère*, an menm tan Les Mamelles pou nou kapab fer sir ki poudir lenpak proze i pli vyab e nou fer en diferans dan sa kominote. *Thank you*.

MR SPEAKER

Onorab Georges?

HON BERNARD GEORGES

Mersi Mr Speaker. Bonzour Minis avek ou delegasyon. Minis, mersi pou eksplik nou ozordi ki i annan 8 lakaz ki pe al ganny fer *lower* Les Mamelles. E ki pou annan redevlopman tou sa area kot bann vye lakaz Angle, zabitan Les Mamelles alor soulaze pou atann sa. Mersi osi pou dir ki pou annan en proze Dan Tol *opposite Mohan*.

Me zis pou bann zabitan konnen, konbyen *unit* ki nou pe eksepte annan la Dan Tol? Mersi.

MR SPEAKER

Mersi.

MINISTER **BILLY RANGASAMY**

Mersi Mr Speaker. Onorab, mon ava zis konfirm sa avek

ou. I annan 28 unit ki nou ekspekte konplete,

- 16 - 3 lasanm.
- Apre 12 - 2 lasanm.

MR SPEAKER

Mersi Minis.

MINISTER **BILLY RANGASAMY**

Mersi Mr Speaker.

MR SPEAKER

Onorab. Bon nou ava avans lo prosen kestyon 115 *sorry*. Kot mon'n arive la? 119? Wi, nou ankor avek menm delegasyon. 119, Onorab Michel Roucou.

HON MICHEL ROUCOU

Mersi Mr Speaker. Bonzour Minis ankor enn fwa. Minis, kestyon 119 i lir koumsa,

Eski Minis i kapab dir ek Lasanble konbyen kare later ki'n fini ganny distribye Kan Tobrouk? E konbyen kare later son Minister pe mazin *survey* laba? Mersi.

MR SPEAKER

Mersi Onorab. Minis?

MINISTER **BILLY RANGASAMY**

Mersi Mr Speaker. Mersi Onorab, pou ou kestyon. Mr Speaker, baze lo travay ki ou Minister ti fer avek Departman Lanvironnman e Lafore, Minister ti tir 8 kare rezidansyel dan bann lannen

2015. Pli resaman nou'n ganny permisyon en pe delika avek lanvironnman tou sa. Nou ti ganny en permisyon pou tir ankor 2 Kare dan sa rezyon.

Avek travay adisyonnèl ki nou'n fer avek bann *stakeholders* konsènen, nou ankor pe eksplor posibilite pou tir en pe plis kare later rezidansyel dan sa landrwa. Pou le moman mon pa dan en pozisyon pou donn lakantite ki pou gannnen. Parski i ankor en pti pe pli boner lo sif egzakt pou mwan sit sa avek ou Onorab.

Me tou zefor pou ganny fer pou nou maksimiz potansyel, tir maksimonm kare later ki nou kapab dan sa rezyon Kan Tobrouk parye ou'n fer resorti. Mersi Mr Speaker.

MR SPEAKER

Mersi. Siplemanter Onorab.

HON MICHEL ROUCOU

Annefe parey ou konnen poudir Mont Fleuri i enn bann distrik kot nou ganny dri souvandfwa ki nou napa ase later pou nou kapab asiste nou bann zabitan. Si ou kapab dir avek nou, eski i annan en travay ki zot pe fer pou fer sir ki bann kare later ki pou ganny tire dan lefitir, ki bann zabitan Mont Fleuri i kapab benefisye avek li menm li?

Aprè i annan kare later V16172, ki li i baze par deryer *Blue Hill*, Lotel *Blue Hill* ki napa sitan akse avek si i annan serten travay ki zot kapab fer pou zot al vwar sa kare later ki en zabitan i kapab benefisye avek.

Minis, e osi eski dan bann kare later ki zot kapab vwar pou get potansyel bann kare later kot nou kapab ganny osi kekfwà en blok flat ki pou benefisye zabitan Mont Fleuri? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mr Speaker, mon ava kouver avek ou permisyon mon ava kouver en porsyon en parti kestyon Onorab Roucou. E PS, i ava tous lo sa kare later V16172 aprè ki mon'n fini. Tou lentere parey mon'n dir Onorab pou nou tir maksimonm kare later.

Selman nou bezwen annan en pti pe sa lespri *share the love* parey nou dir. Parske tou sa bann distrik an deor dan lavil Larivyer Anglez, Mont Buxton, Plaisance menm, Mont Fleuri i annan en pe limitasyon lo later.

So, an prensip baze lo merit pou si bann dimoun Mont Fleuri i pou byen plase lo sa lalis evantelman. Me

lentansyon se pou si konsernan alokasyon later toulta lo en baz rezyonal. So, nou a bezwen get en pti pe bann lezot vye ka ki nou annan dan sa bann distrik ki nou'n mansyonnen dan zanmirant Mont Fleuri bann distrik a kote Mont Fleuri. Mersi Mr Speaker.

Epi mon ti ava kontan petet profit sa lokazyon, i annan bann kare later ki nou'n *allocate* istorikman. Me nou pe vwar ki bann devlopman pa ankor akselere lo sa bann teren. Mon ti a kontan ankouraz sa bann zabitan pou akseler sa bann devlopman. Zot konstriksyon zot lakaz o pli vit posib, parske i en keksoz ki nou pe get etrwatman pou nou analiz sa bann ka.

Parske ler ou ti fer ou demann an 2015, ou ti ganny *allocate* lakaz, later. La nou'n ariv 2025, dizon e si i annan bann kare later ki pa ankor ganny devlope nou pe apros bann propriyeter prive ki'n aste later sibvansyonnen avek Gouvernman pou zot akseler zot proze. Mersi Mr Speaker. Avek ou permisyon mon ava pas laparol avek PS Barbe.

MR SPEAKER

PS, ou'n ganny laparol.

PS DENIS BARBE

Mersi Mr Speaker. Mersi Onorab, pou ou kestyon. Onorab pou *parcel V16172*, mon napa detay presiz la avek mwan. Me selman baze lo en pti pe laspe istorik, mon panse i deza annan en tranzaksyon ki Minister in fer lo sa *parcel*. Mon pa tro kapab dir ou si i *was least or private* selman mon konnen i annan tranzaksyon. Nou kapab donn ou sa lenformasyon apre. *Thank you.*

MR SPEAKER

Thank you PS. Onorab, ale, wi kekfwa ou ti annan tro bokou. Non, non i annan zis sa enn kot mon'n demande si petet dan pe tir bann kare later si i annan en posibilite pou zot vwar petet pou fer en blok flat lo en morso. Mersi.

MR SPEAKER

Minis, oubyen PS. Yes, PS?

PS DENIS BARBE

Thank you, Mr Speaker. Dan travay ki nou pe fer Onorab avek Lanvironnman konzwentman avek Lotorite Plan, nou pe get dan tou posibilite. Akoz ler nou pe get rezidansyel *it can be* bann *high density residential* ki normalman i apre en blok flat oubyen *medium density* ouswa *low density*, ki li i pou pirman en kare later *and what not.*

I depandan lo travay *feedback* ki nou gannnen avek Lotorite *Planning* avek Lanvironnman, nou ava balanse nou ava gete. Thank you.

MR SPEAKER

Thank you. Avan nou prosede nou pou fer en pti sanzman *panel*. Nou pou dir orevwar PS Barbe. E se Mr Steve Mussard, *CEO Property Management Company* ki pou pran son plas lo latab. Nou a pas lo kestyon limero 120, Onorab Louise Tamboo.

HON LOUISETTE TAMBOO

Mersi Mr Speaker. Mon kestyon i al koumsa,

Lefe ki i annan en mankman *parking* kot flat Brillant Cascade e i osi napa en landrwa rekreyasyonnel pou bann zanfan, eski Minis i kapab dir sa Lasanble, si i annan okenn plan pou fer lagrandisman *parking* e konstri en landrwa rekreyasyonnel dan sa *estate*? Mersi Mr Speaker.

MR SPEAKER

Mersi. Minis?

**MINISTER
RANGASAMY**

Mersi Mr Speaker. Mersi Onorab, pou ou kestyon. Mr Speaker, *housing estate*

Brillant ti ouver an 2004 e konpri 5 blok flat 40 *unit* an total. Pou le moman i annan provizyon *parking* pou anviron 40 veikil lo sa *estate*.

Mr Speaker, pandan sa bann dernyen lannen nou'n obzerve ki i annan bokou plis transpor ki pe deservi sa fasilite lo *estate*, tel ki bann zabitan ki annan ki anmenn e kit zot bann transpor zot travay ki zot travay ladan e ape zot annan zot prop transpor personnel.

E dezyennman bann zabitan ki osi annan 2 ou 3 loto eksetera parfwa. Mr Speaker, mon'n fer resorti sa pwen parski fransman e aköz prensipal *parking housing estate*. E sa i en problem ki nou pe fer fas avek dan diferan *housing estate* dan pei.

Aktyelman *PMC* pa dan en pozisyon pou agrandi *parking* pou le moman. Zot pe plito konsantre lo bann program renovasyon mazer ki pe dil avek sa bann *issue* par egzanp *sewage* eksetera.

Par kont nou pe deza fer en pe travay lo planifikasyon konstriksyon en *playground*, pou deservi sa *estate* o pli vit posib. Sa konversasyon in ganny leve en pe letan pase. Lespas i reste en defi dan sa teren parske parey ou konnen sa teren i tre anpant. *SIA* pe regard posibilite plizyer

posibilite pou nou war fason pli efikas pou egzekit sa proze.

Me i enportan petet pou mwan zis fer lanfaz ki dapre bann nonm *Planning*, tipikman pou nou bann lakaz abordab - dizon i annan 20 *unit*, mon bezwen fer provizyon pou 50poursan. Alors, 10 teknikman 10 kare later. Me pou sa 10 *parking bays*, me pou sa proze li sa ki mon kontan pou partaze i annan son 40 pou 40 - son prensip i zis pou bann loto siplemanter ki pe servi sa landrwa ki fer li vin en *challenge*.

E si teren ti otreman, petet nou ti kapab ouverserten landrwa. Me teknisyen in donn konsey ki i pa pou tro fasil pou le moman. Mersi Mr Speaker.

MR SPEAKER

Mersi. Wi, Onorab ou siplemanter? Minis, eski ou pe dir nou ki dan Brilliant Gouvernman napa okenn lezot bout later ki zot kapab servi pou fer lagrandisman *parking*? Mersi Mr Speaker.

MR SPEAKER

Mersi. Minis, ler ou pare.

MINISTER BILY RANGASAMY

Mr Speaker, mon oule zis en pti leklersisman avek Onorab. Ler ou pe koz Brilliant Onorab, ou pe koz zeneralman dan

Brilliant? Oubyen anler kot sa *estate*? Mon ava petet les CEO Jitesh donn en pti leksplikasyon, aköz teknikman in fer sa bann analiz. Me mon a les li eksplike petet pou fer sir, avek ou permisyon Mr Speaker, en ?

CEO JITESH SHAH

Mersi Onorab. Mersi Mr Speaker. Mersi Onorab. Onorab, parey Minis in dir i pe en kestyon napa ditou lespas, parey ou konnen sa sit i ase gran. I zis teren apropiye pou *parking* ki vin en *challenge*, i toultan lo en nivo teknik tou keksoz i posib i vin avek en kou byensir. E osi nou bezwen osi get fason ki sa bann landrwa i ganny servi.

I annan lespas kekfw ki lwen avek kot bann lakaz i ete. E baze lo leksperyans ki nou'n gannyen dan lepase, dimoun pa oule park zot transpor lwen avek zot lakaz, aköz zot dir sekirite i vin en *issue* eksetera, eksetera. So, nou osi bezwen – enn, nou bezwen get kou konbyen i koute pou fer parey Minis in fer resorti lo kote Bidze *PMC* zot annan lezot priyorite an se moman.

Epi dezyenm apre ki ou'n depans sa larzan fodre i annan landrwa ki'n ganny servi. E pa en parking ki pa pou ganny servi aköz transpor pou tro lwen avek lakaz *as well*. So, ler nou'n analiz tou keksoz an se

moman, nou pa pe war en landrwa apropiye ki pou fer sans pou al investir sa larzan an se moman. Mersi.

MR SPEAKER

Mersi, nou a bouz lo prosen keston 121 Onorab Audrey Vidot.

HON AUDREY VIDOT

Mersi Mr Speaker. Mon keston i swivan. Swivan plizyer konsiltasyon ek vizit *Eden Village* ki'n ganny fer avek Minis ek son bann zofisye dan prezans bann zabitan, in annan promes pour re-lokaliz bann zouzou dan *Playground* kot blok premye faz proze 24/24 e lenstalasyon nouvo zouzou ki ti pour enstale dan 2enm faz proze 24/24 lo en lot sit ki ti'n fini ganny idantifye par Lotorite Distrik Roche Caiman,

Eski Minis, i kapab dir nou Lasanble si larzan ki ti ganny bidzete pour enstal zouzou kot sa 2enm faz proze 24/24 i ankor la? Si wi, kwa ki pe anpes lotorite konsernen enstal sa bann zouzou pour bann zanfann sa vilaz benefisye? Mersi.

MR SPEAKER

Mersi. Minis, si ou'n pare?

MINISTER
RANGASAMY

BILLY

Mersi Mr Speaker. Mersi Onorab, pou ou keston. Mr Speaker, apre ki nou'n priyoritiz plizyer gro proze nasyonal pandan sa dernyen 2an, mon kontan pou enform sa Lasanble ki *SIA* in finalman konplet *design playground* pou Roche Caiman. Zot in partaz sa *layout* avek mwan annefe, e i get tre enteresan.

Nou pe pouse pou finaliz dokimantasyon pou nou al lo *tender* o pli vit posibil. Provizyon Bidzeter pou reponn ou keston i deza la, e koman Minis responsab mon pe pouse pou nou kapab ganny en kontrakter lo *site* pandan mwan Zilyet avek lagras Bondye.

Pou mwan en *playground* pou nou bann zanfann kapab zwe ansanm koman frer ek ser i tre, tre enportan. E ki bann zabitan osi mon swete i a pran bokou swen avek sa bann lenfrastruktir ki nou met an plas.

Par kont Mr Speaker, personnelman mon leker i desire ler mon vwar leta sa bann nouvo *playground*, enn de bann nouvo *playground* ki nou'n enstale par egzanp ki ti ouver an Oktob 2024 Perseverance ki in ganny bokou andomaze.

Sa pa ankourazan parske se larzan *taxpayers* ki nou depanse. E mon swete ki bann zabitan Roche Caiman

bann zanfan, bann paran, tou bann dimoun ki servi sa i ava pran byen swen avek sa lekipman. E nou reste pozitiv ki byento Roche Caiman i a kapab ganny son nouvo *playground*. Mersi Mr Speaker.

MR SPEAKER

Siplemanter Onorab.

HON AUDREY VIDOT

Mersi Minis, pou ou larepons. Savedir Minis, eski ou pe dir nou retar ki zot in gannyen se ki aköz zot ti pe priyoritiz zot bann proze, si mon'n konpran ou byen ? Mon ti oule konnen Minis vi ki ou'n dir zot in fini konplet *design*, avan prosedir *tender* mon ti ava'n swete petet ti ava byen ki lotorite distrik in swiv tou dilon sa demann *MNA* avek *DA*.

Eski nou kapab vwar *at least* konseps sa *design* pou nou annan en lide kwa ki zot pe al *tender*?

Dezyenmman Minis, bann ki prenon kont ki ti annan en petisyon ki bann dimoun dan premye faz blok flat 16 *unit* ti fer avek *PMC*, eski sa bann lekipman la zouzou zot war i annan sans pou reservi, oubyen kan ki zot pou retir li la kot i ete ozordi e ki dat ki spesifik nou ekspekte sa proze ler ou pou *tender* sa lannen nou pou war pe komanse? Mersi.

MR SPEAKER

Mersi Onorab.

MINISTER

BILLY

RANGASAMY

Mr Speaker, avek ou permisyon *CEO* Jitesh i ava pran larepons sa kestyon.

MR SPEAKER

CEO?

CEO JITESH SHAH

Mersi Mr Speaker. Mersi Onorab. Onorab, baze lo dirasyon ki nou annan normalman pou nou bann *tender*, nou pe eksepte sa proze pou komans an Out sa lannen nou ava annan sa mwan Zilyet pou nou kapab fer sa *tender*. Lo kote re lokasyon bann zouzou, fason ki nou'n striktir nou dokiman *tender*, i pou kontakte gete lekel ki kapab ganny *salvage*. Aköz i annan serten zouzou ki ler ou pou get li par lizye i get *ok*, ler ou pe tir li i domaz ki arive.

So, sa ki kapab ganny *salvage relocate* pou ganny *relocate*, sa ki pa kapab zot ava fer nouvo ler zot pe fer sa louvraz. So, i pou menm kontrakter ki pe fer sa nouvo *playground* ki pou osi bouz sa bann zouzou e retir bann ki nou pa pe kapab servi ankör. Mersi. Lo kote anvoy zot detay,

mon ava fer li la deswit, anvoy kot zot. Mersi.

MR SPEAKER

Mersi *CEO*. Nou ava avans lo kestyon 122, Onorab Kelly Samynadin.

HON KELLY SAMYNADIN

Mersi Mr Speaker. Bonzour Minis, avek ou delegasyon. E tou dimoun a lekout. Kestyon i lir konm swivan;

Eski Minis i kapab donn Lasanble en leksplikasyon lo proze renovasyon *Dolphin Court*, par egzantp kan sa pou komanse, eski i pou fer par faz? Kote bann zabitan pou ganny mete pandan renovasyon? Mersi.

MR SPEAKER

Mersi. Minis?

MINISTER **BILLY RANGASAMY**

Mersi Mr Speaker. E mersi Onorab, pou ou kestyon. Mr Speaker, sa proze renovasyon lo *Dolphin Court*, i en proze ki pou permet nou fer travay renovasyon mazer lo sa 24 *unit* lakaz konpletman. An plis nou pou donn sa batiman en zoli *facelift* an deor e dan son lantouraz, pou ki i ava donn li en nouvo lanpler dan son totalite.

Nou pou osi adres bann problem ki'n afekte sa bann zabitan pran pandan plizyer

lannen, sirtou sa problem desarz dan zot lakaz dan sa lanvironnman. Nou pou repas bann tiyo desarz sorti dan bann kabinen, e osi enstal en nouvo *STP* pou rezourd problem desarz enn fwa pou tou.

PMC pe envestir bokou larzan pou sa proze avek led teknik ki *SIA* pe donn li e Departman Lakaz osi pe enplike, avek distrik osi.

Mr Speaker, mon kontan pou enform sa Lasanble ki sa proze i deza lo tender depi lafen Me 2025. E vizit lo *site* avek bann kontrakter in fini ganny fer. Sa *tender* ane fe frenmen yer menm le 16 Zen. E nou ekspekte annan en travayer lo *site* premye semenn Zilyet. Pandan renovasyon mon Minister in fer le neser pou *relocate* bann zabitan dan bann lakaz ki nou pe lwe spesifikman pou sa proze.

Sa renovasyon pou ganny fer par faz kot nou pe fer sir fer 6 lakaz alafwa. So, pou le moman reponn enn ou bann kestyon nou pe lwe 6 lakaz pou nou bouz 6 zabitan alafwa. E osi dan plan ki nou'n fer osi nou pe met bann ki nou apel bann *container* vid, bann *container* 20 pye pou ki sak zabitan i kapab *store* zot bann byen personnel, zot bann meb eksetera, pou ki travay i kapab

ganny fer dan en fason pli efikas e pli vit.

So, sakenn pou annan zot *container*. Sakenn pou annan zot lespas ek zot prop lakle kadnan tou sa pou stor zot lekipman, zot byen personnel, zot bann meb eksetera. So, sa in antre dan provizyon sa kontra. E sa bann *unit* pou a dispozisyon nou bann zabitan. An preparasyon pou sa proze parey ou konnen Onorab nou'n fini *relocate* premye group sa 6 zabitan.

E sa in ed nou parske in donn nou akse ek zot landrwa pou nou fer en bon lapresyasyon travay avek kontrakter. E sa lavantaz pou ed nou lo bann lezot *unit* apre. Alors, nou anvizaze fer en bon progre lo sa proze *Dolphin Court* pandan sa bann mwan devan nou. E Onorab mon konnen ki ou menm ou personnelman ou'n pous bokou pou sa proze demare.

E mon dir mersi Senyer ki finalman nou pe vwar en lalimyer. Mwan osi koman Minis responsab avek tou mon leker, mon pe kontinyen negosye pou nou met *Dolphin Court* lo en nouvo nivo, lo en lot nivo. E on donn tou zabitan *Dolphin Court* mon langazman. Mon oule remersi tou bann zabitan *Dolphin Court* osi ki'n donn nou zot kolaborasyon e

zot pasyans. Mersi Mr Speaker.

MR SPEAKER

Siplemanter Onorab?

HON KELLY SAMYNADIN

Mersi Minis, pou sa repons byen detaye. Mon osi oule profite pou remersi ou avek ou Minister pou sa lizye ki zot in zete lo *Dolphin Court*, apre ki plizyer, plizyer lannen sa bann zabitan e sa landrwa pa ti'n ganny get lo la. Sityasyon ti vreman dan en depi mon kapab dir, e pou sa mon dir ou mersi.

So, mon kestyon ki mon annan, mon ti ava kontan konnen aköz ki Gouvernman in konsider renovasyon lo sa batiman dan plas kraze e rekonstrir. E Minis, vi ki ou'n dir ki sa proze pou pe fer par faz e zot pou pe bouz par 6 *units*. Mon ti ava kontan konnen kan ki zot pe prozekte proze pou konplete? Mersi.

MR SPEAKER

Mersi Minis. Mr Speaker, mersi bokou. Avek ou permisyon mon ava tous en pti pe lo sa stratezi, aköz nou'n fer renovasyon olye kraze, rekonstri. E CEO Jitesh i a donn nou en pti pe lanpler proze, e son dirasyon ki nou'n fer provizyon dan kontra. An prensip i en kestyon ki nou ti reponn mon krwar kekfw a en

2an pase. E mon ti fer resorti ki nou'n analiz byen sa proze.

I annan 24 *unit*. Si nou ti pou kraze nou ti pou bezwen konstri 24 *unit* pou nou *relocate* sa bann dimoun, oubyen lwe. Be i ti pou en dirasyon tre long, parske ou ti pou bezwen refer sa proze dan son totalite. E an menm tan ler nou'n analiz sa striktir, son striktir i ankor byen kosto, byen solid. Parey nou dir an *Angle structuring sound*. So zis ti plito estetik ki son problemm epi, sa problemm desarz parey ou'n fer resorti ti vreman dan en move leta.

E an menm tan nou'n vwar i annan posibilite. E sa landrwa i en zoli landrwa, son *layout* ki mannyer i ete i arsitektirelman ti'n byen ganny *design* konsewar dan bann letan mon krwar bann letan ler ti pe konstri *Reef Hotel* eksetera. So, striktirelman i annord, e en zoli *design* dan en landrwa byen trankil. So, alors nou anvi donn en *PMC*.

PMC pe met larzan ladan pou nou tap tou pou fer sa proze e vann sa bann *unit* avek bann zabitan pou zot kapab annan en solisyon permanan enn fwa pou tou, tou bann zabitan ki enterese pou fer sa.

Mr Speaker, sa premye parti lo rezon ki nou'n pran sa stratezi renovasyon. E mon a

les *CEO* Jitesh eksplik en pti pe dirasyon.

MR SPEAKER

CEO?

CEO JITESH SHAH

Mersi Mr Speaker. Mersi Onorab, pou kestyon. Onorab an se moman nou pe prozekte ki kontrakter pou pran ant 6 a 8 semenn pou fer sak *batch 6 unit*. Byensir i osi annan en peryod 6 a 8 semenn pou fer sa bann louvraz pou 6 *unit*.

E byensir i annan en peryod kot ler in fini 6 dimoun i bezwen tournen tir zot bann pake dan bann *container*, *next step*. So, nou osi annan en 2 semenn *buffer* bann diferan faz. So, si nou pe get li komans 6 semenn komansman 3 bout *buffer*. E 2 mwan par 6 *unit* nou pe koz nou apepre 9 mwan edmi pou nou fini antye proze. Mersi.

MR SPEAKER

Mersi. Onorab Roucou.

HON MICHEL ROUCOU

Minis, mersi pou larepons ki ou'n donn nou. Ki mon pe demande, eski bann zabitan *Dolphin Court* aprezan anvi pou annan sa *major renovation* la, eski prezan bann zabitan pou kapab aste zot *unit* sakenn dan plas zot zis lo lwe? Mersi.

MR SPEAKER

Mersi. Minis?

MINISTER **BILLY**
RANGASAMY

Mersi Mr Speaker. Onorab, wi, stratezi se pou fer egzakteman sa, fer en bon renovasyon met li lo en zoli lanpler ki ava atiran pou tou bann zabitan enn fwa pou tou pou aste zot *unit*. E petet avek pou permisyon Mr Speaker, mon a demann *CEO* Mussard pou eksplik nou en pti pe kot in arive ek son sistenm *STP* ki osi enportan lo sa proze.

MR SPEAKER

Ok, CEO?

CEO PMC STEVE MUSSARD

Mersi Minis. Mersi Mr Speaker. Zis an pasan vitman Onorab, nou'n fer analiz lo sa problemn desarz e nou konnen poudir batiman i la en bon pe letan. E nou'n dir annou refer antye sistenm konpletman. E la mon annan plezir poudir ek ou poudir ki nou'n fini *advertise* son nouvo sistenm, nou'n fini met dan nasyon nou'n fini pibliye.

So, nou ekspekte ki mwan prosen nou kapab ganny bann lof *ki* antre ki nou kapab fer an menm tan ki *SIA* pe fer sa travay mazer lo batiman li menm ki nou kapab osi ansanm konstri natirelman en lot sistenm

desarz. Nou a kit sa enn ki la marse, aköz i annan dimoun pe reste. Selman nou ava planifye sa lot osi avek sa proze renovasyon. Mersi Mr Speaker.

MR SPEAKER

Mersi. Onorab Larsen.

HON CECILE LARSEN

Mersi Mr Speaker. Bonzour Minis avek ou delegasyon. Minis, dernyen fwa mon ti pas *Dolphin Court* ti le 23 Me. E *container* pa ti ankor arive pou sa bann dimoun ki'n ganny tire *store* zot keksoz ladan. E ou ou'n dir poudir zot pe ganny *access* avek sa bann landrwa pou zot kapab, pou zot enzenyer fer en miting.

So ki mannyer sa bann dimoun pa ankor tir keksoz dan lakaz, zot, zot pe ganny *access* avek landrwa?

E mon lot kestyon se ki depi le 01 Mars sa 6 dimoun in ganny tire, sa 6 lokater in ganny tire depi le 01 Mars. E ou dir poudir lafen Me ki *tender* in komanse. So, aköz sa dele letan? Mersi Mr Speaker.

(comments off-mic)

MR SPEAKER

Order, please! Minis, repons?

(comments off-mic)

MR SPEAKER

Ok-ok, silvouple, silvouple.
Pasyans gard zot *calm*. Minis?

MINISTER **BILLY**
RANGASAMY

Mr Speaker, avek ou
permisyon mon ava demann
CEO Jitesh pou eksplik en pti
pe laspe teknik, rezondet
stratezi ki nou ti annan kot i
konsern sa size ki Onorab in
demann klarifikasyon lo la.

MR SPEAKER

Ok, go ahead.

CEO JITESH SHAH

Mersi Mr Speaker. Mersi
Onorab, pou ou kestyon.
Onorab, lo kote *container*
parey Minis in eksplike
container i form parti sa
kontra ki nou pe al sinyen
avek kontrakter. So, sanmenm
sa ou pa e war *container* lo *site*
ozordi, aköz prezan ki nou pe
al *order* avek sa kontrakter. I
pe fer provizyon pou sa bann
container pou sa bann dimoun
kapab met zot pake ladan.

Epi lo kote *timeline*, ki
mannyer keksoz in deroule
aköz zot pa ankor... konmsi
tender in ganny fer apre ki sa
bann dimoun in ganny tire.
Onorab, i en diskisyon ki
nou'n fer ase longman
enternman lo nou kote. Nou'n
ganny ase legzanp pandan
plizyer lannen, kot re lokasyon
dimoun i vin vreman, vreman
difisil.

E a lafen dizour i *end up*
kot Gouvernman en kantite
plis larzan ler nou'n ganny en
kontrakter nou'n *award* en
kontra, in fer vini son travayer
zot pe asize nou pa pe kapab
donn li dan landrwa i vin avek
en kantite, kantite *claim* sorti
kot kontrakter plizyer milyon
pandan lannen in ganny
depanse lo bann *site* kot i
annan bann *sitting tenants*.

So, i ti en desizyon ki
nou'n pran pou nou si i annan
loportinite e pou nou tir
dimoun komans sa; nou tir
dimoun *at least* nou konnen
enn fwa ki kontrakter in pare
pou komanse sa *site* i
available sa larzan ki'n ganny
depanse lo sa *rental* i minim
konpare *contractor claims* ki
kontrakter i abitye donn nou.

E sa i ti en desizyon, ki
mannyer mon kapab en
duplicate desizyon ki ti ganny
pran pou nou koman nou'n
ganny loportinite pou nou
kapab tir dimoun dan zot
lakaz, zot in pare pou ale.

Olye aprezan *delay* sa,
ganny kontrakter, epi i vin
ankor leskiz aköz zot pa pe
kapab sorti. nou'n pran
desizyon pou nou tir zot
deswit. E in osi ed nou pandan
tender pou nou kapab war
byen *unit as well*. Mersi.

MR SPEAKER

Mersi. Mon en pe *out of time*. Onorab Pillay, mon ava pran ou kestyon.

HON SEBASTIEN PILLAY

Mersi Mr Speaker. Mr Speaker, sa enn kestyon la in etabli poudir an se moman malgre sa bann dimoun in bouze, zot pa ankor kapab bouze. Zot pa ankor kapab tir zot bann pake. E ou sipoze annan lot *batch* ki sipoze bouze, pou ou kapab fer travay, e sa bann *container* i sipoze vin on *site*.

E ler *PMC* in dir nou son bann problem ki li i gannye akoz sa landrwa *given* son kalite teren ki i annan, son proksimite avek lanmar en *Golf Course* eksetera i annan en bann *issues regarding* sa e zot pe sa *STP*. Mon kestyon pou Minis, se ki mon pa oule dir poudir ou petet pe donn lenformasyon ki ou krwar i leka. Me ki dernyen fwa eski ou ti rann en vizit *Dolphin Court* oubyen koz avek sa bann zabitan *Dolphin Court*? Petet ti ava bon nou ganny sa miting?

E an relasyon avek *PMC* Mr Speaker, eski *PMC* i kapab konfirman lefe ki zot pe fer sa size *STP* avek zot size konmisyon mars ansanm, e zot stratezi sa - ou ti sipoze annan 2 konminyon ki pe ed zot ek sa travay. Be la lefe ki zot annan zis enn ki pe marse.

Ki mannyer zot pou kapab *cope* avek sa volim keksoz ki zot sipoze anvizaze fer Mr Speaker? Mersi.

MR SPEAKER

Mersi. Minis, oubyen ou *panel*?

MINISTER BILLY RANGASAMY

Mersi Mr Speaker. Mersi Onorab, pou ou kestyon. Onorab, mwan personnelman en pti pe letan pase mon'n vizit out sa bann lakaz, mon'n vwar sa sityasyon. E se sa rezon konmsi nou'n met bokou lanfaz. *Challenge* ki nou ti annan se kot pou *relocate* bann dimoun. Mon ti pe get tou alternativ, nou ti pe get anba kot nou ti pe fer sa proze *Le Domaine*.

Nou ti vwar *Ex Teachers* osi ti dan en move kondisyon, alors i ti pran priyorite ti annan bann konponan elektrik ki ti danzere. So, sa *relocation* ki'n pli gro defi. E finalman, nou ti pran en konversasyon etrwat avek diferan *landlords* pou vwar ki mannyer nou kapab lwe en pe lakaz - en 6 *unit* pou nou kapab kas sa proze par group 6.

So tousala, in pran en pe letan. Me selman mwan mon ti revizit *site* apepre en 2 mwan pase pou mwan regard en pti pe en pe son *external* kot nou

pou al plas bann *container* eksetera. E sa in donn mwan konfyans ki avek kalite travay ki nou pou fer ki *SIA* in antre dan anndan avek kontrakter pou analiz lanpler proze, ki nou kapab ganny akse avek landrwa, mon santi avek tou senserite Onorab ki nou pou kapab fer en bon travay e sa bann zabitan i ava ganny sa lespas koman *container* i ganny plase lo *site*. Mon ava envit zot.

Zot in korpore byen normal ziska konmela. E zot in apresye nou zefor e nou ava kapab ed zot ganny akse ek zot *container* lock tou zot bann zafer. E parey *CEO* Jitesh in dir lentansyon se pou nou demar sa proze *without fail as soon as possible*, o pli vit posib.

An prensip mon oule zis ankor enn fwa avek tou senserite remersi bann zabitan ki'n korpore avek nou. E zot in santi, zot konnen poudir nou serye zis osi i annan bann serten... i pa en travay fasil sa pou al fer travay dan lakour en dimoun. Ou bezwen annan bann plan kot ou organize, e se sa ki nou'n fer provizyon anba kontra. Mersi Mr Speaker.

Anr *PMC*. Mr Speaker, mon ava pas...

MR SPEAKER

Ou annan en repons wi, *CEO*?

CEO PMC STEVE MUSSARD

Mersi Mr Speaker. Mon ava et bref, avek repons *LOTO*. Mon ti reponn aktyelman. *STP* avek nou konminyon pou sa proze i ti napa sa maryaz avek kanmarad. Nou konminyon i la pou nou ed nasyonanman, ed nou bann *estate* kot i annan sa bann problemn ponpe ak bann problemn desarz.

Sa *STP* li parey mon pe dir ou, parey mon'n dir avan i totalman endepandan avek sa sistenm ki egziste la. Savedir nou pa neserman bezwen nou 2 transpor pou marse pou nou kapab *cope* avek *Dolphin Court*. I annan enn pe marse, mon annan enn anndan, enn i anndan aköz laponp. Ki arive sa en konmisyon i arive en pti zafer, laponp in fini *order*. So, i pou *back on the road* tre byento. Mersi Mr Speaker.

MR SPEAKER

Mersi Mr Mussard. Kestyon 123, Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi Minis ek ou delegasyon. E bonn apre midi tou dimoun a lekout. Mon kestyon i al koumsa ;

Eski Minis, i kapab dir avek Lasanble ki plan son

Minister pou anmenn lord avek respe dan lakominote, sirtou dan bann blok flat kot bokou aktivite anti-sosyal enkli bann aksyon sal e deplorab pe ganny komet dan bann *staircase*? Mersi.

MR SPEAKER

Mersi Onorab. Minis?

MINISTER **BILLY RANGASAMY**

Mersi Mr Speaker. E Onorab, mon oule remersi ou. I tre enportan sa kestyon ki ou demande tre pertinan. Sa sityasyon i serye e pe preokip nou bokou. Mr Speaker, nou tou la dan sa Lasanble nou okouran ki sa bann problem anti-sosyal ki pe pase dan nou bann blok flat dan plizyer *housing estate* dan pei. I pa akseptab.

PMC mon krwar lo medya semenn pase ti pe eksplik sa bann aktivite anti-sosyal lo medya. E i ti tap nou bokou. Mon'n vwar mwan menm me selman letan pe eksplike mon war ki lanpler sa problem i vremen serye. Nou dezapwente avek sa sityasyon. I malere pou vwar ki bann kalite aktivite lo sa ki par plizyer dimoun ki pa pe konport zot byen e dan en fason apropiye pe afekte sa bann vilaz. Pe afekte sa landrwa kot bann dimoun pe esey reste dan trankilite. Zot

bliy ki zot bezwen viv koman en vre kominote, en bon vwazinaz, koman frer ek ser.

Mr Speaker, mon Minister in fer i ankor pe fer en kantite zefor pou konstri lozman pou nou popilasyon. Depans in desote milyon rounpi larzan *taxpayers*. I sagrinn mwan, i sagrinn mwan enormeman koman Minis responsab pou lakaz pou antann e vwar sa bann kalite aktivite ki pe pase.

PMC kantmenm son resours i limite, i pe fer en kantite pou esey ankouraz bann zabitan ki pe fer sa bann problem pou sanz zot konportman. Mr Speaker, mon kapab donn ou detruwa legzanp Lasanble sa bann diferan lentervansyon ki *PMC* in fer.

Dan mon letan koman Minis, mon'n vwar *PMC* ki pe organiz omwen 2 rankont avek tou dimoun ki pe al antre dan zot nouvo *housing estate*, dan zot bann nouvo *unit*, avan ki zot antre, pandan sa bann dernyen lannen.

So, *PMC* i envit tou bann lazans konsernen tel ki *SFRSA*, *Lapolis*, *Lasante Piblik*, *Departman Lafanmir*, *Lazans Sosyal*, *Lotorite Distrik*, *Minister Ledikasyon* menm kot i annan bann sityasyon ki relye avek lekòl, pou rankontre sa bann nouvo zabitan. Sa bann rankont i

pou prepar tou dimoun ki pe al ganny en *unit* dan blok flat pou zot konpran ki mannyer pou viv ansanm.

Diferan topik i ganny aborde, e tou dimoun i tonm dakor lo la. Malerezman apre menm dan bann nouvo *units* ki nou'n fer pa tro lontan, nou vwar bann konportman anti-sosyal. *PMC* i fer plizyer miting lo bann *estate* pandan lannen, sirtou bann landrwa kot i annan serten konsern.

Lo kote ledikasyon e sansibilizasyon mon asire ki zot in vwar zot menm *PMC* pe fer bokou. Si ou a remarke Mr Speaker, *PMC* i annan plizyer bann *spots* ki pase lo *SBC* par egzant pou edik dimoun lo lenportans pou viv dan en bon vwazinaz. Tou dernyerman Mr Speaker, *PMC* in komans en travay en legzersis kot i pe komans diskite avek bann rezidan pou zot enformelman annan zot prop Komite, group pti lasosyasyon, pou zot kapab zer e *manage* zot landrwa.

Ankor en pe boner meselman, sa en larout ki nou anvi pran, pou dimoun pran zot responsabilite e kontrol zot *border* parey nou dir, kontrol zot bann blok flat sirtou e anpes bann aksyon anti-sosyal e pa ankouraz sirtou i pa neseserman sa bann dimoun ki reste la, i bann dimoun ki vini ki fer plis problem.

Lenportans se ledikasyon, avek Minister Ledikasyon eskiz mwan, nou pe fer fason pou nou fer sa travay dan lekol agresivman. E nou santi ki nou annan lespwar pou lavenir si nou atak sa avek nou bann zenn ki kapab anmenn sa lenformasyon dan lakour ki mannyer pou fer pou ankouraz bann bon konportman.

Pou terminen Mr Speaker, mon oule fer resorti ki malgre tou zefor *PMC* e mon Minister konportman serten dimoun ki viv dan *housing* osi bann ki frekant sa bann *estate* i senpleman deplorab. dimoun fodre i annan respe pou kanmarad e respe anver zot propriyete. Sa zafer pa zis en problem mon Minister Later ek Lakaz e *PMC*. I enplik Lotorite Distrik, Lapolis, bann departman tel ki Lafanmir, Ledikasyon, Sosyal e bann zabitan zot menm ki pou kapab rezourd sa fleo.

Nou pa kapab anvoy tousala lo ledi *PMC*. Nou bezwen pran en lapros lager antoure e byen kordinen. E sa mon lans sa lapel avek zot tou bann Manm Onorab, parske sa mon asire dan tou zot distrik zot war sa fleo. Annou ini pou nou fer en diferans pou byennet nou zanfane ek pti zanfane demen. Nou pe kont lo zot. Mersi Mr Speaker.

MR SPEAKER

Mersi Minis. Onorab Bastienne, ou annan siplemanter?

HON DESHEILA BASTIENNE

Minis, mersi pou ou leksplikasyon byen detaye. E sa mesaz osi ki ou'n anvoye pou tou bann zabitan, bann endividi ki pe komet sa bann keksoz. Selman mon ti pou anvi felisit ou Minis avek ou tim, pou sa travay ki zot pe fer atraver medya konmela la - preski tou le swar lo medya, kot zot pe gid bann zabitan ki dan bann *housing estate* lo sa bann kontak direk ki annan pou fer avek bann problem ki devlope dan zot flat pou zot kapab ganny sa lasistans pli vit posibil. Mersi pou sa linisyativ ki pe ganny deroule.

E mon kestyon i al koumsa. Minis, vi ki tou dernyerman i annan serten endividi ki pe komet bann aksyon deplorab, e mon pou dir vreman deplorab Minis. Mon krwar sa osi in ariv dan zot latansyon. E la letan nou pe koze i konpri ziska malpropte dan *staircase*.

Eski pou annan, wi, ou pe dir dan ou repons pou annan sa travay ki pou sanz direksyon la ki pou ganny fer avek diferan lazans tel ki *Public Health* li menm, e osi en travay pli pre avek lapolis, kot

zot pou kapab travay ansanm avek Lotorite Distrik pou kapab pou arive met en lafen avek sa bann aksyon deplorab?

E osi Minis, apre vi ki ozordi *staircase* i ganny konsidere koman *common area*. E sa i osi fer ki dan serten *staircase*, i reste sal, e person pa oule pran responsabilite. E ankore annan dimoun ki kontinyelman - menm dimoun ki kontinyelman repet menm lofans, i soutir lezot dimoun an deor vin asiz dan *staircase*.

Eski ou Minister pe mazin vin avek nouvo Polisi, lo fason mentenir bann *staircase* an se moman. E osi dan bann nouvo flat ki pou ganny fer a lavenir? Mersi.

MR SPEAKER

Mersi Onorab. Minis?

MINISTER**BILLY****RANGASAMY**

Mr Speaker, kestyon Onorab i en pe lour. Selman mon ava demann *CEO PMC* pou adrese. Si i annan lezot pwen mon ava azoute. Mersi.

CEO PMC STEVE MUSSARD

Mersi Mr Speaker. Mersi Minis, pou donn mwan laparol. Onorab i enteresan sa ki ou'n dir, vreman, vreman enteresan. E mon asir ou ki tou Onorab la i war menm

zafer dan zot distrik. Ki nou pou fer Onorab? Ou konnen i annan en kantite keksoz ki *PMC* i angaze ladan. Bann keksoz - par ler nou fer keksoz an deor nou manda, selman nou fer li aköz nou anvi ki landrwa i reste konmsi en landrwa reste kominote parey nou dir.

Anyway, pou reponn ou kestyon lo *staircase*, wi, *staircase* i ganny koni koman *common area*. Nou annan program ki nou apel sa *ground maintenance* ki enkli *staircase* tou ladan. Selman sa nou fer li tou le Lendi. Tou le Lendi kontrakter ki ganny *assign* sa landrwa i pase i pas *staircase* i monte desann pou netwaye. *Most of the time* nou anmas nou bwat *juice*, pake *twisties*, ou konnen bann salte ki pa merit la.

Sa kontrakter li dan son manda i sipoze zis vini pas en pti balye, konnen kit sa landrwa en pti pe prop, i war li inonde avek keksoz ki dimoun i kit dan peron. Ou konnen aköz ou kestyon in fer resorti sa, dimoun i reste dan peron, i fer groupaz dan peron. E zot kit zot bann bout sigaret... ou konnen ki pase laba, mon pa bezwen nonm li nasyonalman la. Me nou pa kapab fer plis ki sa Onorab. Fransman dir ek ou i kout nou bokou. I kout nou bokou pou fer sa bann kalite netwayaz.

E si ou pou dir ek mwan fer sa toulezour ouswa tou le semenn la nou Bidze pou al *skyrocket* ki mon pa ni pou kapab kontrole. I pou limit nou lo kwa ki nou kapab fer lo lezot travay renovasyon desarz eksetera. So, i annan sa, me, me, sa ki Minis in dir sa dernyen pwen ki Minis pe dir dan son larepons. Sa laspe kot nou pe sey angaz bann dimoun ki viv dan blok flat pou annan en pti Komite, en pti lasosyasyon parey Minis i dir.

Sa i zisteman nou pe sey anmenn sa pouvwar ek zot. Aktyelman zot annan sa pouvwar zot landrwa reste. E zot merit pe osi donn sa koudmen, annan en regar lo zot landrwa, annan regar lo *staircase*, annan regar partou, annan regar otour lakaz, otour blok flat. E si sa i marse ki nou annan bokou lespwar. Mwan mon annan lespwar ki i pa demen. Me selman dan lavenir ki i pou marse, e nou pou donn sa dimoun sa lotorite, sa pti Komite ki zot a formen.

E mon espere ki ler sa formelman, la nou pe fer li enformel. Ler nou pe fer li formel, i ava en pti pe plis ledan pou zot morde. E nou a war en pti pe plis lord e kontrol dan bann blok flat. E mon krwar mon'n tous en pti pe pou reponn ou kestyon. Mon

pa konn Minis si i annan.
Mersi Mr Speaker.

MR SPEAKER

Mersi. Mon vreman regrete - mon annan en kantite dimoun ki'n lev lanmen. Vreman mon war poudir i en kestyon enportan pou en kantite zot klarifye. Mon a pran kestyon Onorab William.

HON WAVEN WILLIAM

Mersi Mr Speaker. Minis, par lefe ki sa size ki nou pe aborde ozordi i en size ki'n monte souvan dan bann miting piblik. E i en konsern ki si Gouvernman pa adrese - letan mon pe dir adrese, se ki ou annan en problemm avek *enforcement*, epi ou annan en problemm avek *the rules of the estate* li menm li ki demann re vwar.

E petet mon sizesyon i se ki avek bann nouvo *estate come up* avek en nouvo keksoz ki dimoun i komans *abide*. Akoz si non demen bomaten parey pe arive deor, nou pou annan bann krim. E Minis, mon konsernen - mon a demande ki nou elarzi sa diskisyon regarde ki fason nou a kapab met sa anba kontrol, akoz ozordi vre dan tou bann *housing estate* i annan sa problemm. E parey mon dir i se ki *we have to do something about it*. Mersi.

MR SPEAKER

Bon, mon krwar sizesyon Minis, annou regarde si nou kapab elarzi sa diskisyon. Mon pa konnen si an se moman oule adres komanter Onorab William? I napa en kestyon spesifik ki'n en sizesyon.

MINISTER

BILLY

RANGASAMY

Mr Speaker, mon kontan sa kontribisyon ki Onorab William in partaze. Parey mon'n dir dan mon larepons i pa zis en keksoz *PMC* avek Minister. I en lager antoure ki nou bezwen fer. E petet nou a bezwen rod en loportinite pou nou fer en dyalog vreman aprofondi avek tou bann akter konsernen, pou nou adres sa sityasyon.

E parey ou pe dir dan tou bann nouvo *housing estate* met bann nouvo Polisi an plas, bann nouvo stratezi pou nou fer bann lasosyasyon ki bann dimoun a kapab pran kontrol zot *unit*, zot blok - eskiz mwan. So, i annan en pe travay i pou bezwen travay entegre - i pa pou zis kapab zis en group. I bezwen nou tou. Mon demann sa lapel tou bann Manm Onorab, parske sa i en size tre enportan.

E i afekte bann zanfan ki pe grandi, bann nouvo zenerasyon ki pe vini. Bokou larzan pe ganny depanse pou refer sa bann *unit*. Ler mon

war *SIA* pe asize ziska tar pe fer bann *design*, kontrakter pe travay dir apre nou vwar bann rezilta ki vini apre, i pa fer sans.

Nou pou al tonm dan en sityasyon danzere parey ou'n fer sorti Onorab. Me mwan ma fer li mon langazman pou mwan kordinen ek mon bann teknisyen pou nou met bann dimoun ansanm. E fer en lager, parey mon pou repet sa mo nou bezwen lager antoure. Mersi Mr Speaker.

MR SPEAKER

Mersi. Nou ava avans lo kestyon 124. E mon eskize mon pa pou kapab pran siplemanter lezot manm lo sa kestyon, pou nou kapab terminen. Onorab Hoareau.

HON JOHN HOAREAU

Mersi Mr Speaker. Mersi Mr Speaker. Bonzour Mr Speaker. Bonzour Minis ek ou lekip. Bonzour tou dimoun a lekout. Mon kestyon i lir koumsa. Eski Minis, i kapab dir Lasanble ki defi son Minister pe rankontre pou konplet proze *re-roofing* dan bann flat ki'n kouver avek twil dan Nouvelle Vallée? Mersi.

MR SPEAKER

Mersi. Minis?

MINISTER **RANGASAMY**

BILLY

Mersi Mr Speaker. Mon remerci Onorab pou son kestyon. Wi, Onorab, a plizyer repriz pe pouse pou sa proze ganny konplete enn fwa pou tou. Mr Speaker, sa proze ki Onorab pe fer referans parey nou dir i size sa bann twil oubyen sa bann *concrete tiles* lo 8 *unit* lakaz Nouvelle Vallée dan distrik Beau Vallon.

I vre ki *PMC* in rankontre serten defi pou komans sa proze, ki mon ti a voudre kapab eksplike avek ou permisyon Mr Speaker. Mr Speaker, malgre tou zefor ki nou'n fer pou nou materyaliz sa proze letan *PMC* ti fer *tender* pou sa proze, e baze lo tou le 8 *unit* an Desanm 2023 ler *tender* ti konplete, evalyasyon ti ganny fer, *PMC* ti apros sa 8 propriyeter pou nou vwar ki mannyer nou pou partaz sa kou.

Parske pa bliye mon pa konn spesifikman sa enn *to be honest with you* - me selman lamazorite sa bann lakaz i plizyer lannen e bann propriyeter i annan zot lakaz. So, an prensip nou'n anba sa *tender* nou'n ekspekte ganny pri pli konpetitiv parske nou pe get lakantite proze ki nou annan pou fer, avek lakantite lakaz ki nou annan pou kouver.

Malerezman Mr Speaker, laplipar bann zabitan pa ti dakor avek pri ki zot t' in

resevwar. E an rezilta sa *PMC* pa ti kapab fer kontrakter komanse. Alors Mr Speaker, pou ganny en konpromi e fer ki sa proze i kapab bouze, *PMC* ti rezwenn sakenn sa 8 propriyeter endividuelman.

Nou'n asize nou'n revwar lalis bann louvraz pli kritik pou nou kapab ganny lagreman pli konkret avek zot tou. Apre sa legzersis ki'n pran en pe letan, 5 dan 8 sa bann propriyeter ki'n finalman agree pou form par sa proze. Swivan sa Mr Speaker, *PMC* in finalman kapab fer kontrakter mobilize, mon konpran en pti pe pli boner sa lannen, an Me, 2025.

Mon ekspekte ki tou travay i ava fini o pli vit posib, si tou keksoz i mars byen. Dezir se pou konplet sa travay avan sezon lapli preferableman avan lafen Zilyet sa lannen. Mr Speaker, mon oule pran sa loportinite pou remersye sa kontrakter ki'n ase fleksib e konpran sa bann difikilte e pasyante avek nou.

San kwa *PMC* ti pou bezwen *re-tender* sa proze. E mersi ki nou'n kapab adres sa atraver en bon lantant ek kontrakter. E mon anvì remersi osi bann propriyeter prive ki'n korpore pou nou kapab progres e fer sa proze vin en realite. Mersi Mr Speaker.

MR SPEAKER

Mersi Minis. Onorab Hoareau, siplemanter.

HON JOHN HOAREAU

Mersi Minis, pou ou larepons ki ou'n donn mwan. Minis, mon oule ou ed mon konpran sa en pti pe - anvì ki i annan serten landrwa kot zot pe fer *re-roofing* avek preski menm sityasyon, nou vwar ki i annan bann zofisye ou Minister ki ale ki al vizit sa bann dimoun - al assess sa bann lakaz plito.

E *according to* sa *assessment* i kou en pri. *Whereas* ki Nouvelle Vallée mon'n ganny serten konplent ki napa personn ki'n vin fizikalman lo teren pou assess bann lakaz endividuelman pou vwar ki kantite defet si oule - kantite pouri i annan dan bann dibwa ensidswit, pou kapab donn en pri ki rezonnab. Sa premye keksoz ki bann zabitan in fer resorti.

E dezyenmman Mr Speaker, mon ti ava kontan konnen si dan zot lagreman, eski si lakaz pa ankor fini ganny peye, eski i pa ankor ganny transfer lo sa propriyeter plito i pa ankor fini ganny peye, si sa kou i tonm lo sa propriyeter oubyen i tonm lo Gouvernman? Mersi.

MR SPEAKER

Mersi. Minis?

MINISTER **BILLY**
RANGASAMY

Mr Speaker, avek ou permisyon, mon a les CEO Mussard eksplik en pe pou reponn kestyon Onorab.

MR SPEAKER

Mersi Mr Speaker. Mersi Onorab, pou ou kestyon. Onorab, premye 2 kestyon ki ou'n demande. Premye kestyon *assessment* si nou al vizit sa bann lakaz. I pa toutafe korek ki ou pe dir, aköz pou nou kapab *build* sa *tender* ouswa sa *bill of quantities* nou bezwen lo teren, nou bezwen vin kot sa bann dimoun. Nou bezwen vwar sityasyon ki manner i ete.

So, i annan sa legzersis. Mon kapab konfirm ek ou poudir i annan sa vizit ki'n ganny fer kot tou sa bann lakaz avan *tender* pou nou kapab konpran lanpler louvraz, dalo, *flasher board*, kwa ki pou sanze, ganny en dyalog ek bann dimoun. Zot osi zot in fer plafon anndan osi tou. So, tousala in ganny fer avan *tender*. E sa mon konnen in ganny fer.

E dezyenmman, dezyenmman ler nou fini fer sa *assessment* lo *site* ler nou'n fini fer sa *BOQ*, nou *tender* dapre sa lalis travay. Nou *tender* dapre sa lalis travay. E ler pri in antre, nou'n fer

evalyasyon ler nou'n ganny sa *the best bidder* parey nou dir, *the best evaluated bidder*. Byensir, nou bezwen dir sa bann dimoun aköz *scheme* se ki zot ki peye.

Ler nou'n diviz sa nou'n fer kalkilasyon sa 8 lakaz, la kot i annan en pti pe konsern ki sa bann dimoun ki pri i pli ser ki zot lakaz. Lakaz nou ti aste, kou pou ou ranplas sa twatir i plis ki zot ti pey sa lakaz.

Ti annan en lot lenstans kot zot ti anvi en *structural assessment* ganny fer lo zot lakaz. So, ti annan en kantite diskisyon *back and forth* avek sa bann dimoun. So, mon kapab konfirm ek ou la poudir sa nou ti annan kontak direktman avek sa bann dimoun, sa 8 dimoun.

E i zis ki i annan bann ki pa'n anvi antre lo sa *scheme*. Nou'n ganny zis 5 finalman, ki'n agree pou zot antre anba sa kontra pou nou kapab fer sa travay. Erezman kontrakter in konpran nou, CEO SIA ti fer sorti bomaten ki kalite penalti nou ti kapab peye si nou ti bezwen *retender*, kennsel sa kontra eksetera, eksetera.

So, *anyway* nou pe konfirm ek ou poudir i annan sa dyalog, i annan sa vizit, i annan sa bann antretyen avek sa bann zabitan. Lo kote *HP* si ou pe aste ou lakaz, si mon pa tronpe mon krwar zot tou in

fini pey lakaz laba. Si non petet i annan enn dapre lenformasyon ki mon annan tou in fini peye. E si i annan enn ou 2 ki anba *HP* i son lakaz, i son lakaz i pou bezwen peye. I pou bezwen peye *sorry* - i pou bezwen antre... osi i ganny trete parey i ti'n fini aste sa lakaz. Mersi Mr Speaker.

MR SPEAKER

Mersi *CEO*. Mon a zis retourn en pti moman lo kestyon 123. Minis in dir pou al elarzi diskisyon avek bann lezot lotorite ki konsernen. So, mon zis anvi asir Minis ki i annan en kantite lentere dan sa size vi lakantite Manm ki'n lev lanmen. So, si i ti en lokazyon pou li kapab retourn dan Lasanble pou fer en *statement*, mon asire i ti pou *welcome*.

Nou bezwen termin la. Mon konnen i annan miting ki'n programen. Defans ek Sekirite in alert mwan ki zot annan en miting. Nou annan osi miting *Assembly Business Committee*. Mon pou demann zot pou fer en zefir pou pa an retar, pou nou kapab rebran fini a tan pou nou rebran 2er.

Mersi Minis, ek ou delegasyon. Mersi bann Manm pou zot kestyon. E mon swet tou dimoun bon depar. Nou a rebran travay 2er.

(BREAK)

MR SPEAKER

Bonn apre midi tou dimoun. Pou en travay ozordi apre midi, nou annan *Second Reading, Private Members Bill Penal Code (Amendment) Bill, 2025* e dan non Onorab Churchill Gill. Mon a ganny Mosyon pou *Second Reading*.

HON CHURCHILL GILL

Mersi Mr Speaker. Bonn apre midi tou Manm. E tou dimoun ki pe ekout nou. Mr Speaker, anba *Order 69 (2)* mon pe demande ki *Private Members Bill of Penal Code (Amendment) Bill No.3 of 2025*, i ganny lir pou en Dezyenm Fwa. Mersi.

MR SPEAKER

Mersi Onorab. Segonnman, Onorab Pillay?

HON SEBASTIEN PILLAY

Mersi Mr Speaker. Mon segonn sa Mosyon.

MR SPEAKER

Mersi. Mon ava apel Onorab Gill, pou fer lentrodiksyon son *Bill*.

HON CHURCHILL GILL

Mersi Mr Speaker. Mr Speaker, mon a komans par donn leksplikasyon lobzektif rezon det *Penal Code (Amendment) Bill, 2025*. Mr Speaker, an 2024, Lalwa Kod Penal Sesel ti ganny amande

pou klasifye *hate speech* koman en lofans kriminel pa enkli '*political affiliation*' koman en '*protective characteristic*', menm si lentansyon deryer sa lamannman 2024 ti donn lenpresyon pou ede anpes diskriminasyon efektivman kanmoufle oubyen maske vre lentansyon pou ganny servi pou met en lafen avek *freedom of speech*.

Mr Speaker, laliberte lekspresyon i kle dan en demokrasi modern. Ladministrasyon LDS, i klerman vyol sa drwa tre fondamantal pep Seselwa. Si sa i sa menm LDS ki ti promet pou fer tou keksoz *above board* dan sa pei? LDS in sistematikman anbet sa pep, e zot ti konn tre byen ki zot ti pe fer. Ozordi Seselwa dan son gran mazorite, piblik an zeneral e lezot parti prenon pe vreman trakase Mr Speaker.

Zot preokipasyon se ki sa Lalwa ava ganny manipile, e ganny servi pou detri deba politik tre o nivo, fran tou an respektan lopinyon divers. Mr Speaker, dapre nou Konstitisyon dan en sosyete demokratik i devret annan deba lib e fran, ki dan li menm i en *cornerstone* pou bon gouvrenans. *Freedom of speech* i fondamantal, e *hate speech* pa kapab ganny servi pou anpes dimoun eksprim

zot lopinyon politik, lezitim libreman.

Lobzektif prensipal sa *Bill*, se propoze pou revwar lofans *hate speech* anba seksyon 96(2) Penal Kod Sesel. Mon pe propoze pou retir '*political affiliation*' dan lalis '*protected characteristic*'. Mr Speaker sa se pou asire ki nou Lalwa i protez diskriminasyon san ki okenn nou bann laliberte demokratik esansyel i ganny forseman konpromize.

Parey nou tou nou konnen, *speech* oubyen deba politik mazorite fwa i kapab entans e kontansye. Me sa i lesansyel pou en langazman efektif. Mr Speaker, sa i vre rezon aköz ki mon pe propoze ki '*political affiliation*' i devret ganny tire dan lalis '*protected characteristic*.' Anba provizyon *hates speech*, dan sa fason i ava anpes labi ki kapab potansyelman touf deba politik ki tre enportan.

Avek mon propozisyon, i ava kre en lanvironnman pli demokratik kot diferan lide politik ava kapab ganny eksprimen dan en fason lib, san lenterferans okenn oponan, dirizan politik.

Mon lamannman ki'n ganny propoze, i klerman demontre komitman Manm Lopozisyon *United Seychelles* dan Lasanble Nasyonal, anver bann Prozedlwa ki pa neseserman anmenn devan

pou protez nou zenn demokrasi. An menm tan, pou asire ki nou reazir avek bi mentenir en balans an proteksyon sitwayen kont *hate speech* tou an prezerv an sa latmosfer vibran, demokratik, *agree to disagree*.

Mr Speaker, aprezan permet mwan bouz lo laranzman bann seksyon dan sa Prozedlwa. *Short title (1)*

This Act may be cited as the Penal Code (Amendment) Act, 2025. Section 89(b) of the Penal Code (Cap 158) is amended by inserting a new section 5 after section (4) as follows; "for the purpose of this section political affiliations shall not apply and is excluded from the definition of protected characteristic." I hence submit Mr Speaker. Mersi.

(APPLAUSE)

MR SPEAKER

Mersi Onorab. Onorab Gill, in pran egzakteman 5 minit pou prezant son *Bill*. Ki mon krwar i byen akòz in vin avek en sel pwen. *Focus in* en sel *issue* ladan. Donk, mon annan lide fini avek sa *Bill* ozordi, akòz i annan en kantite lezot biznes Lasanble ki pe *pile up*. Donk, mon pou propoze ki lentervansyon bann Manm i ganny limite pou 10 minit.

E sa i ava doub sa ki Onorab Gill in servi. Mersi.

Onorab Pillay, segonder, ou pou pran laparol la?

HON SEBASTIEN PILLAY

Avek ou permisyon Mr Speaker, mon a pran laparol pli tar Mr Speaker. Avek ou permisyon mon kapab pran laparol pli tar? Mersi.

MR SPEAKER

Pli tar wi. Byensir parey... Onorab Loze in pare pou adrese. Onorab Loze.

HON JOHAN LOZE

Mersi Mr Speaker, mon a sey gard ou gidans Mr Speaker pou et kourt. Mr Speaker, travay ki devan nou i konsern leksitasyon vyolans baze lo prezidis. Be i osi konsern leksitasyon vyolans ant manm sosyete, ant sitwayen, ant sivilyen avek kanmarad.

E sa i annan pou fer lo lafason ki nou agree pou form nou sosyete pou fer konversasyon tenir deba e diskour avek kanmarad. Mon krwar travay devan nou ozordi, i pa enn konplike. I en keksoz ase senp. I - mon pou servi parol Onorab Ferrari - nou annan en diferans filozofik ant sa 2 kan dan Lasanble ozordi. Mwan personnelman mon krwar si afilyasyon en dimoun okenn dimoun i devret ganny proteze, i devret ganny proteze fas avek Gouvernman nenport ki

Gouvernman. Mon pa pe koz Gouvernman *LDS* la.

Si sitwayen i bezwen proteksyon fas avek son afilyasyon politik, sa proteksyon i devret vin kont Gouvernman. Me i pa devret annan en proteksyon egzazere ki pou anpes diskour e deba ant sitwayen.

Prezan nou al lo sa zafer prezidis ki kapab ensit vyolans. Enn bann largiman ki mon konnen pou ganny avanse se ki, afilyasyon politik i pa kouver neserman politisyen ouswa zis politisyen.

Me i ofer en *blanket protection* tou sa ki afilye li avek en form politik ouswa en note. Me se zisteman sa kot pwen kontansyon i leve. Mon pa krwar i nesaser. Nou absoliman pa krwar ki sa i nesaser lo nou kote latab Mr Speaker. E rezon ki nou pa krwar i nesaser set aköz letan ou get bann proteksyon ki ganny ofer, sa bann karakteristik proteze la i bann keksoz ki an Angle ou dir swa i *mutable* dan lesans ki pa kapab sanze - *unchangeable*, ou, ou pa kapab sanze.

Ouswa i en keksoz ki prive pou ou, i dan ou domenn prive. Mon ava eksplike ki mon pe koz lo la Mr Speaker. Ras en imen i en karakteristik proteze. E i devret en karakteristik proteze, pa

kapab sanze sa. Si ou Endyen, ou endyen. Si ou Afriken, ou Afriken, ou pa kapab sanz li ou.

Ou'n ne koumsa, ou napa en swa ladan. E pou prezidis ganny fer kont ou fas a en karakteristik ki enn ou napa en swa ladan, dezyenm ou pa kapab sanze, e en ensitasyon vyolans i vini gras a sa, wi, ou devret annan serten proteksyon sirtou si ou form parti en minorite, sirtou si ou form parti en minorite. E sa i tonm dan bann kot mon dekrir koman ou pa kapab sanze.

Be ou annan lot. Sesel nou viv dan en sosyete laik, sa ki an Angle ou dir en *secular state* – en sosyete sirkiler kot ou annan ou en diferans ant Leta avek larelizyon. E si ou get ladan, anba karakteristik proteze ou vwar larelizyon, krwayans relizyez. Be li i kler li, sa i ou swa prive sa i konsern ou desizyon prive li. I napa en lenpak sosyeter li, e Konstitisyon Sesel i garanti en kler separasyon. Ou larelizyon i ou *private business*. E wi, ou devret ganny proteze pou en keksoz ki konsern ou. I ou swa moral, i ou biznes prive, i konsern ou i pa konsern personn ankor.

So, sa 2 kategori ki mon pe koz lo la, i en keksoz ki ou pa kapab sanze avek en keksoz ki prive pou ou. Si ou

pou al pli ba ou war dezabilite i en karakteristik proteze, ou pa kapab sanze.

Ofet dan sa Lasanble nou'n toultan annan sa bann deba konsernan bann kriter Sekirite Sosyal anba bann benefis statiter, kot ler en dimoun in perdi en lazanm ou pe dir li retournen pou fer *review* dan 6 mwan, dan 3 mwan, dan 9 mwan. E mon konnen nou annan koleg Onorab ki'n toultan ofanse par sa, i dir be sa dimoun serye i pou pous sa lazanm li dan 6 mwan? I pou annan en lot lazanm? I *disabled*.

So, sa i en karakteristik sa dimoun pa kapab sanze la li. Son dezabilite in vin *immutable*, i pa kapab sanze. E wi, i *deserve* serten proteksyon, akòz ki i pou fer? So, sa i en pe sa ki mwan mon anvi eksplòre dan keksoz ki prive pou ou. E sa ki ou pa kapab sanze.

Ou annan osi bann kestyon karakteristik seksyèl, *gender*. Mon dir zot fransman, mwan mon pa vreman kler lo la parske *gender* i pa en keksoz ki mon krwar in ganny eklèrsi. I kler dan Lalwa Sesel li menm. Mwan mon pa ankòr vwar ziska prezan sa zafer *gender*. E mon pa oule al komet bann fot kot mon al koz lo seksyalite biolojik, *as opposed to gender*.

Me selman *again* i prive li. I prive, i konsern ou, i ou lavi. E ou *deserve* serten proteksyon pou sa. Me la prezan i anmenn mwan lo afilyasyon politik en sitwayen. Be ou afilyasyon politik li par sa mo li menm politik, i dir ou ki kalite bebet i ete li. Politik i sa bebet ki dikte Polisi. E Polisi se li ki *rule* nou lavi. Si en Lalwa i vini dan Lasanble in forseman annan en Polisi ki'n ganny met an plas kekpar ki'n fer ki sa Lalwa in vini.

Polisi i dinyite lafason ki nou viv dan pei, dan sosyete. Si ou annan ou en parti politik sosyalis ki li i krwar fermeman dan *welfare*, son Polisi i pou favoriz *welfare* ver sitwayen. Si ou annan ou en parti politik neoliberal ki li i favoriz biznes, son Polisi pou fortman an faver biznes. Be i pa prive sa, napa naryen prive ladan. Ou politik i dinyite Polisi ki enpakte lavi nou tou dan sosyete.

Si pou annan deba lo politik, i deba ki pou enflyans Polisi ki pou enpakte lavi nou tou. So, politik i pa prive sa, i ou swa wi. Me i pa prive li, i pa parey ou seksyalite. Be prezan annou fer legzersis pli lwen, annou kestyonnen. Be eski i pa sanze, i *immutable*? Be nou tou nou konnen ki i sanze. Mr Speaker, dan sa sez kot ou ete la anler ou konnen i sanze.

Si ou get tou sa dimoun ki ti pe tay deryer *LDS* 2020, in pran lakantite zot ki ozordi i ay *LDS*, i kler poudir swa preferans, afilyasyon politik i en keksoz ki sanze. I sanze i pa reste parey. I pa en keksoz ki ou napa en kontrol lo la, ou annan ou. Ou annan en kontrol. Be mon pe rode ki mannyer nou kapab defann e eksplike ki i la koman en karakteristik proteze kont prezidis. Ki prezidis ou kapab annan kont en swa piblik, ki en dimoun i fer dan gran kler? Ki enpakte lavi nou tou, e ki li menm avan senkantmaten i kapab sanze pran en lot.

Be ki prezidis ki annan kont sa? I pa en koko ki tonm lo son latet par aksidan sa, i pa en keksoz ki ganny forse lo li. Sa endividi i konnen ki'n fer li, in fer li en swa, en swa ki kapab enpakte son lavi, e lavi lezot pou bon rezon ou pou move rezon, be i son rezon e in fer li.

E sa i *subject to debate* nou koz lo la, nou diskite, nou flank dife parol ladan, nou batiz li avek mo.

MR SPEAKER

Sote 10 minit Onorab.

HON JOHAN LOZE

Mon demann ou leskiz Mr Speaker. *Sorry* mon en pti pe *impassioned* lo sa size, mon ava zis *warp up*.

So Mr Speaker, mwan mon ti le zis konsantre lo sa bout, e mon largiman i tre senp, ki sa zafer ki afilyasyon politik i pou tou dimoun ki siport en parti politik i ganny akorde sa proteksyon. Be proteksyon i kont prezidis, ki kapab ensit vyolans kont ou.

Pa kapab annan prezidis kont en keksoz ki ou kapab sanze, avan senkantmaten ou sanz li koman pti kannson, pti lanmores lo ou *at a whim* ler ou anvi ou sanze.

2020 ou siport *LDS*. 2025 ou siport ou fini ay li. E i pa prive non pli. Mersi Mr Speaker, mersi pou lendilzans pou sa de pti minit an plis.

(APPLAUSE)

MR SPEAKER

Bon, napa lot Manm ki annan lentansyon *ok*. Manm mon pe al donn Onorab John Hoareau, laparol mon pa tro dakor avek sa zafer espere espere pou Speaker, demann ou si anvi.

I ou responsabilite pou ou lev ou lanmen so, nou a pran Onorab Hoareau. Antretan konsidere bann ki anvi pran laparol. Onorab Hoareau.

HON JOHN HOAREAU

Mersi Mr Speaker. Bonn apre midi Mr Speaker, bonn apre midi tou koleg ki la dan

Lasanble, e tou dimoun ki pe ekoute.

Mr Speaker, an 2024 nou ti anmenn en lamannman dan Kod Penal, e nou lamannman sete pou etabli ki *hate speech* i vin en lofans. E osi si par kont ou servi karakter proteze pou ou denigre en dimoun, oubyen pou ou promet li pou dir ou pou bat li, oubyen ou bat li i fer ki sa lofans i vin *aggravated offence*.

Anba Kod Penal 235, seksyon 235 avek 236 i koz lo ki penalti ou kapab gannyen si ou fer *common assault* oubyen *bodily harm*. *Common assault* i dir ou 2 an prizon, e *bodily harm* i up to 7 years imprisonment.

E ki sa lamannman ki nou ti anmenn en 2024 ti fer? Ti fer ki si par egzant, ou fer en *common assault*, e par kont ou promet sa dimoun pou dir mon pe bat ou akòz ou afilyasyon politik akòz ou sipòt LDS, akòz ou met en triko LDS, i fer ki sa dimoun sa lofans i ganny *aggravated*.

Mr Speaker, mwan ler mon pe get sa lamannman ki'n ganny anmenn en par Onorab Churchill Gill, mon vwar en lasenn, oubyen en lafimen deryer ki sorti kot son *Leader*.

Akòz mon pou dir sa? Akòz son *Leader* i krwar pou dir i pe antre an puvwar an 2025 le 27 Septanm, alor, dan li se ki anmenn en Lalwa dan

Lasanble pou fer ki afilyasyon politik pa ganny proteze. E dan sa ka parey i ti promet dimoun, i ava bat ou, i ava met ou anba en pon si ou vin de proze debout devan li.

Mr Speaker, pa pou marse sa akòz, *there's no turning back*. Nou pa pe retournen sa bann kalite keksoz, bann viktim bann viktimizasyon ki ti annan dan lefase.

Mr Speaker, si nou get ki ti arive an 2014 - 2014 SNP ek SUP ti anmenn en *joint constitutional case against Public Order Act*. E dan sa Lasanble ti annan menm dimoun ki ti vote nou *Public Order Act*.

E *Public Order Act*, ti sa Lalwa ki ti anpes ou rasanble, ki ti anpes ou koze. E nou nou'n tire sa Lalwa, ozordi zour in ganny ranplase par *Public Assembly Bill*.

Sorry, *Public Assembly Act*, e *Public Assembly Act*, i permet ou *gather* i permet ou koze. Alor se pa zot lot kote latab ki'n anmenn *freedom of speech* Sesel. Se nou ki'n anmenn *freedom of speech* Sesel.

Mr Speaker, sa lamannman ki'n vini la ozordi i pe koz lo i pe koz lo en keksoz ki vreman, vreman, vreman danzere. I pe koz lo pa met afilyasyon politik koman en *protected characteristics*.

E ler nou get anba lamannman ki nou'n anmennen, anba seksyon 5 Penal Kod, nou vwar i annan diferan kalite *protected characteristic*.

I annan ras, larelizyon, dezabilite, loryantasyon seksyel, ou *genre, sexual characteristic, political affiliation*, e osi pou bann dimoun ki pe pase kot lakour ki pe petet koz lo en larelizyon, ki pe sey anmenn ou dan en serten larelizyon.

So tou sa bann kategori dimoun i ganny proteze anba sa Lalwa. I ganny proteze pou en sel rezon. Se ki nou pa oule demen en dimoun i servi sa liberte ki'n gannnen pou li koze pou li senm laenn, pou li senm vanzans, pou li detri karakter, e denigre personnalite dimoun.

Alor, se sa ki sa Lalwa pe-sa Lalwa ki nou ti anmennen an 2024 i proteze. Ozordi zour nou pe ganny dir pou retir sa aköz?

Akoz zot, zot anvi retourn viktimizasyon dan sa pei, zot anvi retournen retourn ler en dimoun ti met en triko parti politik i ti ganny bate, i ti ganny torture, e menm touye dan serten sans.

Mr Speaker, mon le ki nou endifye sa pep. Annou fer sa pep konpran pou dir *freedom of speech* i al avek en responsabilite. Ou pa kapab

servi *Facebook*, ou pa kapab servi okenn lezot medya pou zis denigre personnalite, e dimoun.

Wi, ou kapab koze, ou kapab dir sa ki ou le, e ozordi zot tou zot kapab dir sa ki zot le. Personn pa'n zanmen ganny met dan prizon aköz sa ki'n dir.

Me par kont si ou ensilte, e ou denigre dimoun, e ou *threaten* dimoun par sa ki ou pe dir sa wi i vin en krim. Ki annan mal ladan?

Lot kote latab mon pa kapab konpran kwa ki zot vwar i mal ladan. I zis ki zot anvi senm laterer dan sa pei. Zot anvi re met nou an aryer, zot anvi fer per sa pep, zot ki'n anvi an siprim lekspresyon sa pep.

Akoz atraver sa provizyon lamannman, zot pou siprim proteksyon ki nou pe mete lo sa bann dimoun.

Mr Speaker, i annan dimoun ki'n met en triko politik, ki'n desann anvil dan en serten letan ti ganny bate demi mor, e *case* i ankor lo *TRNUC*.

Nou'n vwar en kantite keksoz koumsa ki'n arive, nou pa oule retourn an aryer. Nou pa oule sa i ariv ankor. E ankor pou bann dimoun ki koz lo *human rights* ki vin lo televizyon, ki koz lo *human rights* la, sey eksplik sa pep san bann *protected*

characteristic ki fason i protez zot i protez zot drwa imen.

E semenn pase ler Onorab Gervais Henrie, ti anmenn son *Bill* zot ti demann li, “eski ou’n fer konsiltasyon avek dimoun lo sa *Bill*? Eski ou’n fer konsiltasyon avek bann lezot parti prenan?”

Be zot, eski zot in fer ozordi konsiltasyon avek okenn parti prenan pou anmenn en *Bill* parey? Mr Speaker, mwan mon pa krwar pou dir sa *Bill* nou devret pran letan pou nou vin koz ankò lo sa *Bill*.

Parski sa *Bill* i napa en bon lentansyon, i en *Bill* ki napa relevans. E an Septanm 2025 sa kalite lopozisyon pou vwar li dan bin listwar. Akòz sa bann move lentansyon ki deryer zot latet. E nou, nou pou konvenki ki nou pou re ganny laviktwar pou ankò 5 an.

(Interruptions)

HON JOHN HOAREAU

Mr Speaker, alor mon le *move* anba *Order* 24(1) *For the closure of debate*. Mersi.

(APPLAUSE)

MR SPEAKER

Ki *Order* Onorab? Ou'n dir mwan la. 54(1)?

HON JOHN HOAREAU

Mr Speaker, mon pe *move* anba 24(1) ki nou *close* sa *debate*, e mon ti ava kontan en *secondment please*.

(comments off-mic)

MR SPEAKER

Wait, wait, wait, wait! Mon pa konnen si Speaker, i bezwen *rule* lo la mon pe gete. *Closure*.

HON JOHN HOAREAU

(Off-Mic)

Ferm ou denden don.

(laughter)

MR SPEAKER

Ok. Non sa i bezwen lagreman Speaker. E mon krwar i en pe tro boner dan *debate* pou mwan konsider sa avek zistifikasyon.

Ler deba in ariv dan bann staz ki arive souvan repetisyon, e soz lo la mon a kapab konsider li. Me pou le, moman mon krwar i ankò tro boner. Mersi nou a kontinyen avek deba. Ki ou *point of order* Onorab Pillay?

HON SEBASTIEN PILLAY

Mersi Mr Speaker, anba *Order* ki Onorab, pe sey *close debate* *Standing Order* i prevwar ki sa Manm, en Manm ki'n koze lo sa *Bill* pa kapab *move* pou en *closure of debate*.

So mon apresye ou *ruling* e mon apresye lefe ki ou pe les

deba kontinyen. Mersi Mr Speaker, akòz sanmenm sa ki apel *curtail*-

MR SPEAKER

Hmm.

HON SEBASIEEN PILLAY

In kòz lo *free speech* li menm, apre i li menm li i le koup *free speech*. So petet i en pti pe konfize. Be ou *ruling* i kler Mr Speaker, so nou a swiv ou *ruling*.

MR SPEAKER

Non, non, non,, non non! *Ok*, Onorab Georges, ou le reponn lo la? Wi.

HON BERNARD GEORGES

Mersi Mr, byen evidaman. Onorab *Leader* Lopoziyon, ki dapre sa ki mon konpran i anvè vin Vis Prezidan pei, i pe *mislead* i pe *mislead* Lasanble, napa nanryen anba *Order* 24 ki dir ki-

O kontrè se *the hol- The Member holding the floor who can move the Motion*. E sa set ti egzakteman sa ki'n arive.

MR SPEAKER

Sa ki - mwan se sa manner mon konpran, ki manner en Manm en Manm i kapab *move closure of debate*. Nou a kontinyen Onorab Romain, ou ti'n lev lanmen si ou le pran laparol silvouple.

HON GEORGES ROMAIN

Mersi-

HON JOHAN LOZE

(Off-Mic)

MR SPEAKER

Point of order. Zot pa vwar *point of order* i zis en fason- *ok*. Ale Onorab Loze.

HON JOHAN LOZE

Mersi Mr Speaker. Mr Speaker, mon pe fer mon *point of order* anba *Order* 8. E semenn pase, ou'n les nou konpran pou dir ou ki garan laverite dan Lasanble Nasyonal.

E la mon le refer lo en pwèn ki ou konn tre byen lo la ou, depi semenn pase i annan en morso lenformasyon pe pase dan Lasanble lo kestyon *POA*, e lo case ki ti al devan Lakour.

Mr Speaker, ou konn tre byen ou premye dimoun ki ti konteste *POA* devan Lakour ti Mr Viral Dhanjee.

E mon ti a kontan ki i ganny son rekonesans devan Lasanble Nasyonal. Si nou pou anmenn sa kestyon konteste Lalwa *POA*, nou pa kapab pa nonm Mr Dhanjee, menm si in kit nou son nanm repoz anpe. Mersi Mr Speaker.

MR SPEAKER

Mon pa konnen si mon bezwen *rule* lo la. Mon pa vwar nanryen mal dan sa ki en Manm in dir. Ou'n azout en pwen, *fair enough*. Onorab Romain, si ou le laparol ou kapab pran la.

HON GEORGES ROMAIN

Mersi Mr Speaker. Onorab Loze, serye ou en pti pe mon frer en, ou pe tro ale.

MR SPEAKER

Onorab Romain, ou adres Speaker, silvouple, mersi.

(Interruptions)

HON GEORGES ROMAIN

Mr Speaker. Mr Speaker, mwan mon dan sa Lasanble mon pa zanmen koz nanryen mal lo li. Bomaten in dir sa Komite Onorab Esparon, in dir ki'n dir. Mon fatigue avek Onorab Loze.

MR SPEAKER

Adres Speaker, adres Speaker.

(Interruptions)

MR SPEAKER

Order!

HON GEORGES ROMAIN

Mersi Mr Speaker. Bonn apre midi tou koleg Onorab, e tou dimoun ki a lekout. Mr Speaker, mon ti a kontan entervenir lo sa lamannman,

ki pe propoze pou retir afilyasyon politik dan lalis karakteristik ki ganny proteze, anba Lalwa dan kad *hate speech*.

Mr Speaker, sa Sa lamannman pe demande i non pa zis en propozisyon teknik, me i en sinyal tre danzere pou nou demokrasi, e pou lavenir nou pep.

Mr Speaker, listwar Sesel i keksoz ki nou pa devret zanmen bliye. Pandan 43 an avan 2020. Sesel ti ganny dirize anba en Gouvernman *SPPF*, *US* ki pa ti rekonnet dimoun ki ti annan en pwennvi politik ki diferan ek zot.

E annefe dan sa letan, bann dimoun ki ti annan en pwennvi politik diferan ki ti ganny viktimize, zis akoz zot pa ti siport sa parti politik ki o pouvwar.

Dimoun ti perdi lanplwa, ti ganny egzile, ti ganny met dan prizon, annan ki ti ganny torture ti perdi lavi, e bokou ti bezwen viv dan lafreder zis akoz zot krwayans politik ti diferan.

Mr Speaker, napa en Seselwa ozordi ki'n viv pandan sa letan e ki pa pou konpran ki kantite dimoun ki ti pe viv dan lafreder.

E Mr Speaker, ler sa Lasanble ti aprouve pou met afilyasyon politik koman en karakteristik proteze dan kad

hate speech dan Lalwa an 2024, mesaz ki nou ti pe anvoye sete, ki zanmen ankor ki fodre en Seselwa i ganny ensilte, menase, oubyen imilye aköz son krwayans politik i diferan. Nou ti pe fer en promes ki protez laliberte lekspresyon, e anmenn respe dan nou demokrasi dan nou pti pei Sesel.

Alors ozordi, sa propozisyon pou amann Lalwa, e pou dir ki *hate speech* pa pou ankadre okenn keksoz politik, i en gran pa an aryer pou nou nasyon Mr Speaker.

Pou mwan, sa ki sa lamannman pe demande, i pou senpleman ouver laport pou nou kapab servi politik, pou nou kontinyen repros nou oponan e ensit vyolans.

I pe osi donn serten dimoun lespas pou atak lezot lo baz zot krwayans politik. Wi, Mr Speaker, la demokrasi i vedir annan laliberte pou koze, me laliberte pa vedir ou kapab ensit dezord ; i pa vedir ou kapab sali non lezot. I pa vedir ou kapab ankouraz vyolans.

Mr Speaker, laliberte lekspresyon i osi vin avek responsabilite. Deba politik i devret baze lo respe e non pa lo lensilt.

Mr Speaker, annou regard otour nou, sa ki'n arive dan lemonn. Listwar in demontre ki si en imen pa fer

atansyon, sa bann move lenfliyans i pou repet son lekor.

En legzanp ki'n vreman soka se ka ki'n arive dan *Rwanda* an 1994, kot ti annan en diskour kont bann *Tutsi* ki ti ganny divize lo radyo dan bann piblikasyon, e par bann politisyen *Hutu*.

E la ti koz en masak kot plis ki en 1 milyon ti perdi zot lavi dan zis detrwa mwan. E tou sa ti komans par bann mo, par en langaz ki ti fer dimoun krwar ki lezot ti zot lennmi, zis aköz zot ti diferan.

Sa i montre nou Mr Speaker, ki parol i annan en pouvwar i kapab konstri. Me i kapab osi detri. Ler ou retir proteksyon kont afilyasyon politik dan Lalwa ou pe ouver laport ki danzere pou ou popilasyon, espesyalman si i annan tansyon politik parmi ou popilasyon.

Si nou pa vey sa kalite parol depi lo komansman, nou riske al lo en semen kot leker serten dimoun i vin dir, kot respe i disparet, e kot vyolans politik i kapab re aparet.

Menm Lanmerik nou'n vwar rayot kot serten manm piblik ti'n anvair *Capitol Hill*. En keksoz ki ti ganny provoke par bann mesaz politik ki ti pe kre divizyon.

Mr Speaker, nou pei i deza divize politikman ki mesaz ki nou pe anvoye ler

nou pe dir dimoun, ki ler ou menas ou oponan avek *hate speech* lo kote politik i ok?

Sa ki enportan pou note, se ki ozordi Lalwa pa anpes dimoun pas kritik lo kote politik, ou kapab kont en parti politik, ou kapab kestyonn en aksyon ki en politisyen in pran, ou kapab dezagree avek desizyon ki en parti politik in pran, me ou pa kapab maltret dimoun akòz son krwayans politik, oubyen dir dimoun dan tel parti pa merit koze, oubyen fodre zot disparet, oubyen fodre zot ganny trouve anba en pon.

Mr Speaker, wi, ou kapab koze, ou kapab pa dakor. Me ou pa kapab fer lezot per zis akòz zot krwayans i diferan. Nou bezwen ranforsi sa mesaz, e non pa afebli li.

Mr Speaker, mon koz pa zis koman en Manm Lasanble, mon koz koman en sitwayen ki'n viv, e grandi dan sa sistenm kot dimoun ti per. Mon konn dimoun ki'n perdi lanplwa, oubyen ki ti bezwen al egzile, oubyen perdi zot lavi zis akòz zot pa ti sipòrt parti ki ti o pouvwat.

Mr Speaker, ozordi LDS pa krwar dan viktimizasyon politik. E sanmenm rezon ki nou'n pouse pou enkli proteksyon anba Lalwa. Nou devret alòrs protez sa progre ki nou'n fer.

Mr Speaker, nou bann zanfan i merit viv dan en sosyete kot zot kapab krwar dan nenpòrt parti politik ki zot anvi, san okenn lafreder, ou diskriminasyon.

Mr Speaker, mon krwar ki sa lamannman i pe propoze pou anmenn nou dan en move direksyon. E pe al kont linite, kont stabilite, kont respe, ki nou devret annan pou nou dimoun pou nou dimoun.

E la mon demande, kwa ki mal dan edik nou pep pou annan bann deba ki an bonn sante? Kwa ki mal dan fer dimoun aprann respekte lopinyon lezot, menm si zot pa dakor avek zot.

Sa se baz en sosyete demokratik. Nou pa bezwen krwar menm keksoz pou viv ansanm dan lape. Eski solisyon se fer nou Lalwa vin pli feb? Oubyen solisyon se pou lev nou nivo konversasyon ledikasyon, e konpòrtman?

Mr Speaker, eski solisyon se toler lensilt? Oubyen, se pou ed nou pep vin pli matir dan lafason zot koze, dan lafason zot diskite, e partaz zot lopinyon?

Isi Sesel nou pa devret rod zis laliberte, me osi nou bezwen aprann responsabilite dan fason nou servi sa laliberte. Nou bezwen ankouraz nou popilasyon pou annan en kalite dialog ki baze

lo dinyite, lespwar, e respe mityel.

En dyalog kot dimoun i konpran ki ler mon pa dakor ek ou lopinyon, i pa vedir ki mon vin ou lennmi, e i pa vedir ou bezwen desann dan rigol pou sali non dimoun oubyen fer lezot per.

I pa normal, e i pa akseptab ki dan en pei demokratik nou solisyon se pou retir proteksyon dan Lalwa, e toler lensilt. Olye promouvwar respe sa i pa progre Mr Speaker, sa i en pa an aryer.

Mwan mon pa pou donn mon sipor anver en tel lamannman, aköz mon krwar ki nou devret kontinyen edik nou pep.

Annou fortifye nou demokrasi, e non pa fer li vin pli frazil. Annou koze annou debat. Me annou fer li avek respe, responsabilite, e bon fwa aköz nou tou nou pe viv dan en sel pei ki apel Sesel. Mersi Mr Speaker.

(APPLAUSE)

MR SPEAKER

Mersi Onorab. Onorab Vidot, ou annan laparol.

HON AUDREY VIDOT

Mersi Mr Speaker. Mr Speaker, ler ou'n anmenn en lalit lo drwa laliberte lekspresyon, eski ou fason fer

pli byen se pou met kontrol lo laliberte lekspresyon ozordi? Espesyalman ler pouvwar i dan ou lanmen. Apre ki ou'n donn en ta bal, en ta bal pou eksit vyolans, eksit sitwayen pou li denigre son prosen piblikman - pe enport ki son *gender*, ki son *background* koman endividi, eski fason fer pli byen pou met kontrol lo sa menm laliberte lekspresyon, ki ou ti fer a ou letan?

Mon komans koumsa Mr Speaker. Aköz ler avan ler nou zis donn bal la nou bezwen reflesir. Mon'n tann plizyer Manm lot kote latab de annefe spesifikman Onorab Hoareau. Atraver ou Mr Speaker, e la Onorab Romain.

Kot zot in koz lo viktimizasyon, lo respe, lenpresyon, ki zot pe donn nou se ki konmsi sa in arete sa depi ler zot ti amann sa Lalwa an 2024, pa egziste dapre zot sa.

Mon pa konnen ki bout parti Sesel zot ete. Me selman pou zot, zot pa vwar li egziste. Me i regretab Mr Speaker, ozordi dan sa peryod 4 pe al lo 5 an la prezan ki annan viktimizasyon - prezan ki annan mank respe lo lensilt.

Ou konnen mwan si mon kapab dir ozordi, mersi tou sa bann endividi ki'n kritik mwan, ki'n ed mon vin en fanm for ozordi, ki'n fer mon kapab kontinyelman lager,

lalit, pou laliberte lekspresyon pou drwa dimoun pou zot respe, e pou zot ganny prezerv zot dinyite.

Akoz mwan mon'n enn bann politisyen madanm ki'n ganny en kantite kritik, maltrete, pou rod fason tou sort fason pou sey denigre mon karakter.

Me selman i ti zot swa i ti zot laliberte lafason pou zot eksprim zot. Be mwan Audrey Vidot, keksoz ki mon vwar mon pa pran li personnelman, mon pa fatig mon avek, mon pa les sa detri mwan.

O kontrè, ler dimoun i kritike mon idantifye kwa ki annan mal ki Audrey, i kapab fer pli byen. Bann ki pou denigre mon karakter parey i annan ki ti pe fer, ki'n lalit depi 30 an pase, ki zot in denigre zot kanmarad, ki zot in ankouraz sa bann serten endividi ki ozordi zot pe anpes koze pou denigre mwan. Be mwan Audrey Vidot, mon'n debout for mwan.

En kantite ankò en kantite ankò in debout for pou li kapab reprezant swa en group dimoun, swa serten endividi.

Letan nou pe koz lo ledikasyon nou pep, wi, nou responsabilite pou endike nou rol koman Manm Parlman, koman bann dirizan, koman bann politisyen, okenn dimoun ki angaz li dan politik,

i son responsabilite pou li donn ledikasyon, pou li donn bon legzanp.

Be ou pa kapab ou, ou menm ou ki'n fer plis mal, ou menm ou ki'n ankouraz plis mal, prezan ou fason fer pli byen ozordi ou pou vini ou pou vin dir ou, pou vin met kontrol lo ou kanmarad.

Sanmenm sa bann menm dimoun ki ou'n ankouraz zot pou fer mal, ozordi pou ou kapab ozordi ou le vin met kontrol lo li.

Be selman ozordi sa bann menm dimoun li ki pe met kontrol li, i ankò dir sa ki anvi li, i annan drwa dir sa ki le li lo son kanmarad, i annan drwa abes sa ki le li, i annan drwa viktimiz sa ki i le li, i drwa annan swiv sa ki i le li, me selman lezot sitwayen normal la deor ki afilye li swa avek son swa parti politik, ozordi li i bezwen vwar li pe ganny siprimen, lo kwa ki i dir kwa ki fer.

Me selman sa ki pouvwar i dan son lanmen ki li annan tou resours, tou sipor, tou lotorite, tou proteksyon, li i kapab fer, e dir sa ki oule.

Mr Speaker, sa lamannman ki Onorab Gill, in anmennen i enn tre senp. In eksplike e nou, nou pa'n zis leve ozordi pou demen pou dir pou dir sa lamannman i bezwen ganny amande.

Konsern ti ganny souleve depi ler ti amande 2024 li. Zot in zwe sourd, e en kantite dimoun espesyalman bann ki afilye li avek en parti politik ki son drwa anba Konstitisyon i pe vwar li pe ganny siprimen, e i pa akseptab.

Espesyalman dan en moman letan la ki nou konnen pou dir nou annan eleksyon zeneral pe vini. Nou annan diferan parti politik ki sitwayen, e bann endividi enkli bann ki'n montre sa langazman anvi partisip dan politik Sesel, zot bezwen annan en drwa laliberte pou zot kapab eksprim zot libreman.

San vwar zot pe ganny zot met dan en kaso ki zot fanmir i bezwen tap sepa konbyen laport pou konnen kot i ete pou anmenn en pe manze pou li, oubyen ganny dir nenport kwa i pa akseptab.

Eski LDS pe dir nou pou dir zot fason fer revanz ki prezan zot bezwen met li dan Lalwa? Non, i pa akseptab. I pa akseptab, e mwan mon pe mon pe siport sa lamannman ki Onorab Gill, in anmennen ozordi.

Akoz mon senserman krwar ki tou endividi, enkli bann dimoun ki pe afilye li avek en lopinyon parti politik, ki swa i endepandan, ki swa in swazir en groupman, i bezwen

kapab libreman pou li kapab eksprim son lekor.

E nou koman bann *leaders*, koman bann dirizan, koman bann lezot nou kontinyelman donn ledikasyon lo lenportans tou bann valer, e fason ki mannier nou tret en enn a lot. Mersi Mr Speaker.

(APPLAUSE)

MR SPEAKER

Mersi Onorab. Onorab Larsen.

HON CECILE LARSEN

Mersi Mr Speaker. Bonn apre midi a tous. Sa *Bill* i propoze pou fer en lamannman pou retir afilyasyon politik ki ganny proteze anba sa seksyon.

Premyerman, annou rapel ki lobzektif prensipal sa Lalwa, se pou protez dimoun kont diskriminasyon mezir, kont lensitasyon vyolans, e pou fer sir ki okenn endividi pa ganny atake oubyen viktimize aköz zot ras, nasyonalite, larelizyon, pwennvi politik, e lezot.

Afilyasyon politik i en swa. I en swa ki nenport sitwayen i lib pou fer san lafreier. Dan en demokrasi diferans dan politik pa sipoze en menas, me plito en lafors e en neseseite.

Se sa ki permet kritik, deba, e progre. Ler ou protez

afilyasyon politik ou riske fer li vin en lofans kriminel, e ou afebli laliberte lekspresyon.

Nou pa pe dir ki dimoun i devret fer latak personnel. Me nou bezwen fer diferans ant latak personnel, e kritik politik. Sa amannman i asire ki nou protez drwa pou eksprim nou lekor politikman, san ki sa i vin en lofans kriminel, zis parski en lot pa dakor avek ou lopinyon.

Nou bezwen osi fer sir ki Lalwa pa vin en zouti pou fer ferm labous dimoun, zis aköz zot pe met keştyon lo en *leadership*, oubyen en pozisyon politik.

Dan en demokrasi liberte lekspresyon i al avek responsabilite. Sa responsabilite i souvan ganny sertifeye par Lalwa.

Me i osi en responsabilite moral, pou pa servi ou lavwa pou fer mal, me pou konstri. Lalwa pa devret en *lock* ki ganny servi pou tak laport avek deba politik.

Lalwa pa devret fer dimoun perdi sa ki zot krwar, prenan kont ki sa ki zot krwar i ganny eksprim dan en fason respekte, e sibstansyel.

Sa amannman pou fer nou Lalwa pli kler, pli zis, e pli armonize avek bann prensip fondamantal en demokrasi, laliberte lekspresyon, laliberte lopinyon politik, e drwa pou keştyonn sa ki o pouvwar.

Nou le ki sa Lalwa i ganny servi pou protez sa ki vremen bezwen proteksyon. E an menm tan permet nou demokrasi fonksyonnen dan en fason ouver, e responsab.

Alors mwan mon pou siport sa amannman avek konviksyon. Sa i en pa dan demokrasi pli matir, pli ouver, e pli ranforsi.

Aküz nou koman reprezantan pep Seselwa, i nou devwar pou defann sa drwa, kot lopinyon i ganny pase san okenn presyon politik. Mersi Mr Speaker.

(APPLAUSE)

MR SPEAKER

Mersi Onorab. Mon a donn laparol Onorab Pillay.

HON SEBASTIEN PILLAY

Mersi Mr Speaker. Mr Speaker, mon pou komans mon lentervansyon baze lo, parfwa ou pa vin ek en lentansyon pou dir serten keksoz.

Me ou vwar ou dan en lobligasyon pou fer serten komanter, aküz i neser pou nou edik nou pep ki la deor, aküz i annan en tel lamannman devan Lasanble Nasyonal ozordi.

Mon rapel tre byen enn bann pwen tournan nou politik Sesel se 2015. E 2015, ti annan en parti politik apele

SNP sa letan, ki ti aktiv lo rezo sosyal, e apre ti vin *LDS*. E la in retourn *SNP* mon krwar ankor.

E ki i ti fer li? I ti dir tou sa ki anvi dir lo nenport ki san leksepsyon. I ti kapab kritik politisyen, la mwan mon'n ganny vilifye, atake. Bann lezot *leader US* in ganny vilifye, in ganny atake.

E tou sa bann keksoz in ganny dir, e tou bann gran defander la demokrasi sa letan, enkli mon koleg la ki pe re debout apre ki'n fer ki pe al ganny son *retirement* in retourn *out of retirement* pou al re debout.

(Interruptions)

HON SEBASTIEN PILLAY

Apre ki ti pas devan laport dimoun, e dir ek dimoun pou dir lala sa zenn fiy ki pe ranplas li apre pov ti bet zenn fiy in ganny koudpye, met a kote. Li retourn ankor kit li lanmenm.

E tou sa bann gran defander la demokrasi, sel pli bon nide ki zot annan se anmenn en Lalwa pou entrodwi karakteristik politik. E fer li vin ilegal pou kritik en karakteristik politik.

E ki arive, premye dimoun enn parmi bann premye dimoun ki zot al met Ankour Mr Bernard Sullivan.

Bernard Sullivan, ki'n *campaign* pou Onorab Hoareau, defann Onorab Hoareau, atak tou dimoun pou Onorab Hoareau, ozordi i Ankour aköz *LDS*.

(APPLAUSE)

HON SEBASTIEN PILLAY

Prezan nou'n tann koz lo serten propo ki'n arive 43 an pase, bann keksoz ki'n ganny dir, ki'n ganny fer.

Mon pa bezwen sa 43 an pou mon eksplik lepep Seselwa kote nou *stand* ozordi. Mon annan dan mon lanmen la en dokiman *Wavel 2020, General Elections 2020 LDS as the Government party in the National Assembly*.

Now, Standing Order i permet mwan fer sa aköz zot, zot dan Gouvernman, e mon kapab komant lo Polisi Gouvernman.

Zot ti dir "Lasanble Nasyonal pou annan en rol vital pou zwe, e pou ganny amelyore avek en mazorite *LDS* ki pou travay ansanm avek en legzekitiv *LDS*."

Bann Manm Lasanble Nasyonal pou reste lavwa lepep ki ti elekte zot, e zot responsabilite pou reste defann lentere Lepep."

Bekan? Onorab Flory Larue, ki'n kit zot, i dir zot fer zis *party line*.

(APPLAUSE)

HON SEBASTIEN PILLAY

Dezyenmman, “Avek en *LDS Executive* son bann *MNA* pou kapab pli byen delivre pou devlopman zot distrik, e zot pou donn *the right support*.”

Be kan? Kote in arive sa? Zot pas zot letan flate, lise, felisite, e sel keksoz zot konn fer se dir tou keksoz i byen dan plas travay pou zot dimoun dan distrik.

“Bann *MNA LDS* pou *live up to* zot *mandate* pou reprezant zot bann *constituents* ler zot travay ansanm ek Legzekitiv pou zot delivre sa ki pli bon pou pei.”

Be kan? Sel keksoz ki zot in fer se protez tou sa ki legzekitiv i fer a depi defann lentere zot sitwayen, si ou vwar ozordi en Minis dan Gouvernman *LDS* Minis *Senior*, i dir ek ou koumsa pou dir, si pou li fer *tender* pou en morso later pou fer fristre en devloper.

Be ou tou sa bann boug ki pe esper *tender* la deor ou pa fristre ler ou esper *tender* ou? *Come on*. Eski zot mazine ki zot dir enn ler ki zot fer?

Mr Speaker, annou al pli lwen pou nou kapab met sa deba dan konteks, pou gard zot bann *constituents* in enformen lo biznes Gouvernman.

Be kote in arive sa? Zanmen zot in fer. *In fact*, sa dokiman ki la, la, la, la, la napa nanryen ki zot in garde. Zis lagrenn bat latet depi 2020.

Prezan Mr Speaker, ler mon tann zot dir tou sa ki zot in dir lo 43 an pase, e tou sa bann keksoz ki swadizan in arive, mon demann mon lekor en kestyon.

Be eski zot, zot pe fer? Ki zot, zot pe montre lepep Seselwa? Dan sa Lasanble la apre midi nou’n ganny en legzanp tipik, kot en boug en Onorab, pe koz ou laliberte lekspresyon labous plen.

Apre ki i fer? Mon *move* en Mosyon pou ferm deba lo *advice*. Sa Sekreter Zeneral *LDS*, Mr Speaker.

(APPLAUSE)

HON SEBASTIEN PILLAY

Be sa i apel laliberte lekspresyon? Nou pe fer en deba, *let there be a debate*. Ou karakteristik politik i deza ganny proteze anba Konstitisyon, ou annan ou drwa lasosyasyon.

Sa ki ou’n fer se ki ou’n protez bann ki o pouvwar kan ou pou dir en keksoz mal kont zot, zot pou dir ou pe fer ensitasyon politik pa vre Onorab Naidu?

Be *my friend* be case Ankour li ki’n fer, se sa nou

problemm ozordi Mr Speaker, zot bezwen realize pou dir si lespas politik Sesel pe fermen de zour an zour, se zot ki pe fer li. Akoz zot le atak tou, e sel parti ki zot sey pike, me zanmen zot pou anbarke se *United Seychelles*.

(APPLAUSE)

HON SEBASTIEN PILLAY

E la mon, mon envit zot tou Mr Speaker, mon envit zot tou. Sanmdi zot anvi konnen ki pe pase? *Ok*, swiv nou kongre nou a montre zot ki mannyer i fer kongre.

(APPLAUSE)

HON SEBASTIEN PILLAY

Nou pa ava annan Joana, Joana, Joana, Joana be kisisa sa? Kalite gasi i apele sa? *Come on*. Prezan mwan Mr Speaker, depi bomaten nou pe ganny koze lo Vis-Prezidan, Vis-Prezidan be gete, Sanmdi zot a konnen.

(APPLAUSE)

HON SEBASTIEN PILLAY

Zot a konnen Sanmdi aret vey nou. Nou, nou pa vey zot, zot vey nou. Be fer zot politik ou konnen ki mon pou fer Mr Speaker? Mon pou demande ki nou fer apre eleksyon, nou pran zot nou met dan Nyala

nou kit zot laba menm dan Nyala.

Sa ki pe pouri lo port nou met zot ladan. Akoz Mr Speaker, sa ki'n arive se ki zot in perdi tou, tou kapasite, abilite pou koz ek nou lo *moral high ground*. Zot napa *moral high ground* politik. Zot zis la e zot pini dimoun pou bann keksoz.

Par egzanp Mr Speaker, ozordi nou pe koz karakteristik politik. Kan en *PS*, e menm Minis i kapab al lo *stage* dan en konvansyon *staff* pa kapab ale.

Si ou ale ou pa ganny *training*, si ou ale ou pa ganny promosyon, si ou ale ou pa ganny sa. I annan dimoun zot targete Mr Speaker.

E sa ki pli enteresan ou ganny ou en Minis, en Minis *Senior*, mon zanmen in deza annan en Minis dan *SPPF*, *US* ki'n fer sa komanter koumsa.

“Ou pa *vote* pou lisyen.” Be kisisa sa? I apel malelve.

(Interruptions)

HON SEBASTIEN PILLAY

Konmsi Mr Speaker, zot in sorti zot in sorti- konmsi standar Legzekitiv ti la anler, apre 4 an *LDS* in pran sa standar in anmenn li dan en labou.

E sa standar in sitan desann, in sitan gate Mr Speaker. E sel opsyon pou re

aranz sa standar se annan en Gouvernman US dan sa pei.

(Interruptions)

HON SEBASTIEN PILLAY

Prezan en Mosyon i senp devan zot, Mosyon ti senp. Lentrodiksyon Onorab Gill, 5 minit *sharp to the point*. Ki zot in fer zot? Enposib pou zot kapab pa al dan en retorik politik.

(Interruptions)

HON SEBASTIEN PILLAY

Enposib, zot pa kapab al dan retorik politik, e sa ki pli enteresan Mr Speaker, semenn pase mon pa ti la pou deba, e mon ti tann dir pou dir bann Manm Lasanble i bezwen *training* i bezwen *capacity building*.

Mr Speaker, be *of all people* ki bezwen *capacity building* se sa dimoun ki'n anmenn sa Mosyon li menm semenn pase. Akoz la ozordi mon'n vwar li dir ek Onorab, laba mon a donn ou Mosyon *move* pou *closure of debate*. Pourtan i en *Deputy Speaker*, Lasanble Nasyonal Mr Speaker. In *on record* mislead Lasanble.

E bomaten ou dir ler li i dir ou pa tande, be i ti dir la anndan. So ki mannyer nou pa kapab demande ki ler *when it*

comes to political characteristic nou tire dan sa Lalwa?

Akoz zot avek en mazorite avek en Gouvernman ki dan zot lanmen, zot pou kontinyen pini dimoun, e zot pa pini dimoun zot fer zot pini dimoun dan en fason visye zot.

Sa ki enteresan pa rode ki mannyer ti ganny fer, ou sipoze pa fer, ou sipoze pa fer Mr Speaker, sa ki enportan. Be ou le fer aköz?

(Interruptions)

HON SEBASTIEN PILLAY

Akoz zot bann move dimoun Mr Speaker.

(APPLAUSE)

HON SEBASTIEN PILLAY

Prezan Mr Speaker, nou'n ariv en staz dan nou Lasanble Nasyonal, kot ou bezwen lager pou ganny parol. Be mon apresye ozordi apre midi ki ou'n dir avek Onorab, be sa Mosyon deba pa ankor fini ou'n bezwen donn li benefis *wisdom* ozordi apre midi.

E ou vwar ki standar ou parti pe ale Mr Speaker, si ou kontinyen avek sa bann *MNA* kit li lanmenm.

Mon krwar *the best thing* ki ou kapab fer Mr Speaker, ed mon *join* nou dan *United Seychelles* e dir nou pa pe kit nanryen lanmenm nou pe sanze.

(APPLAUSE)

HON SEBASTIEN PILLAY

Akoz ou nepli kapab tenir sa sez Mr Speaker, ek sa bann kalite *MNA* ki ou annan zot pou kontinyen anbaras ou de zour an zour.

Sa ou problem la ki pe arive dan sa Lasanble, e ou ganny ou Mr Speaker, ou'n donn en *ruling* mon'n donn mon lopinyon lo *ruling* mon'n ekspekte ou *ruling*, e mon kontan Mr Speaker, ki *Leader* Zafer Gouvernman i kontan entervenir ler mon koze, in rode mon pe Vis Prezidan in maltret mon.

Mon napa problem ek li Mr Speaker, aköz li i krwar i annan drwa maltret tou dimoun, be li son larmwar i plen ek leskelet li. I osi i annan son leskelet.

MR SPEAKER

10 minit, 10 minit Onorab.

HON SEBASTIEN PILLAY

So, pa tro tro abize pou maltret dimoun sa ki mon ti dir lot fwa Mr Speaker, i al koumsa “mon ti dir ki ler Onorab Georges, i donn ou en ponnyendmen ou kont ou senk ledwa.”

Be la mon pou modifiye sa mon pou amande Mr Speaker, avek ou permisyon mon le fer en lamannman lo mon *statement*. Kont ou senk ledwa

apre kont ou bann pous lipye tou.

(APPLAUSE)

HON SEBASTIEN PILLAY

Lala ou problem Mr Speaker. Mwan mon pou *vote* an faver sa lamannman aköz i nesaser, e i nesaser koriz en lenzistis ki'n ganny fer anver pep Seselwa. Mersi Mr Speaker.

(APPLAUSE)

MR SPEAKER

Mersi Onorab. Onorab Georges.

HON BERNARD GEORGES

Mersi Mr Speaker. Mon site, “mwan mon pou *vote* an faver sa *Bill* aköz i nesaser, i nesaser pou koriz en lenzistis ki'n arive.” Sa se sel parol dan sa 10 minit ki *Leader* Lopoizasyon in koze ki'n refer lo sa *Bill* son dernyen parol.

(APPLAUSE)

HON BERNARD GEORGES

That's all. In koz pou 10 minit, i pa'n tous sa *Bill* ditou e Onorab Gill, atraver ou Mr Speaker, ler ou retourn dan ou *Caucus room* taler demann avek ou *Leader* silvouple. Aköz ki'n pran 9 minit avek 56 segonn zis pou li koz lo tou keksoz apart ou *Bill* ki ou'n anmennen?

E ki ti'n devret koman en *Leader* siporte, e koz lo la, e fer edik en pe dimoun deor aköz ki pou *vote* an faver ou *Bill*. Mr Speaker, mwan mon'n deside pran laparol apre midi aköz pou rezon prensipal.

Premye, se ki annou pa bliye ki i pa ankor pas 1 an, depi ler sa prozedlwa ki Onorab Gill, pe rod amande ozordi in devan sa Lasanble, e in ganny *vote*, pa ankor arive 1 an.

Se an Zilyet lannen pase, la nou ankor an Zen sa lannen. 11 Mwan pli tar zot pe retourn avek menm ritournel ki zot ti fer 11 Mwan pase, tou sa ki nou'n tande la apre midi lo, aköz sa i fodre fer zot ti dir 11 Mwan pase, e personn pa'n ekout zot, e *Bill* in pase.

La zot pe retournen pou zot ganny parey zot apele an angle *second bite at the cherry*. Setou ki zot pe sey fer e zot pa'n anmenn en largiman, en largiman pou montre ki mannyer aköz ki sa *Bill* in pase 1 an pase, i bezwen ganny sanze ozordi.

Napa enn zot parmi bann ki'n koze, ki'n montre nou en defayans aköz sa Lalwa i bezwen ganny sanze ozordi.

Alor sel keksoz ki zot pe fer Mr Speaker, zot pe retournen, zot pe kontinyen en deba ki 11 mwan pase zot in fer zot in *fail* sa, sa se en parti

ki anvi vin o pouvwar an Septanm sa lannen.

Mr Speaker, i annan en defayans ki personn pa ankor konpran lo zot kote latab lo sa *Bill* e sa se diferans ant kritik ek *hate speech*. Pou zot *anything* ki anpes en dimoun koze, oubyen ki met en *limit* lo li i al kont *freedom of freedom of expression*.

Mon bann zanmi lir zot Konstitisyon avan ki zot vin fer - avan ki zot vin fer zot lekor pas koman enbesil dan Lasanble, li zot Konstitisyon, zot ava vwar ki *freedom of speech* i pa absoli. I annan serten restriksyon ki kapab ganny mete.

E se pou sa rezon ki sa restriksyon in ganny mete. E ni *Ombudsman*, ni *Human Rights Commission*, ni okenn dimoun pa'n tay Ankour devan Lakour Konstitisyonnel, pou dir sa ki zot in fer pa konstitisyonnel. Si pa ti konstitisyonnel enn ant sa bann dimoun ti pou'n fer la ozordi.

E Mr Speaker, sa ki mon'n dir taler i vre, zot pa ankor konpran diferans ant kritik avek *hate speech*.

Les mwan eksplik avek *hate speech*, les mwan eksplik zot la diferans atraver ou mon bann zanmi. Si en dimoun i dir mon pran en legzanp, mon a donn en bon legzanp - Madanm Bernadette Rosalie, i

pou sa i pou sa kandida US ki pe vin dan distrik Les Mamelles, e mon swet li e mon swet li tou de bon, e mon konnen ki nou pou ganny nou en zoli kanpanny ki nou pou fer dan Les Mamelles.

E i apel bann dimoun Les Mamelles tel parey son predeser Msye Onorab Emmanuel Fideria, ti dir *the beautiful people of* Les Mamelles, e sa zis dan en zoli laspirasyon. Mwan osi mon enn sa bann *beautiful people of* Les Mamelles akòz mon reste Les Mamelles.

E mon e mon remersye Bernadette Madanm Rosalie, pou son zoli parol sa se en parol ankourazan. Me si en lot li oubyen en lot dimoun i vini demen e dir pa *vote* pa *vote* pou Bernard Georges, akòz i pa'n fer nanryen dan Les Mamelles, en konparezon. Sa se en kritik e napa nanryen ki mal avek sa. I en kritik ki byen, me si en dimoun i vini i dir pa *vote* pou Bernard Georges, akòz i vilenn akòz i LDS - sa se *hate speech* annou konpran zis akòz ou pe kategoriz en dimoun dapre, dapre son afilyasyon politik *that's what it is*.

Ou pa kapab, ou pa kapab melanz tousala e dir zis akòz en dimoun i kritik ou ki sa i *hate speech*. *It's not, hate speech* parey sa bann ki ti lir Lalwa ki nou'n pase an Zilyet

lannen pase, i ava vwar i en keksoz ki target en dimoun personnelman akòz son afilyasyon politik, *that's all*.

Si ou target li akòz en keksoz ki'n mal fer, oubyen en keksoz ki in fer ki mal, sa i pa *hate speech* i en kritik, e en kritik absoliman zistifye.

Sa se premye keksoz ki napa en dimoun lo lot kote latab in konpran enkli son *mover* Mosyon.

Dezyenm keksoz Mr Speaker, ki mon ti anvi ozordi fer resorti e Onorab Gill, ler i pran laparol pou reponn i ava edik mwan, akòz sa vreman mon pa'n konpran.

Onorab Gill, ler i ti pe koze i dir ki sa ki i pe sey fer ofet sa ki pe sa ki son *Bill* pe fer se retir *political affiliation* dan karakteristik anba anba sa Lalwa ; retir *political affiliation* dan karakteristik anba sa Lalwa, me se pa ditou sa ki son Lalwa pe sey fer.

E mon ava demann avek Onorab Gill, sezi lo la e nou bezwen akòz parey nou kontan dir nou ki Lezislater, nou pa vin isi zis pou fer demagozi, nou pa vin isi zis pou koz lo filozofi en *Bill* parey zot in fer depi zot in komanse.

Be annou regard sa *Bill* li menm. Annou regard sa *Bill* li menm Mr Speaker, *Bill* lannen- *Bill Act* ki ti pase lannen pase i annan trwa konponan.

Premye, konponan se definisyon “*protected characteristics a,b,c,d,e,f,g – (g) political affiliation; means membership close association or any outward support for a political party.*”

Dezyenm, konponan se sa ki nou apel *hate crime, hate to be considered aggravating factor* - si ou servi enn sa bann karakteristik pou ou komet en lot lofans.

Si ler mon pe bat en boug mon dir “mon pe bat ou aköz ou *US*” sa i mal aköz mon pe servi en mwayen politik - mon pe servi en konteks politik pou mwan *aggravate* sa lofans.

Onorab Gill, pa pe rod tous sa de keksoz li. Apre trwazyenm konponan se *hate speech* e se la kot Onorab Gill, pe touse.

E sa ki i dir sa ki i dir dan son *Bill* se “azout en dernyen paragraf anba *hate speech* pou dir ki *political affiliation* pa pou afekte *that section.*” Zis *hate speech.*

Savedir i an faver ki *hate speech* ki *hate as a characteristic, as an aggravating characteristic* i reste e i dakor ki i reste pou enn *hate crime.*

Me i pa kontan ki sa i vin pou en *hate speech.* Alor premyerman ler Onorab Gill, in dir taler ki i pe retir *political affiliation* sa i pa vre, aköz i pa pe retire.

Sa ki i pe dir se *political affiliation* pa pou vin en fakter dan *hate speech,* me i pou reste en fakter dan *hate crime,* e i pou reste koman en karakteristik dan definisyon.

Alor kot nou ete Mr Speaker? Aköz mwan mon’n perdi mwan mon’n perdi mon’n sey swiv e mon’n perdi mon krwar ki Onorab Gill, sa ki ti devret fer si i ti anvi tir ‘*political affiliation,*’ konpletman, se zis *delete* sa definisyon ‘*political affiliation,*’ dan premye dan premye konponan ki mon’n koz lo la taler.

Me si pa pe sey fer sa ki zot in pas en apre midi pe koz lo la ozordi, aköz i reste *political affiliation,* anba lamannman Onorab Gill, i reste koman en karakteristik pou tou keksoz *other than hate speech.*

So akfer nou’n- Akfer nou’n fer en deba apre midi? E si i anvi zis tir sa pou *hate speech,* e i anvi les li la koman en karakteristik pou tou lezot lofans ki’n ganny fer, ki i pe sey fer? ki pe sey fer apard-apard les dimoun fer sa ki nou’n vwar zot zot ti fer pandan zot letan?

Mr Speaker, ou ek mwan annou pa bliye ki nou, nou ti ganny kategorize koman bann dimoun aköz nou ti opoz sa Gouvernman ki’n bezwen pa rod Mr Rene, “nou pou met zot

kont en miray e nou pou flit zot.”

Sa se Mr Rene, sa se *hate speech* ki nou ti pou ganny flit ki ler ou dir ek en boug ou pou al flit li ki ou pe al fer? ki ou pe al fer ou? Ou pe al touy li.

Akoz ler nou flit en moustik nou anvi touy sa moustik, *that is hate speech*, pa sa ki nou, nou pe sey fer ozordi ki pe dir ki nou pa kapab servi en eleman politik pou akiz en dimoun.

E annou pa bliye ki nou bezwen regard sa dan konteks nou listwar. Nou listwar politik Mr Speaker, nou *political past* i ankor avek nou ozordi.

Se pa nou ki dir sa se zot ki dir, se zot ki dir ki zot ankor pe siport Mr Renee, avek son bann keksoz ki i ti fer pandan tou sa bann letan se zot ki dir ki zot ankor dan *SPPF* ek dan *SPUP* “*Fearless in Dignity*” sa se zot.

Savedir ki nou *political past* i ankor la avek nou ozordi e dezyenmman Mr Speaker, sa ki sa bann dimoun i anvi fer se kontinyen denigre nou parey nou vwar lo rezo sosyal ozordi.

Tan ki nou pa’n kapab tir sa lepase avek *US*, tan ki nou pa’n kapab edik dimoun ki dan *political*- dan *social media* zot bezwen vin pli responsab e pa target dimoun zis aköz zot pa kontan zot politik, nou bezwen gard sa karakteristik

dan sa Lalwa. E se pou sa rezon Onorab Gill-

MR SPEAKER

10 minit Onorab.

HON BERNARD GEORGES

Avek tou respe ki mon annan pou ou mon pa pe siport ou *Bill* apre midi. Mersi Mr Speaker.

(APPLAUSE)

MR SPEAKER

Mersi. Onorab Porice.

HON DOYACE PORICE

Mersi Mr Speaker. Bonn apre midi a tous Mr Speaker, sa lamannman anmennen par mon Onorab Elekte pou Baie Ste Anne Onorab Churchill Gill, i vremen senp parey mon koleg Onorab Vidot, in dir.

Mon demann mon lekor si in dormi byen aswar, aköz i paret mwan i napa en lekor prop pou son zabitan; zabitan son zil sirtou son parti *US* Onorab, i bliy bann atosite ki’n arive Sesel e osi lo nou zil sirtou kot i konsern drwa imen.

Sa menm lamannman letan son parti ti o pouvwar zabitan pa ti kapab koze, zot drwa ti’n ganny vyole, anfermen e dan fernwar.

Aküz zot pa ti kapab koze Mr Speaker, e pa kapab menm met en triko lezot parti politik

lo zot. Serten zabitan ti ganny bate, brile, menm touye zet dan rigol.

Mon annan konesans Mr Speaker. Mon annan konesans en zenn dan Cap Samy ti fini son lavi anba en pon.

Sanmenm ki nou anvi ankor lo nou zil en menm parti politik o pouvwar? I menm annan en bato lapas perdi ziska ozordi de zabitan nou pa ankor vwar li, fanmir ankor pe demann keston.

Eski nou Seselwa menm nou zabitan lo Praslin, nou anvi retourn ankor dan sa menm sistenm ki ti la oparavan? Kot zot drwa dan politik ti ganny abize, kot zot pa ti kapab koze e anmenn zot konsern ?

Me nou Mr Speaker, me non Mr Speaker, mon Onorab elekte, pou Baie Ste Anne pa konnen ki i pe anmenn, e mon pou dir i napa sa bon leker pou zabitan nou zil, e osi Seselwa an zeneral, sirtou dan son prop parti US. Mwan koman en Manm Proporsyonnel mon kont sa lamannman anmenn par mon Onorab, aköz plan zot parti US, se si-si zot arive vin o pouvwar ki zanmen pou arive - pou retourn Seselwa dan fernwar, e pou fer sa ki zot oule avek zot zabitan, parey zot ti fer lontan pran tou zot byen parey later, lakaz,

eksetera pa bliy larzan ki Sesel i gannnen.

Seselwa, espesyalman zabitan Baie Ste Anne. Fodre pa nou les nou ganny anbete ankor, fodre pa reste trankil. Fodre pa les nou retourn an aryer nou Gouvernman LDS in fini ek tousala. Seselwa i lib pou koze, koz sa ki zot anvi. Zot in re ganny zot drwa lekspresyon dan politik. Ozordi Seselwa pe ganny sa sans pou anmenn zot kontribisyon an ver sa Gouvernman ki o pouvwar.

Ozordi Mr Speaker, LDS in fer bokou pandan sa 5 an. Mon distrik Baie Ste Anne ti ganny neglize me nou'n vini nou'n re organize.

Ozordi mon fyer koman en Manm Lasanble Proporsyonnel. Mon Gouvernman in ekoute, e in delivre kot i konsern devlopman nou zil.

Zabitan ankor enn fwa mon dir i lib pou koze. Se sa ki annan plizyer, plizyer parti politik ozordi dan nou pei Sesel. Personn pa pe ganny bate, personn pa pe ganny touye, ouswa met dan rigol.

Mwan mon pou *vote* kont sa lamannman anmenn par mon Onorab Elekte, Baie Ste Anne, aköz mon pa'n anvi retourn an aryer.

Mr Speaker, lekel ki'n ensit plis vyolans dan sa pti pei Sesel? Se parti US. Tou sa

bann atosite brit ki zot in fer letan *SPUP*, *SPPF*, Lepep, e la *US* ti o pouwvar bann move dimoun. Sa la mazorite Seselwa i konn tre byen. Si ozordi nou annan en *TRNUC* ki'n bezwen mele dan nou pti pei Sesel, set aköz sa parti politik *SPUP*, *SPPF*, Lepep, *US* in fer tro bokou.

Ozordi gran mersi parti *LDS*, in vin sov sa pei Sesel dan tou sort fason, e nou Seselwa in kapab lib e viv anpe. Annan kouraz pou koze Seselwa in re ganny zot idantite dan nenport ki parti politik ki ou ladan.

Lekel ki'n anmenn *freedom of speech* Sesel? Se nou. *LDS* ki'n anmenn. Aköz nou pa ti anvi pran drwa Lepep Seselwa. Avek sa de mo Mr Speaker, mon pa pou *vote* pou sa lamannman. *No turning back* Mr Speaker. Mersi.

(APPLAUSE)

MR SPEAKER

Mersi Onorab. Onorab Henrie, ou annan laparol.

HON GERVAIS HENRIE

Mersi Mr Speaker. Bonn apre midi tou dimoun partikilyerman bann zabitan dan distrik Mont Buxton.

Mr Speaker, sa *Private Members Bill* ki devan nou pou ou ki pe ekoute i annan detrwa mo partikilye ki nou pe tann

bokou lo la karakteristik proteze, e i enportan ki nou sey konnen ki savedir sa.

E pou mwan nou ti pe sey diskrit sa nou de Onorab Monthy, nou vwar li plito koman en valer, en krwayans ki ou koman en endividi ou posede e ki ganny proteze legalman kont diskriminasyon. I enportan sa definisyon ki nou retenir.

Aprezan nou al lo afilyasyon politik, li i ganny determinen par ki parti politik ou siporte, e swa atraver en bwat vote ki en keksoz prive, aköz personn pa vwar ki ou vote.

Ouswa ou donn en sipor finansyel en parti, ouswa ou mobiliz sipor pou li ou enn son bann aktivis ou met en triko, ou desann nou al pile *Gordon Square*, so tou dimoun i konnen dan kanton ki ou siporte.

Be ou krwayans politik, ouswa ou aktivite politik i en karakteristik proteze. Deplizanpli dan plizyer parti lemonn, aköz i vedir ki kont Lalwa pou en dimoun diskrimin kont ou, enkli tret ou dan en fason enzis, ouswa pini ou, takin ou aköz ou krwayans ou aktivite politik, dan en fason ki an deor sa ki Lalwa i permet.

Mr Speaker, ler afilyasyon politik ti ganny anmenn koman enn bann

karakteristik proteze, i pa'n vin a la lezer. In vin dan en konteks e sa konteks, e nou pase politik, nou listwar politik, nou leritaz politik an gran parti annou pa bliye lekel sa 10 dimoun ki asiz lo mon kote drwat ki'n *form* parti sa leritaz e pase politik.

E se la ki bann zenn i bezwen sezi sa ki nou pe koz lo la dan Lasanble ozordi. Pandan 43 an depi 1977 ziska ler parti *SPUP*, *SPPF* Parti Lepep, *United Seychelles* ti perdi pouvwar an Oktob 2020, in annan en seri keksoz ki'n afekte endividi ouswa group dan Sesel.

Premyerman, viktimizasyon politik. E viktimizasyon politik, in egziste dan nou pei dan en konteks drwa imen, kot in annan labi pouvwar par Gouvernman, e lezot lotorite ki'n target bann endividi ouswa group dimoun aköz zot krwayans, lopinyon e aktivite politik.

Viktimizasyon politik, in ganny manifeste Sesel dan sa 43 an par sa parti atraver bann detansyon arbitrer, restriksyon lo laliberte lekspresyon, avek rasanbleman e prosedir Lakour ki pa ti zis.

E ozordi mon riye letan bann zenn politisyen parey Onorab Vidot, pou vin koz lo li in ganny viktimize devan sa

Speaker, ki'n ganny detenir ilegalman pou sepaman konbyen mwan Union Vale.

(APPLAUSE)

HON GERVAIS HENRIE

You don't have the ground pou ou vin fer sa kalite diskour. *You've had it easy*. Ar selman politik Mr Speaker, i en keksoz ki'n karakteristik nou listwar, leritaz e lepase politik.

I bann konportman kot lotorite in entimid, menase, e met presyon lo bann endividi ki'n enplike dan bann aktivite politik. E sa in enkli zefor pou souzestim repitasyon, e abilite sa bann endividi pou zot partisip libreman dan politik.

In annan diskriminasyon politik, kot ler bann endividi ouswa group Seselwa in ganny trete dan en fason enzis, ouswa dan en fason ki pa legal, aköz zot krwayans ouswa aktivite politik, e sa i en vyolasyon drwa imen.

E mon vwar i drol ki ozordi ki Komisyon Drwa Imen pa'n koze pou dir be non, sa Lalwa nou bezwen gete aköz i kapab pe al en pe tro lwen. Zot in reste trankil.

Ki nou'n vwar letan in annan diskriminasyon politik dan Sesel? In pyetin lo bann drwa fondamantal laliberte lekspresyon, drwa ki lartik 22 nou, nou Konstitisyon.

Drwa rasanbleman ek lasosyasyon pou ganny en prose ki zis devan lazistis, i lartik 19, Laliberte mouvman, lartik 25, Drwa annan propriyete, lartik 26, Drwa proteksyon legal anba Lalwa, lartik 27, Drwa ledikasyon, lartik 33, Drwa lozman, lartik 34, E drwa travay, lartik 35.

E sa bann lartik ki mon pe koze la in vin 93. Be ant 77 ek 93 sa sapit Drwa Imen la pa ti la zot pa krwar ladan zot, alor ki zot pe vin koz ek nou? Zot napa lotorite moral ou koz lo drwa imen sa parti.

(APPLAUSE)

HON GERVAIS HENRIE

Mr Speaker, pli gran demokrasi dan lemonn demokrasi pli avanse, demokrasi pli modern ou konnen lekel? Leta-z-Ini, e sa ki mon mon'n kapab vwar i annan omwen trwa leta an leta ini ki dan son kad legal i protez afilyasyon politik, koman en karakteristik proteze.

District of Columbia, Minnesota avek La Floride, aköz? Aköz nou bezwen protez endividi kont bann lotorite ki tro for e Onorab Loze, dan son prezantasyon in donn en keksoz ki mon zwenn li lanmwatye semen.

Par egzanp Onorab, ki ti kapab fer sa lamannman aköz nou nou'n konsey li dan *Bills*

Committee pou dir "Onorab, pa bon sa semen ki ou pe al ladan" nou ti dir ek li pou dir "si ou anvi fer sa zis retir afilyasyon politik net dan definisyon."

La ki nou vwar in fer parey Onorab Georges, in eksplik byen se ki in gard li dan Lalwa touzour, me selman i konfiz nou ki pe sey fer.

In zis asire ki afilyasyon politik i pa eleman ki pou ilegal pou servi pou ensilte laenn kont endividi ouswa en group dimoun. Be se sa ki nou pa oule. Ou kapab demen dan en *rally* debout an ser lo *stage* dir "nou pa dakor avek polisi LDS aköz i tro favoriz biznes, i le nou bann dimoun i al travay, i pa le donn *welfare* nou bann dimoun, be nou, nou krwar pou dir nou le pran swen avek nou bann dimoun *from cradle to the grave*, aköz sa nou nou bann sosyalis kominis nou krwar ladan."

Napa problem, me ou pa kapab vini komans dir ek nou "nou bann nwar, fodre ou touy nou, nou vilenn, nou isi nou laba." Ou pa kapab dir sa. Se sa ki nou pe dir nou'n protez dimoun kont sa. So Mr Speaker, e ki nou bezwen demann nou lekor, eski alor Onorab in reflesir byen lo ki i ti pe anmennen? E eski vremen li menm li dan son lekor, dan pli profon li menm, li ki'n anvi anmenn sa

lamannman ozordi? Mwan mon doute.

Mon doute pou dir sa i leker Onorab Gill. E Mr Speaker, atraver ou mon ava rakont Onorab Gill, en zistwar.

Le 23 Desanm 1991 mon ti aze selman 19 an, nou ganny en *call* dan milye lannwit mon frer ariv lopital mon gran frer ki mon paren pres pou li mor.

Akoz en group trwa dimoun e sa ti en *case* devan *TRNUC case 0405*, zot swiv li bann solda lo komann swiv li Tobrouk Klib li dan en triko "*I love Parti Seselwa*" - mon kontan Parti Seselwa.

I ti mon avek en leker Parti Seselwa, setou son krim ki'n fer li setou. Me son pinisyon pou sa parti ki ti o pouvwar siporte par sa 10 dimoun ki asize lo mon kote drwat i krwar pou dir mon frer e mon paren ti merit mor, ganny ponnyarde e ganny lese dan en rigol pou li sennyen a mor dan *Button Lane*.

Ki mannyer zot kapab dormi aswar e oule ki zot fer retournen sa, retir sa dan Lalwa pou ki demen letan en dimoun i met en triko *LDS* nou kapab pran en baton kas son latet, e les li dan en rigol sennyen a mor anba en pon? Se sa ki zot Dirizan, Dokter Patrick Herminie, in promet Seselwa i pou fer avek nou si i

ganny pouvwar le 27 Septanm 2025, e nou nou pe dir non nou pa kapab retournen dan sa lekor.

(APPLAUSE)

HON GERVAIS HENRIE

E pou bann zenn ki pe ekout nou, alors en zour ti fini lekol segonder, pos-segonder ou pa'n fer sa zans nanryen ou, ou sel krim se ki ou paran pa siport zot, ou ale ou fer laplikasyon travay dan servis piblik, premye keksoz ou ladministrasyon distrik i ganny en *call* "ou konn Gervais Henrie, ou"? I vin dan biro brans ti apele sa letan, si larepons i non zanmen ou pou ganny travay dan sa pei.

Eski sa i pa sa kalite diskriminasyon politik ki zot le fer retournen? E sa ti al osi lwen ou pa ganny travay, ou pa ganny drwa ledikasyon, ou pa ganny servis avek bann *public service* lasante tousala zot *deny* ou-

MR SPEAKER

10 minit.

HON GERVAIS HENRIE

... e sa ki lazenes Seselwa i bezwen konpran alor-

MR SPEAKER

10 minit Onorab.

HON GERVAIS HENRIE

Nou pa kapab mon fini lo la Mr Speaker, nou pa kapab retourn an aryen sa ki nou'n anmennen dan Lalwa se pou protez, protez tou sitwayen kont en parti politik ki krwar dan sistenm ek nou pa avek nou.

E sa parti ki krwar ladan se pa lot ki *United Seychelles* ki asiz lo mon kote drwat dan Lasanble Nasyonal. mersi Mr Speaker.

(APPLAUSE)

MR SPEAKER

Bon. Mon annan 3, mon annan 3 Manm ki annan lentansyon koze Onorab Gabriel, Onorab Andre, Onorab Labonte.

Apre i annan *summing up* byensir. Nou a pran en *pause* si napa okenn lot Manm ki anvi koze mon a ferm mon lalis la, e apre *break* nou a pran sa 3 Manm ek *summing up*. Byen mon pa'n vwar ki *point of order* Onorab Loze?

HON JOHAN LOZE

Mersi Mr Speaker. Mr Speaker, mon pe fer en *point of order* anba *Order 8*. Onorab Georges, in eksplik nou klerman pou dir lamannman ki Onorab Gill, pe fer i tous zis *hate speech*.

Onorab Georges, ki'n eksplik lepep Seselwa an antye sa zis *hate speech*. Prezan Mr

Speaker, mon pe rod ou gidans mwan.

Ki manner en lamannman ki tous *speech public discourse and debate* i al dan pran kouraz pik dimoun, touy dimoun kit li dan rigol blok dimoun ganny travay kan lamannman ki pe ganny fer i zis lo *speech public discourse and debate*? Onorab Henrie, i lalang parey son labitid.

(Interruptions)

MR SPEAKER

Bokou keksoz in ganny dir lo tou le de kote latab. Si ou pa satisfè ou bezwen rekonnet pou dir menm keksoz pe ganny fer lo tou le de kote latab. Mersi. Bon, Onorab Georges, *point of order*.

HON BERNARD GEORGES

Yes, Mr Speaker, i en *point of order* ki mon fer toultan. *There is no such thing as a point of order* anba *Order 8*.

E mon pa konnen aköz Manm i kontinyen demann en *point of order* anba *Order 8*. *Order 8* i dir i selman dir ki ou pou gard lord dan Lasanble, napa en *point of order*.

Onorab, si i ti anvi en *point of order* i ti'n devret rod en *Order* ki'n ganny *transgressor* e lev son pwen. Mersi Mr Speaker.

MR SPEAKER

Mersi. Mersi, nou a pran *break* nou a rebran 4- nou a rebran-

(Interruptions)

MR SPEAKER

Nou a rebran 14-

(Interruptions)

MR SPEAKER

Nou a rebran 4 er 15.

(BREAK)

MR SPEAKER

Onorab Gabriel, ou annan laparol.

HON CONRAD GABRIEL

Mersi Mr Speaker. Mon dir bonn apre midi tout monde a lekout. Mr Speaker, mon pa ti mon lentansyon petet pou pran laparol, pa ti pou dir sa ki mon ti pou al dir be selman mannyer deba in ale mon santi mon bezwen siport Onorab Gill, ek sa *Penal Code*.

Dabor Onorab Georges, mon napa leson pou pran ek ou mon kontan mon ledwa mon kontan mon pous lipye ou en boug danzere e nou pa fye ou.

Ombudsman ek *Human Rights Commission* ti ekrir Mosyon Onorab Henrie, ti ekrir lo Mosyon Onorab Henrie, me Onorab Georges,

ou pa ti dir nanryen. Onorab, ou en ipokrit-

MR SPEAKER

Oh,oh,oh,oh...

(Laughter)

MR SPEAKER

Onorab, silvouple evit bann lakizasyon personnel bann lensilt bann soz, *stick to the subject*.

HON CONRAD GABRIEL

Mon kapab kontinyen Mr Speaker?

MR SPEAKER

Nou'n ekout zot byen nou'n ekout byen zot in koz zis lefase *come on* nou'n ariv 2025 la. Seselwa nepli dormi boner, zot pe fer tou fason pou sa Gouvernman LDS pou anpes Seselwa koze.

United Seychelles ki'n vin vre lavwa sa pep. Mr Speaker, mon pa bezwen 10 minit pou montre sa pep ki sa Gouvernman LDS in perdi direksyon. Be Mr Speaker, tou LDS ki'n koze mon a dir tou LDS ki'n koze zot in fer *hate speech* zot in atak nou pou nou karakteristik politik.

Zot in kas zot prop Lalwa *come on* don aranz zot. Prezan Mr Speaker, Onorab Henrie, i en dimoun pli pa kalifye pou koz lo diskriminasyon aköz sak fwa i dan sez *Deputy*

Speaker, i montre pli gran *bias* e laenn politik ki Lasanble in deza annan in deza konnen.

MR SPEAKER

Onorab, sa bann lakizasyon i pa apropiye. Ou pe fer bann lakizasyon serye ou pou arete si non mon pou pran mikro. Mersi.

HON CONRAD GABRIEL

Mr Speaker, legzanp i lanmenm dan Lasanble, mon ti ganny met deor pa tro lontan pase.

MR SPEAKER

Onorab Henrie, lord.

HON CONRAD GABRIEL

Savedir pli bann gran *hate speech* se zot menm. *Now*, i pe koz lo diskriminasyon politik dimoun eski rapel ler divan ti dekouver lakaz sa de dimoun Mont Buxton? Ki ou ti dir? Ou ti dir sa kontrakter “pa al get dezyenm lakaz aköz i pa *vote* pou ou”.

Zot in anvoy merd drwa imen semenn pase la zot pe rode, *LDS* mon kapab dir son vre *meaning* se *Losing Direction Seychelles*.

(Interruptions)

HON CONRAD GABRIEL

Ase, ase, ase koz nou parti, parti Seselwa in vann parti. Parti Seselwa in vann Sesel ek

etranze zot pe protez zis zot lekor.

Mr Speaker, zot lenkyetid mon krwar zot lafreyer i nou kongre ki pe vini tre byento.

(Interruptions)

HON CONRAD GABRIEL

Nou pou montre zot nou vre lafors enn fwa pour tou, mon pou siport Onorab Gill, dan sa demars pou sanz sa sityasyon sa *Penal Code* e mon pou siport li avek gran lekor.

Malgre lot kote zot in riy nou, zot in gognard nou pandan preski 5 an la, be mon krwar Seselwa pe fini fer zot *appraisal*. Sa *vote* kont ki zot pou vote ozordi i parmi bann dernyen klou ki zot pou mete dan zot serkey. Mon a dir ou mersi Mr Speaker.

(APPLAUSE)

MR SPEAKER

Mersi pou reste kourt. Yes, *ok*, mon konnen ou non in ganny mansyonnen.

HON GERVAIS HENRIE

Mon annan en *point of order* anba 59(7)(d) *check the content of speech* ki koz lo *impute improper motives*. Onorab, in dir i pa ti anvi koze in vin dan Lasanble avek en *prepared speech* Mr Speaker, *I can see it from where I'm sitting*.

Dan son *prepared speech* i dir pou dir ti annan de kontrakter ti vin Mont Buxton, mon ti dir zot sot lakaz, savedir in prepare, i konn sa lenformasyon davans.

Mon *challenge* li devan Lasanble devan piblik Seselwa, pou mansyonnen lekel sa de kontrakter, donn mwan kan, kote mon ti dir sa, lekel sa de kontrakter? Ou si non li ki pe koz manti e pe *mislead* Lasanble. Mersi Mr Speaker.

MR SPEAKER

Mersi, *prepared-*

(Interruptions)

MR SPEAKER

Order! Prepared speech mon napa problemm avek en Manm i kapab *prepare* son *speech*, me selman mon rekonnet mon rekonnet ki annan en lakizasyon ki'n ganny fer kont ou e ou annan drwa defann ou lekor, mersi. Onorab Andre.

HON CLIFFORD ANDRE

Mersi-

(Interruptions)

MR SPEAKER

Onorab, Onorab Andre.

HON CLIFFORD ANDRE

Mersi Mr Speaker. Mr Speaker, mon krwar letan nou

vin dan Lasanble Onorab Conrad, in dir ki Gabriel, in dir ki pep Seselwa pe fer *appraisal*.

Me mon devwar i pou mwan fer *appraisal* lo sa travay ki devan nou. Si nou get en pti kou sa Lalwa - sa *PMB* ki devan nou i dir ki dan son *clause 2, section 89 of the Penal Code (Cap 158) is amended by inserting a new sub section 5* - Onorab Georges, in koz en pti pe lo la.

New sub section 5 after sub section 4 as follows, "for the purpose of this section political affiliation shall now apply and is excluded from the definition of protected characteristics."

Akoz mon koman koumsa Mr Speaker? Se pou montre ki pou dir letan nou pe koz lo sa Lalwa ki pe ganny demande pou amande, letan nou pe koz sa *insertion of new section 89(b)*. I dir koumsa "*the principal Act is amended by inserting after section 89(a) the following*, apre i ale i donn ou a,b - i donn ou 1,2,3,4,5.

Me si nou get sa Lalwa ki ti pase lannen pase se dan seksyon ki'n vin seksyon la, seksyon 2 ki annan bann definisyon.

En Lalwa letan in ganny, letan in ganny *frame* si nou pe demande ki *there's a deletion* dan en seksyon, dan en *clause* nou bezwen spesifye.

Be sa Lalwa ki Onorab Gill, in anmennen pa pe spesifye anba seksyon 2 kot i annan *political affiliation*.

Savedir parey Onorab Georges, mon pe ranforsi sa akòz letan mon osi mon'n gete mon'n vwar sa mon pe ranforsi sa, savedir anba seksyon 2 *political affiliation* son definisyon i reste parey.

So ki mannyer prezan letan nou pou ariv anba seksyon 89(b) -89(b) kot nou pou dir nou pou azout en 5enm pou nou esey fer sa ki Onorab Gill, i le fer.

Selman si nou get byen ki savedir *hate speech 89(b)(1)* i dir ou "*a person who intends to insight against a person or group of person based on their protected characteristic by (a), communicating, advocating or propagating statements whether written spoken or expressed in any form publicly or on an electronic media that could reasonably be construed as threatening, abusing or insulting.*"

Mr Speaker, i kler bann paramet ki sa i ganny servi. Parey Onorab Georges, in dir i pa pe vedir ki si Onorab Gabriel, ki pli pros avek Anse Aux Pins i santi ki mon pa pe fer en travay Anse Aux Pins, i lib pou li dir sa kandida LDS pa pe perform e mwan mon krwar mon kapab perform pli

byen oubyen en kandida US i kapab perform pli byen.

Napa nanryen ki anpes li ladan Mr Speaker, napa nanryen ki anpes li osi dir ki poudir si i santi ki pou dir LDS dirize par Prezidan Larepublik pa pe perform, napa nanryen ki anpes li dir.

Kwa ki anpes ou fer ladan, se ki letan ou pe promouvwar en aksyon of *hatred* pou al avek.

Savedir laenn - konmsi kot pou annan sa lanmertim kot en dimoun letan i pou vwar mon pase akòz ou'n dir li pou dir Clifford Andre, pa pe fer son travay Anse Aux Pins, i pou le anvoy en ros lo mon loto, se sa oubyen i pou zour mwan - se sa ki pe sey dir.

So mon pa konpran akòz nou pe dir ki sa i bezwen ganny retire, akòz si nou get byen Mr Speaker, dan nou Konstitisyon i kler anba lartik 22 kot i dir ou "*Every person has the right to freedom of expression and for the purpose of this article the right includes the freedom to hold opinions and to seek, receive and impart ideas and information without interference.*"

Selman anba nou Konstitisyon menm ki dir ou, "*the right under clause 1 may be subject to such restrictions as may be prescribed by a law and necessary in a democratic society.*"

Mr Speaker, nou en pei demokratik nou. Alors nou pa kapab zis, zis donn laliberte e en dimoun pou dir ou son laliberte i anba Konstitisyon, Konstitisyon i fer provizyon ki ou kapab fer serten keksoz.

Me selman sa restriksyon in ganny mete dan Lalwa, dan *Penal Code* pou anpes en dimoun ensit vyolans baze lo afilyasyon politik en dimoun. Alors i normal, akoz in annan lenstans kot dimoun - annefe mwan mon'n deza fer *case* kot in ariv *murder* dan letan kanpanny.

E dimoun in *attribute* sa avek afilyasyon politik, me selman *still* i en lofans akoz i en *murder*. So i annan i annan proteksyon anba Lalwa, ki ganny mete pou permet nou fer nou lekspresyon dan en fason sivilize.

So si nou al deor sa, normalman i normal pou sa lot dimoun santi li ki in ganny in ganny abize anba sa Lalwa, e sa Lalwa, sa Lalwa *Penal Code*, Mr Speaker, i dir annefe i sibzektif ki sa dimoun ki pe fer sa aksyon, i osi annan serten eleman ki si ou zistifye e ou ti konmsi si en dimoun i vini i zour ou oubyen i dir ou parey, "akoz ou *LDS*, ou *LDS*, mon pou touy ou, oubyen mon bat ou piti, oubyen mon pou fer en keksoz koumsa mon pou bat ou zanfan ensidswit.

So i montre son eleman sibzektif sa dimoun - *the offender* ladan i mete, *the offender* so sa i bann keksoz ki pou ganny pran konsiderasyon letan mon a fer konplent kot lapolis pa neseserman mwan letan sa dimoun i al fer en konplent kot lapolis, i pou dir tou sa bann keksoz ki'n pase, alors ki nou pou vwar ki pou dir i ti pe fer sa aksyon.

Se sa ki nou pe dir letan i ariv sa nivo nou pa oule i ariv sa nivo, alors al ou *rally*, sorti ou *rally* pase dir mwan alo ou, mon pou dir ou alo, napa nanryen pou ou zour mwan dir mwan be ou *LDS* ensidswit demen ou pou ganny en problem.

Ou konpran mwan mon pou vwar zot pe al *rally* mon pou dir zot alo mwan, mon pa pou al zot *rally* selman mon pou dir zot alo.

Letan mon pou gete mon pou dir be ti napa bokou dimoun. Mon pou dir li - koumsa mon pou dir, selman mon pa pou mon pa pou ensilte. Annefe personn pa kapab dir ki poudir mwan mon'n ensilte zot lo sa nivo. Se sa ki mwan mon anvi.

Mon ti a swete - mon ti a swete ki nou pei i reste a sa nivo, kot nou kapab kominike. Sakenn i annan son lopinyon, me nou kapab al travay demen dan menm lofis, e koze ek

kanmarad - sa ki kontan get telenovela mwan mon pa gete - sa ki kontan gete i gete zot a konte ki'n pase.

Ok, me selman zot travay se sa ki nou pe dir, travay an menm tan ou kapab koze. So se sa ki nou pe ki nou pe sey fer e si nou tir sa savedir nou pe dir avek dimoun al fer sa ki ou pa sipoze fer.

So ou kapab ensilte mwan, ou kapab zour mwan, ou kapab zour mon manman, ou kapab zour mon ser, mon zanfan ensidswit. Non i pa en i pa en pei demokratik e en pei sivilize.

Sesel i pti pti. Annefe mwan *weekend* mon'n ganny loportinite pou mwan zwenn en *eminent person* dan lemonn, e sa felisite ki'n felisit Sesel mon ti bezwen - konmsi mwan menm mon ti emosyonnel.

Sa nivo dimoun ki'n felisit Sesel. E alors i enportan ki nou gard nou pei dan sa dan sa leta ki tou sa bann gran gran dimoun letan i vin isi i kapab dir nou zot kontan Sesel, zot pou retournen e zot ale annefe fek ale yer, i dir i pe tournen ankor dan de semenn. Avek sa Mr Speaker, mon le enbleman dir avek Onorab Gill, ki mon pa vwar - mon pa vwar rezondet par deryer sa demann pou amann sa Lalwa.

Akoz si non sa nou pe permet dimoun fer dezord e nou pe kre *chaos* dan nou pei la ki nou pe al ver eleksyon, kot nou pe dir al vote ou, selman vote ou byen trankil al ou *rally* fer tou keksoz byen annord, kot ou menm ou demen ou ava kapab pe dormi anpe, kot ou pa ava ekspekte en dimoun pou vin fer dezord kot ou.

Avek sa detrwa mo Mr Speaker, mon pou parey mon'n dir *emblemment* dir avek Onorab Gill, ki mon pa pou kapab siport sa lamannman aköz mon pa vwar li pe fer zistis nou pei e mwan koman endividi koman en sitwayen Anse Aux Pins mon pa vwar li pe fer zistis pou Seselwa an antye. Avek sa de mo Mr Speaker, mon ti a kontan remersye ou.

(APPLAUSE)

MR SPEAKER

Mersi. onorab Labonte.

HON ANDY LABONTE

Mersi Mr Speaker. Mr Speaker, mon santi i enportan pou mon koze lo sa lamannman. Rezon ki mon pe pran laparol i senp.

Mr Speaker, ou konnen mon sorti dan en distrik La Rivyer Anglez e La Rivyer Anglez i en distrik kot nou'n soufer bokou dan lepase anba

en sistenm kot ti ganny dirize par en prensip diktater - kot ou konnen zabitan ti viv dan lafreyer, aköz sa parti ki ti o pouvwar i ti la i ti dir nenport kwa, i ti maltret nou i ti fer nou per.

Ou konnen sa i en kiltir ki i dan parti *US* li menm li, e ozordi nou vwar lekel ki'n pran Leader parti ki zot kandida Prezidansyel ozordi sorti dan distrik La Rivyer Anglez ki ti en ansyen *MNA* pou distrik La Rivyer Anglez.

E ler Onorab Hoareau, in pran laparol in fer resorti en keksoz ki i pa leker Onorab Gill, ki'n fer sorti ki'n anmenn sa lamannman soule pou sa Lalwa.

Mwan osi mon krwar pou sa i vre, aköz mon pou donn zis serten legzanp Mr Speaker. Aköz zot krwar pou dir zot pou retourn o pouvwar e aköz zot deza pe fer dimoun per, zot pe fer dimoun per aköz zot krwar zot pou retourn o pouvwar.

So zot prepar zot lekor ki ler zot retourn o pouvwar zot pou'n annan sa *platform* kot Seselwa zot pou kapab dir Seselwa sa ki zot anvi maltret nou dir sa ki zot anvi.

Aköz sa Lalwa parey i ete i byen, ou konnen napa nanryen ki'n pran lo *freedom of speech*. I kler ki ou kapab koze, aköz parey in ganny dir se parti *LDS* ki'n lager e Prezidan Ramkalawan ki la

ki'n lager ki ozordi nou annan pouvwar pou nou koze.

Me selman ler ou annan pouvwar pou ou koze Mr Speaker, ou bezwen annan respe - ou bezwen annan respe pou ou prosen, alor sa proteksyon ki pe dir ek ou poudir ou annan drwa ou koze ou, me selman ou napa drwa annan lentansyon pou ou fer ou kanmarad ditor, aköz senpleman aköz son afilyasyon politik.

Aköz mwan pou mwan, sa ki mon vwar i pe ganny proteze aköz i senp. Nou ti fer *blitz* La Rivyer Anglez Mr Speaker, ler nou ti fer *blitz* La Rivyer Anglez. I annan kot serten fanmir kot nou ti ale e deswit 1 erdtan apre sa bann fanmir i ganny *call*.

Zot *call* mwan, zot dir ek mwan, "ou konn en keksoz Onorab, ou konnen Prezidan fek sorti devan nou laport la. Nou'n ganny en *call* sorti kot zot kandida ki i pe met lafreyer, ou konnen "gara ou."

Ou konnen *these are*, *these are* sa bann kalite keksoz ki nou anvi kontinyen fer be nou, nou pe dir non.

Pa aköz sa dimoun i annan son afilyasyon politik, ki prezan aköz i siport *LDS* i pa pou manze, i pa pou bwar, i pa pou kapab travay. Nou'n vwar, i- annou aksepte la realite.

Mon pe koz dan mon distrik aköz mon konnen. I

annan menm en fiy ki mon kapab nonm son non. I ti travay isi kot Lasanble, i ti ganny viktimize senpleman akoz son afilyasyon politik.

E ankò enn fwa sa ki nou pe dir, ou pa kapab ou pa kapab viktimiz en dimoun, akoz son afilyasyon politik.

E sa ki sa Lalwa pe dir, i pe dir parey i ete la ou kapab annan ou lopinyon, me ou pa kapab abiz sa dimoun ou drwa plis ki an fo kre li domaz akoz i pa sipòt ou.

Mr Speaker, ou konnen sak fwa ki mon tann en Onorab, ki koze laba Onorab Loze - Mr Speaker, atravè ou ki zanmen in kapab annan kouraz pou li met son figir lo en poto elektrik, pour fer kandida pou fer dimoun *vote* pour li, e i koze bokou.

Souvandfwa ler i koze tou dimoun sirtou zabitan La Rivyer Anglez i dir ek mon zot tenny zot radyo, ou konnen akòz? Akòz kantmenm i koze i pa pe dir nanryen zis i rabase i pa konnen ki pe dir Mr Speaker.

(Interruptions)

HON ANDY LABONTE

E Mr Speaker, ou konnen en keksoz en keksoz ki nou bezwen konpran. Mwan mon anvi mon zabitan i konpran en keksoz.

Ler mon pe get i annan en fanmir La Rosière - en fanmir La Rosière ki dan lepass son fanmir in disparet, in mor ankò enn fwa akòz?

Akòz senpleman rezon akòz son afilyasyon politik pa ti an faver *SPUP* sa letan, e zot in fer li disparet ! En lot keksoz fek arive Onorab Gabriel, in dir annou koze 2025 annou koze 2025 Mr Speaker.

De semenn pase ti annan en kestyon konsènan nou Sant La Rivyer Anglez ki ankò enn fwa zot Prezidan parti in deside pou li vann.

Dimoun pe pronons zot lekor lo la pe dir zot mekontantman i annan serten dimoun ki'n ganny *threaten*, akòz sa bann keksoz parey, ou konpran?

So i montre ou akòz ankò enn fwa zis akòz sa bann dimoun pa afilye zot avek ki *US*, e sanmenm sa parti ki dir zot ankò krwar zot pe reve pou dir zot pou retourn o pouvwar e nou La Rivyer Anglez nou pe dir zot direktèman pou dir *no way* nou pa pe *turn back* dan sa sityasyon kot nou ti ete avan 2020 - non.

Akòz i senp. Akòz nou vwar pou dir zot rezon ki zot anvi sa i retournen, zot anvi entimid dimoun, fer dimoun per en manner ki dapre zot pou dir dimoun pou dir, be non ou konnen mon pa kapab

koze mon pa kapab koz kont serten kont *US*.

Me par kont si sa dimoun i siport *LDS*, sa dimoun li i kapab ganny kritike, i kapab ganny viktimize e menm i pa pou manze, i pa pou travay.

Mr Speaker, Sanmdi ankò enn fwa mon pe vizit Union Vale i dir koz 2025 Sanmdi mon'n vizit en fanmir Union Vale, sa fanmir i dir ek mon. "Ou konn en keksoz? Mwan mon fek ganny en *call* la ki zot dir ou pe pas dan distrik si ou les Onorab, antre dan lakaz gara ou si nou vin o pouvwar 2025."

(Interruptions)

HON ANDY LABONTE

Mr Speaker, i montre ou i montre ou pirman ki kalite ki kalite ki kalite parti ki nou annan, ki *US* kalite parti ki ete e nou anvi ki senm lafreier. E nou al pli lwen ankò Mr Speaker, dan zot parti menm zot Prezidan parti Dokter Patrick Herminie, in menm deza tap en ansyen *MNA*, *DA* La Rivyer Anglez akòz senpleman i ti pe fer pronons son lekor ki i kont serten keksoz kot zot parti e i ti dir li gara li.

Mr Speaker, i montre ou pou dir i dan zot sa kalite kiltir e nou, nou dan *LDS* nou pe dir *no way* nou pa oule sa.

E i enportan i enportan ki nou kit sa bann *clause* pou nou protez politisyen wi, akòz Mr Speaker? Nou'n war poudir la konmela i annan en *yes* i enportan mon pou dir.

Akòz i annan en kantite zenn i annan en kantite zenn politisyen ki pe vini la, i annan en kantite ki pe vini la.

(Interruptions)

MR SPEAKER

Order!

HON ANDY LABONTE

Sa bann dimoun zot pe santi zot entimide dan serten fason akòz? Akòz zot, zot pa oule ki politisyen i menm ganny *training* pou li kapab *empower* son lekor.

Me selman zot dan zot letan pou zot, zot ti ale aletranze. So i montre ou poudir zot le zot promot zot lekor, me selman si ou pa siport zot ou pa sipoze viv lo sa later.

Me nou, nou pe dir tou dimoun i bezwen egal, ou annan ou drwa pou ou koze, me par kont ou bezwen respekté drwa ou prosen.

Mr Speaker, mon i senp mon pe dir avek zabitan La Rivyer Anglez, sak fwa ou vwar sa bann dimoun lo lot kote latab laba ki ti *SPPF*, *SPUP*, *US* mon pa konnen ki zot pou vini dan le fitir, Mr Speaker, tou sa

ki sa bann dimoun i vin avek i annan en keksoz ki pa bon ladan. Ler ou vwar zot, zot vini zot debat lo serten keksoz sa bann dimoun pe rod zot lentere personnel.

Akoz zot anvi zot reste o pouvwar dapre zot, pou touzour retourn ankor dan pei pou zot viktimiz ou, ou pa pou manze, ou pa pou bwar zot, zot a ranpli zot pos fer tou sa ki zot krwar zot merit fer.

E nou dan LDS Mr Speaker, nou pou dir nou pou kontinyen vin avek bann Lalwa ki for e mwan mon pou konsey tou zabitan ek pep Seselwa ler LDS i pe diskrit en keksoz i pe propoz en keksoz, ekout nou byen, konpran nou byen ki nou pe dir - pa krwar sa bann dimoun ki pe dir lot kote.

Parey zot pe dir la pou dir zot pe vin fer zot kongre sa ki zot pe dir dan kongre-

MR SPEAKER

Ok, Onorab, konklir.

HON ANDY LABONTE

Sa ki zot pe dir dan kongre Mr Speaker, i enportan ki pep Seselwa i ekout zot, ekout zot ou konnen aköz i enportan pou ekout zot? Pou vwar kot zot lalang i vin aköz tou sa ki zot dir i mansonz.

Mansonz kot i sorti kot zot. Mr Speaker, avek sa de mo mon pou dir wi, mon pa pou

kapab siport Onorab Gill, mon konnen me Onorab Gill, ou annan en bon lentansyon, me selman sa *Bill* ki ou'n anmennen pou amande la i pa ou parey in ganny dir, ou'n ganny demande pou ou anmennen pou ou fer lamannman.

Be mon krwar ankor enn fwa retourn kot ou Dokter laba dir li dokter ou konnen en keksoz? Ou pe met mon dan mal, ou pe fer mon vreman perdi la Baie Ste Anne vre mon pe al perdi.

So avek sa de mo mon pou dir ou mon pa pou kapab siport sa. Mersi Mr speaker.

MR SPEAKER

Mersi.

(Interruptions)

HON SEBASTIEN PILLAY

Point of order Mr Speaker.

(Interruptions)

MR SPEAKER

Mon a ekout *point of order* Onorab Pillay.

HON SEBASTIEN PILLAY

Mersi Mr Speaker, anba nou *Standing Order content of speeches*. Ou mansyonn non en dimoun pou fer ou *speech* lizib pou fer ou *speech* fer sans.

Be ou'n zis, in zis vin atak Dokter Herminie ki pa kapab la pou defann son lekò, ki li i pa ganny proteze parey Prezidan e in fer alegasyon serye kont sa Msye ki en sitwayen prive Mr Speaker, ki i pa devret fer.

Alors mon demann avek ou Mr Speaker, lo rikord le sel dimoun ki'n tap en lot MNA se Prezidan Ramkalawan, se zis li.

So li Onorab Labonte, Mr Speaker, i napa okenn keksoz keston moral pou koz Dokter Herminie, akòz li in *actually* fer vis dan en biro.

So ou bezwen kontrol li Mr Speaker, i pa kapab fer sa.

MR SPEAKER

Ok.

(Interruptions)

MR SPEAKER

Onorab Gill, mon donn ou larepons lo deba. Onorab, mon donn ou laparol.

HON CHURCHILL GILL

Mersi Mr Speaker. Mr Speaker, premyerman mon le remersye tou bann Manm ki'n partisip dan sa deba tre enportan pou mentenir demokrasi dan Sesel.

Mon respekte tou bann lopinyon ki'n ganny eksprimen ozordi, me mon tre

dezapwente avek lentervansyon bann Manm lo lot kote latab.

Onorab Gervais Henrie, atraver ou Mr Speaker, in deside pou akont mon en zistwar, prezan *yeah* mon ti a voudre ou ti en leson ladan mon pe al dir ou ki mannyer pou sey tir en leson ladan.

Wi, i dir son zistwar in eksplike mon krwar nou tou nou'n tande, e i dir ki sa *case* ti avek *TRNUC* - keston Mr Speaker, eski Onorab, i senser dan sa zistwar ki'n akonte?

Onorab si ou senser akòz ou pa demann ou Prezidan pou donn sa lalis *perpetrators* aret kasyet.

(APPLAUSE)

HON CHURCHILL GILL

TRNUC. Mr Speaker, nou'n osi tann Onorab Georges, en avoka parey nou tou nou konnen Onorab Andre, parey nou tou nou konnen zot tou le de zot konnen ki sa *Bill* pe demande.

Zot konn sa tre byen, me selman ler ou abitye anbet en pep ou krwar pou dir tou loportinite ou gannye i zisteman bon pou anbet sa pep.

Me selman i zis ki tou sa bann kart in fini fay e prezan annou esper rezilta. *MNA* La Rivyer Anglez i dir mwan be

tou fason mon dan problemn Baie Ste Anne.

Mon pa krwar i devret trakase ek Baie Ste Anne mon si le konn zistwar Baie Ste Anne demann Onorab, ki Baie Ste Anne i osi i a dir li. Li son problemn i bezwen vey La Rivyer Anglez la ki MNA li.

(laughter)

HON CHURCHILL GILL

Mr Speaker.

MR SPEAKER

Onorab.

HON CHURCHILL GILL

Sa deba ozordi.

MR SPEAKER

Onorab Georges, les- les Onorab Gill, fer son *speech* silvouple.

HON CHURCHILL GILL

Yeah, ler in koze mon pa'n dir en parol.

MR SPEAKER

Wi, ale Onorab.

HON CHURCHILL GILL

Pa eksite Onorab, *relax*. Plis ki zanmen sa deba ozordi Mr Speaker, in klerman montre nou ki si nou zoli pei Sesel pou vreman reisi, pou vreman ariv ver nou vre desten, premyerman Sesel i bezwen en nouvo Gouvernman.

(APPLAUSE)

HON CHURCHILL GILL

E en Lasanble ki travay 10 fwa pli dir ki sa kote latab ki annan mazorite dan Lasanble Nasyonal Sesel ozordi.

(APPLAUSE)

HON CHURCHILL GILL

I kler apre ki mon'n ekout deba ki anba en Gouvernman LDS Sesel pou pran fon.

(APPPLAUSE)

HON CHURCHILL GILL

E i pou pran nou bokou lannen pou redrese si nou donn LDS ankor 5 an ki nou konnen i pa pou arive tou fason.

(APPLAUSE)

HON CHURCHILL GILL

Mr Speaker, nou'n tann byen bann largiman, *hate speech*, *political affiliation* apre tou nou mazin byen lekel ki ti vreman enzekte *hate speech* dan lavi politik Sesel?

Hate speech dan lavi piblik Seselwa ti ganny en dimansyon vreman destriktif, konsekaman nou ti vwar en Sesel pli divize ki zanmen.

Ladministrasyon LDS ek son bann aktivis zot koz lo pozitivite, lekel ki ti anmenn

sa fame *lyrics* “Pile, pile, pil lo li.”

(interruption)

HON CHURCHILL GILL

Ki'n detri sa fabrik linite dan sosyete Seselwa ki'n fer fanmir Seselwa vir kont kanmarad, ki'n detri tou savwar viv ki nou paran ti'n enkilke dan nou, ki'n mank respe pou tou dimoun.

Kot menm en etidyan lekol ti pe sant “Pil lo li” avek kanmarad. Ki ti vremen lobzektif *LDS* pou entrodwi en tel sanson avek en *lyrics* sitan vilger koumsa dan sosyete pep Seselwa. Sanmenm sa ki zot apel pozitivite? Mr Speaker, lekel ki ti fer propagann *hate speech* lo medya sosyal avek bi pou asasin karakter plizyer endividi.

Lekel ki ti fer *hate speech* deplorab dan lespas piblik dan bann *rally* oubyen plizyer rasanbleman politik pou mank respe pou bann madanm tre profesyonnel e responsab?

(Interruptions)

HON CHURCHILL GILL

E sa ti ganny fer dan en fason ki pa akseptab dan piblik. Mr Speaker, ozordi ler *LDS* i o pouvwar zot pe fer menm keksoz, me dan diferan fason.

Ozordi ki nou vwar? Ladministrasyon *LDS* i dir ki nou dan miltiparti, me zot le zis koze. Ki sa i vedir? Miltiparti wi, me atansyon zot le toler zis *single voice* sa pou zot.

Leadership LDS i le *freehold* lo Facebook, *freehold* lo WhatsApp, *freehold* lo *speech* dan bazar e lezot landrwa piblik espesyalman bann ki pe dir, “*LDS out*”

SBC dan par Manm Lasanble *LDS* tanzantan nou vwar mannyer zot ganny takinen.

Mr Speaker, anba lartik 22(1) Konstitisyon Sesel. E la mon le fer sa 2 Onorab, avoka konnen ki mon osi mon konn lir lartik.

(APPLAUSE)

HON CHURCHILL GILL

I fer kler ki tou endividi i son drwa pou annan *freedom of expression* ki enkli annan son prop lopinyon, ekout e respe lezot lopinyon, resevwar e partaz lide ek lenformasyon san okenn lenterferans. Sa ki nou pe rode.

(APPLAUSE)

HON CHURCHILL GILL

Mr Speaker, ki nou vwar anba sa Ladministrasyon *LDS*? Zournalis ki ganny *harass*

ganny arete akòz zot fer sorti bann pwen politik for.

Endividi ki ganny arete zis akòz zot lopinyon politik in sanze ver *LDS*. Mr Speaker, Ladministrasyon *LDS* fodre annan respe pou nou Konstitisyon.

Seselwa la deor pe swiv tre pros e konpran tre byen ki pe pase, zot klerman fortman pe dir "*LDS never again!*"

(APPLAUSE)

HON CHURCHILL GILL

Sa lamannman ki mon propoze ti en loportinite pou Seselwa vwar ki bor vremen Gouvernman *LDS* i anvi anmenn sa pei ek son pep.

I tre kler ki Ladministrasyon *LDS* li menm pa vremen konnen ki mannyer pou fer marse en pei, ki mannyer pou bouz devan avek sa pei ek son pep pou plis prosperite pou tou Seselwa.

Zot in konpletman *fail* sa pep ! Sel opsyon pou Sesel se en nouvo Ladministrasyon *United Seychelles* dirize par Dokter Patrick Herminie.

(APPLAUSE)

HON CHURCHILL GILL

Mr Speaker, atraver sa propozisyon pou sa lamannman Sesel avek son pep pe debout dan en krwaze semen ase determinan ozordi.

Swa Seselwa i debout for pou sef gard nou parkour, vre demokrasi e liberte lekspresyon, oubyen nou les Sesel drive lo lapant semen diktatir.

Sa amannman ki'n ganny propoze se pou etabli en balans ant anpes diskriminasyon e prezerv laliberte lekspresyon.

Afilyasyon politik i en swa tre personnel ki reflekte krwayans, valer e vizyon pou fitir dan en demokrasi, kot ou swa politik pa devret zanmen en rezon pou ou ganny diskriminen.

Sa amannman a ranforsi sa nosyon kot letan diskriminasyon dan nenport ki laform i ganny respekte, politik i santre lo diverzans lopinyon an plis ki sa sanzman pou anpes labi pouvwar.

Mr Speaker, Sesel in depas sa staz konsolidasyon Lalwa anti-diskriminasyon pou protez aksyon politisyen i pa neser.

Mon pe demann tou Manm ki konpran lenportans sa amannman pou sezi sa loportinite pou anfors nou bann prensip, valer demokratik pou les diverzans lopinyon politik manifeste son lekor san okenn diskriminasyon san okenn restriksyon.

An siportan sa amannman nou pe

esansyelman re afirm nou komitman, pou en sosyete kot laliberte lekspresyon i manifeste son lekor pou ki lavwa tou Seselwa i ganny ekoute e respekte.

An plis ki sa, sa amannman pou relev kalite kominikasyon ek diferan lide. Politisyen ek sitwayen ava ankouraze pou angaz zot dan bann deba pli onnet full stop sa kalite fransiz pou kapab kre en kiltir pli transparan e rann kont diferan lide avek ki kapab ganny *challenge* e amelyor lo la atraver diskisyon lib.

(APPLAUSE)

HON CHURCHILL GILL

Sa amannman pou osi promot plis langazman sitwayen, pou fer sorti zot krwayans politik aköz zot pou annan menm drwa dan okenn *forum* politik, pa zis politisyen.

Mr Speaker, sa amannman pou osi ankouraz sitwayen pou partisip aktivman dan proses direksyon ki nou pei bezwen pran ler zot santi ki zot lavwa in kontribye dan bann desizyon enportan e kolektiv.

An konklizyon Mr Speaker, ler size afilyasyon politik i vin en size pou deba ouver, i ankouraz lagrandisman dinamik politik.

Kot solisyon inovativ, e divers perspektiv i fleri sa

bann lesanz vibran i pa selman solidifye nou demokrasi.

Me i osi ankouraz progres e devlopman pou asire ki nou nasyon i reste proaktiv ver bezwen ek laspirasyon tou Seselwa.

Mon swete ki mon'n donn ase lenformasyon pou bann Manm Lasanble e dimoun ki pe ekout nou deor konpran vrenesesite e lenportans sa lamannman pou en meyer Sesel demen pou nou e nou fitir zenerasyon.

Mon swete ki prezan Manm Lasanble i a kapab pran zot desizyon, me selman ou konnen Mr Speaker, ler ou an retar ou an retar ou pa pou vwar kler devan ou. Mersi.

(APPLAUSE)

MR SPEAKER

Bon, Manm a *vote* lo *Penal Code (Amendment) Bill, 2025*.

Manm ki an faver lev lanmen silvouple? Mersi. Manm ki kont? Lo *General Merit Penal Code (Amendment) Bill, 2025* - 7 Manm in vot pour 20 Manm in vot kont.

Sa propozisyon Lalwa in ganny rezete par Lasanble. Mersi. Nou'n termin nou travay ozordi e mon a remersye Manm pou zot partisipasyon Lasanble ava *adjourn* e nou a re pran Mardi prosen 9 er.

(ADJOURNMENT)